


NKONKO NÈ MANDAMUNA

PA NYUMA MWÎMPÈ

 Nenku paanyimà pàà makèèlèlè dilòòlò tuvwa bônsò anu buukùte. Ndi mutèèlèje milubù milenga ayi leelu ewu ya bààbúngì bàdì bapetè Nyuma Mwîmpè abu. Ne tudi ne disànkà bwa bwalu abu.

² Ndi ne disànkà dya kwikalakù ne Mwanèètù Graham pàmwè neetù dilòòlò edi, umwe wa ku beena dyètù bàà mu tabernacle emu, mpaasàtà wa ekeleeziya wa cijila mu Utica mwàmwa. Ne Mwanèètù Jackson, ùvwa kaaba aka, makèèlèlè dilòòlò, ngeela meeji ne mmwômò, anyì wálùkìdì mu batèèleji emu mwaba kampànda mpindyewu, mwämbìbo kùdì muntu kampànda, mu. . Eyowa, ndi mmòna Mwanèètù Jackson mu batèèleji mwàmwa mpindyewu. Ne—kadi Mwanèètù Ruddell, yèyè ùdì kaaba aka dilòòlò edi anyì? Yèyè mmukwabo wa ku beena dyètù bàà mu “62” emu. Tudi ne disànkà dya kwikalakù naabò mwab’ewu. Nenku ne wetù. . . Kaa, Mwanèètù Pat, ne bàna beetu bakwabo bônsò aba, tudi—ne mu batèèleji mwàmwa. Tudi ne disànkà dya kwikalakù neenù bônsò kaaba aka dilòòlò edi.

³ Mpindyewu, bu mèmè mwa kubingishakù cintu aci, ndi mufwányine kufikisha bayiishi bîmpè abu kaaba aka bwa bôbò kwakulakù neenù, bwalu mèmè dîyì ndimpàte anu ku dipìcila dya mu cikondo cilenga cya makèèlèlè dilòòlò aci.

⁴ Mpindyewu, mukàjàànyì, yèyè ki wanyì mundongolodi; nudi bamanyè’s, bàna beetu, cìndì ngamba aci. Ùvwa wàmba ne bantu bàvwà paanyimà pààpa makèèlèlè dilòòlò kabàvwà mwa kungumvwakù to, bwalu mvwa ngaakwila mu cintu eci. Nenku mpindyewu, kumpàlà kwa mèmè kubanga, nênteetèku cintu kampànda. Mpindyewu, ndi ndikonka nî mbîmpè nanku. Mbîmpèku nanku paanyimà apu anyì? Anyì nanku mbîmpè anyì? Mbîmpè nanku anyì? Mpindyewu, Munanga wanyì, ewu mmusangu wumwepele wúngààkwedi kàmwè kwa cijèngù. Mpindyewu, bôbò’s nyawu bàmba ne mbîmpè nanku. Eyo. Kaa, ekelekele! Awu’s ki mukàjì. Aku nkàmwè, bwalu kùkaadi ntàntà mule kùndì nciyi mumwele kàmwè to. Pa ciibidilu yèyè ùtu anu mubingè.

⁵ Ee, ncyà bushuwa ne tudi bapìcile mu cikondo cya dicyònkomoka mu masangisha a malòòlò asatu awu; mèmè’s. Nenku mpindyewu, mikàbà ya mèyì, yònsò pa kuumusha wà makèèlèlè dilòòlò. . . Mvwa mubiikile Mwanèètù Goad mumwambile bwa kulwayè kwangata mukàbà wà mèyì bwa tabernacle. Kadi mbyenzèke ne ndi muumvwe bàmba ne Billy

Paul ùwva mwangàte kàshinyi kèndè muyè, pa nanku mukàbà wà mèyi kawùwva mukwàciibwe to ku dyànyi dimanya. Pa nanku tudi bapangile wôwù awu's. Mvwakù mwa kuswa ngikalakù muwùlamè mu ekeleeziya bwa ekeleeziya bwa—mùdi kampàndà wàmba—bitùdi twètù twitabuujà.

⁶ Mpindyewu, dilòòlò edi nêngàkulè pa *Muyiiki Munène*, bu mémè mwa kujikija nkonko pa dībà. Ne pashiishe, mààlabà mu dinda kùdi mudimu wà dyondopa. Nenku netwikalè mwa kusambidila babèedi. Ki bwa cinyi, katwèna mwa kwabanya—anyi anu kuya ne kwamba ne: “Mpindyewu, nênkwangàte wèwè, ne wèwè, ne wèwè” to. Abi kī mbifwànyine kwikala bimpè to. Kadi tudi wifila kasumbù kàà twarta, ne mwaba kampànda mu twarta atu, mbiikila bantu ndambu bwa kubàndabò pa cibumbà cya ku cyambilu. Nenku dībà adi, Nyuma Mwimpè Yèyè mubangè kusokolola maalu, dībà adi Ùdi ùpàtuka mu batèeleji amu ne wàngata bantu mu batèeleji amu bwa mudimu wà dyondopa. Nenku pashiishe, mààlabà mu dinda, nêngàkulè, bu Mukalenge mwa kwanyisha, kumpàla menemene kwa mudimu wà dyondopa.

⁷ Ndi mmòna mukàjàànyi ùseka. Munanga wanyi, kwèna mwa kungumvwa nasha kakese anyi? Kaa, udi ungumvwa. Ee, abi mbimpè. Yèyè mmusòmbèle mundekeelu mwàmwa ne pàdiku—yèyè kàyi mwa kungumvwa to, udi ùkùpa mutù ne: “Wèwè... Ncyèna mwa kukuumvwa to, ncyèna mwa kukuumvwa to.”

⁸ Nenku mààlabà—mààlabà dilòòlò ndisangisha dya butangadiki ne mudimu wà dibàtiiza dya mu màyi. Ne pashiishe, pàndi anu ne ngààjikijì kuyiisha mààlabà dilòòlò, netùumushè ridò ya paanyimà bwa kwenza dibàtiiza dya mu màyi kaaba aka mààlabà dilòòlò. Bu Mukalenge mwa kwanyisha, bu Mukalenge mwa kwanyisha, mu dinda ndi muswe—anyi mààlabà dilòòlò ndi muswe kwakula pa cyena-bwalu eci ne: *Ci—Cimanyinu Cyàkafidiibwa*. Ne pashiishe, twètù tusanganyiibwa kaaba aka mu diisàtù dilòòlò, Mukalenge Yèyè mungaanyiishile bwa kwikala apa mu diisàtù dilòòlò, ndi muswe kwakula pa cyena-bwalu cya ne: *Tudi Bamòne Mùtootò Wèndè Ku Esètè Nè Balwè Bwà KuMukuukwila*. Mpindyewu, cidi anu kumpàla kwa mulàadilu wà Noël.

⁹ Ne pashiishe, dyàkàmwè paanyimà pàà Noël kùdi lumingu lwà diikisha dya Noël. Pòpò apu ki patùdi twangata mikàndà mifundilangana yònsò... Mwanèètù Mercier ne bakwabo abu bàtu pa ciibidilu bàyisangisha yònsò. Nenku tudi tuyàdija yònsò, ne tusambila pa mikàndà mifundilangana eyi ne tulòmba Mukalenge bwa kutùlombola pa buloba bujimà kwònsò kutwàya aku.

¹⁰ Mpindyewu, bôbò, beena Kilisto beena Kantu-ku-byanza abu, bàdi ne mulongolongo munene wa masangisha, àdi ne cya kwenzeka dyàkàmwè mu Floride bwa muyiiki wàbò awu.

Kuumuka aku kuya mu Kingston, pashiishe mu Haïti, ne kuya ku Puerto Rico, kubwela mu Amerike wa ku Sud, kwalukidila ku Mexique.

¹¹ Kadi mbimwèke bu ne Mukalenge ùdi ùndombola bwa kuya ku Norvège. Ncyèna mumanyè ne mbwà cinyi to. Nudi bamanyè kakàndà kakese kàdi kàbìikidiibwà ne *Muntu Mutùma Kùdì Nzambi* aku anyi? Ki mukàndà mutàmbe bunene wa maalu a ntendeleelu wùdì mupàtula mu Norvège ngwôwù awu. Anji elààyìbì meeji pa bwalu abu, maalu àdi Mukalenge mwenzè kuntwaku. Ne pámvwà kuntwaku, kabàvwakù baswè bwa kundekela ntentekela babèèdi byanza to. Mvwakù bwa malòòlò asatu. Kadi kabàvwakù baswè bwa kundekela ntentekela babèèdi byanza to. Pa nanku nudi numòna cìdì Nzambi mwa kwenza. Misùmbà ya bantu yìvwa minene menemene mu mushindu wà ne byàkakèngela bwa kwangatabò bampùlushi, babànde pa tubalù, bwa kusàkabò bantu ku luseke mu misèsèsù bwa ngaamòna mwa kuya too ne pa mwaba awu. Nanku ncyàkatentekela babèèdi byanza to. Nansha nanku ngàkabàsambidila; kubàmbila bwa kutentekelanganabò byanza munkacì mwabo.

¹² Pa nanku... [Muntu kampàndà ùdi wàkula ne Mwanèètù Branham—Muf.] Eyowa, nèngènzè nanku cya bushuwa, pashiishe. Mpindyewu, mààlabà mu dinda... Mpindyewu, dilòòlò edi, pàmwàpa netùbwelè anu mu nkonko eyi, bwalu tudi ne mikwabo milenga ya dikèma. Ne ncyèna mumanyè ne Mukalenge neàtùlamèpu ntàntà bule kaayi to. Nanku pashiishe, mààlabà mu dinda anyi Billy Paul, Gene, anyi Leo, yònsò wikalakù awu, neikalè mwab'ewu bwa kwabanya twarta twà masambila pa dibà mwandamukùlù too ne pa dibà mwandamukùlù ne tusunsa makumi asatu. Mpindyewu, bantu bàà pambèlù pàà cimenga, ngànji ncyàmbùlùlèku cyàkàbidì bwa kanùlu kupwa mwoyi. Wèwè muswe bwa kubwela mu mulongo, tudi baswe kwangata nangàngà bantu bàà pambèlù pàà cimenga kwòkò mushindu.

¹³ Mpindyewu, misangu mikwabo kaaba aka mu ekeleeziya tutu tukafika too ne mu mushindu wà bàmba ne: “Ee...” Tudi twangata bantu bàà pambèlù pàà cimenga, tubàfikisha kùneeku... Muntu neàmbe ne: “Ee, ncìvwa mumanyè cìvwàbò bàsaama to. Mbafwànyìne kwikala bàmba cintu cya mafi.” Pashiishe wangata bantu bàà mu cimenga; bàmba ne: “Kaa, s'uvwa mufwànyìne kwikala mubàmanyè.” Pa nanku... Pashiishe bàmba—bàkaadikù bambè ne: “Ee, mèmè nènkwambìlè's, ntwarta twà disambila atu.” Ee, kadi aba bàdì kabàyi bapetè twarta twà disambila abu? Pààbì's bikaavwa byenzèke ne ku ditùkù ne ku ditùkù pàvwàku...

Wamba ne? [Bàdi bàlòmba Mwanèètù Branham bwa yèyè kwimanyinakù kule ne cikòlokolo—Muf.] Kwimanyinakù kule ne cikòlokolo? Ee, nudi bamanyè's, mèmè ntu misangu

yônsò anu nyiisha nkacinkaci wa njila. Pa nanku pàmwăpa nêncyăngàtê anu mushindu awu. Mbitâambe bwîmpê nanku anyi? Abi Mbitâambe bwîmpê. Abi mbîmpê. Ndi nnwâmbila cidici. Ndongolwelu wetù—wetù wa kufikisha meyi kudi batêeleji kadi ki udi mutâambe bubî kaaba aka, mutâambe bubî be. Mpindyewu katwênakù tuteeta bwa kulongoloka to, bwalu tudi baswê bwa tabernacle mupyamûpya ìbakiibwê dyākāmwê. Ne dîbâ adi ki patwikalâ mwa kupeta myaba yâbûngî (nwamònu anyi?) bu twêtù mwa kutwa eku ne eku ne kutâmba kudiyundishakù ndambu mwaba ewu, ne kuvudijakù myaba mikwabo, ne kudilongolola bwa masangisha patùdi tuênza kaaba aka.

¹⁴ Nenku mpindyewu, vùlukàayi ne, mu dinda nsongàalùmè eyi, umwe anyi basatu bàà kùdîbo nebààbanyè twarta pankaci pàà dîbâ mwandamukùlù ne tusunsa makumi asatu, anyi, dîbâ mwandamukùlù ne dîbâ mwandamukùlù ne tusunsa makumi asatu. Aci cidi cîfilakù mpùngà kùdi bantu bônsò bwa kwikalakù bashikàme. Nenku mvwa ngamba mùdîbo bààbanya twarta, ne bwa cinyi tudi tucyênza. Mbwa kulama bulongàme. Nwamònu anyi? Mpindyewu, kadi bu ne mvwa mbwela kaaba aka, anu bu mùdi mpindyewu ewu ne ngamba ne: “Mukàjì ewu, mukàjì ewu, ne mulùmè wàwa, ne mukàjì ewu. . .?” Nudi numòna’s, s’mbifwànyine kwikala anu bu—s’mbifwànyine kwikala anu bu bikolè. Nwamònu anyi? Nenku dîbâ adi, wêwê. . . Misangu yâbûngî nkàadi mwenzè nunku. Ne bôbò kabàyi bapitèpite bûngî mu dinda to, ndi mwa kwenza cintu cimwecimwe aci. Ndi mwa kwamba ne: “Mbanganyi kaaba aka bàdi bafùmîne pambèlù pàà cimenga bàdi ne cintu cibàsaama? Juukilaayi kuulu.”

¹⁵ Mwanèètù Mercier, udi mulwe bwa kunkwàcîsha. Neùnkwàcîshèku anyi? [Mwanèètù Mercier ùdi wàmba ne: “Ndi ndwa bwa dikwacîsha.”—Muf.] Kàà, udi ulwa. . . Nyawu ùlwa bwa kudikwàcîsha yêyè mwine. Mvwa mwakùle ne mulundà webè mukàjì leelu ewu. Mpindyewu, mbîmpê wîkalèku naanyi ne musàngèelu menemene. Wamònu anyi? Eyo. Abi mbîmpê. Ndi—ndi ngaanyisha dikima adi Mwanèètù Leo. Pàdi cintu kaciyi cijaalàme to, tù—tùcìvwijè cijaalàme anu mutùdi bamanyè mwa kucìvwija amu, ne mwetu mwònsò.

¹⁶ Nanku mpindyewu, kulòmba anu bantu bàà pambèlù pàà cimenga bàdi ne cintu cibàsaama abu bwa kwelabò byanza muulu. Nenku dîbâ adi kwimana mwaba awu, kudifila bwa muntu umwepele too ne pàdi Nyuma Mwîmpê ùbanga, ne wàngata batêeleji bônsò. Mbanganyi bàkaadiku basangànyîlbwe kaaba aka bamòne aci cyenzèke kaaba aka? Bushuwa’s! Nwamònu’s, nwamònu anyi? Pa nanku kabyèna ne bwalu to nansha biikàle mu mushindu kaayi. Bìdi anu. . .

¹⁷ Ndi muswe bwa nwènù kuvùluka eci, nenku nênteetè bwa kwalukilapù cyàkàbìdi mu dinda. Bantu bàà Bisàmbà bya bendè, Evanjeeliyo udibò babàpèeshe ng’Evanjeeliyo wa

diitabuuja, kàyi wa byenzedi to nansha kakese. Nwamònu anyi? Nenku anu múngàmbì makèlèlè dilòlò. Pààkamata Nyuma Mwîmpè dya Mpenta, pààkatùulukàbo e kuya kùdi beena Yudà (Byenzedi 19.5), byàkakèngela bwa kubàtentekelabò byanza bwa kuMupetabò. Ne pààkayàbo kùdi beena Sàmaalèyà, byàkakèngela bwa kubàtentekelabò byanza. Kadi pààkafikàbo kùdi bàà Bisàmbà bya bendè kwa Kòneeliyò: “Pàcìvwà anu Peetèlò wàmba mèyi aa...” Kakùyikù ditentekelangana dya byanza to.

¹⁸ Pààkafwà mwànà mutekète wa bakàji, mwànà wa bakàji wa Yayilò, mwakwidi awu, wàkamba ne: “Lwá ùmutentèkèlè byanza, ne yèyè neikalè ne mwoyi.” Kadi kààmàndà kàà màsàlaayi lukàmà kàà beena Loomò aku, muntu wa Bisàmbà bya bendè, pààkambàye ne: “Ncyéna mwakànyine bwa Wèwè kubwela mu nzùbù mwànyì to, ambà anu díyi òmwè.” S’ki cyòci aci. Nwamònu anyi?

¹⁹ Mukàji mwena Syrophénicie awu, uvwa mwena Ngelika mu bushuwa bwa bwalu, yèyè—pààkamwambilà Yesu, ne: “Kí mbikùmbàne bwa Mémè kwangata dyàmpà dya bânà bwa kudyèlela tubwà to.”

Mukàji awu wàkamba ne: “Aci ncilelèlè, Mukalenge; kadi tubwà atu mwinshì mwa mèèsà’s tùtu tùdya tusùnsukilà twà màmpà a bânà atu.”

KwambaYè ne: “Bwa edi díyi, démon awu ùmùkù pa mwanèèbè wa bakàji awu.” Dìbà adi ikàla wamba bintu bìmpè. Ambà cintu kampànda cya cìmpè bwa muntu. Akùlà bwa Yesu. Ambà cintu cya cìtwàngana nyama ku mikòlò, cintu cilelèlè. Ki mushindu wà kuumusha baadémons ngwòwù awu. Yèyè kààkambakù—Yèyè kààkasambilakù bwa mwànà wa bakàji awu to. Yèyè kààkambakù cintu nansha cìmwè cya ne wàkondopiibwa to; Wàkamba anu ne: “Bwa edi díyi, bwa edi díyi...”

²⁰ Hattie Wright, ditùkù adi, kààkalòmbakù yèyè cintu nansha cìmwè to. Úvwa musòmbè anu cyanàànà mwaba awu, kadi kwambayè cintu cijaalàme, cyàkasànkishà Nyuma Mwîmpè. Ki Nyuma Mwîmpè kwandamuna e kwamba ne: “Hattie, lòmba cintu kanà cyònsò cyùdi muswe, cyònsò cyùdi naaci cyùdi muswe aci. Jandùlàbi bwalu ebu ní mbulelèlè anyi ní kí mbulelèlè. Lòmba cintu kanà cyònsò (dyondopiibwa dya mwakùnyèndè wa bakàji uvwa mucìbùkile panshì musòmbè mwaba awu ne mubidi mudikòke wònsò; anyi ndola binunu dikumi bwa kùkadi ùya kuumbula biinà mu tukùnà mwàmwa to; anyi kumwalujulwila bunsongà ku mubidi wèndè mumanè kucyòkakana awu); cyònsò cyùdi muswe kulòmba aci, cìlòmbè anu patùdi twakulangana apa. Yèyè kàyi mulwe mukupèèshecì mpindyewu mene to, dìbà adi ndi mupròfetà wa mashimi.” Abu’s—abu’s mbwalu bwa dikèma, kí mmwòmò anyi?

21 Yesu mmwambe ne: “Ambilà mukùnà ewu...” Ne nwênù's nukàadi bumvwè ne—bwa bidì byenzèke abi; ki mudimu wà bwambi wutùdì munkaci mwa kubwelamù awu. Tukàadi bayè kule menemene mu njila mpindyewu. Abidi aa n’Dilwa dya Mukalenge Yesu. Nenku bidì bikèngela bwa twikalè ne diitabuuja dya dyambwibwa mu Ekeleeziya udi mwa kushintuludiibwa mu katanci, mu mubùnyì wà disù bwa kupàtuka kuya, bwa cyanààna katwàkuya to. Kadi kanùtácishikù meeji to, nedìikalèku. Nedìikalèku. Nenku pààbàndà bukolè bwa *ewu* ekeleeziya, necitwalè bânà bààbò; bukolè bwa *wàwa* ekeleeziya bùbànda, nebùtwalè bânà bààbò; bukolè bwa *wàwa* ekeleeziya nebùtwalè bânà bààbò bakwabo; pashìishe nekwènzèkè dibiikà dya ku lufù dya bònsò. Ne cyòci aci ki citùdì bindile.

22 Mpindyewu, kanùpu mwoyi to, twarta twà disambila mu dinda pa dībà mwandamukùlù too ne pa dībà mwandamukùlù ne tusunsa makumi asatu. Dībà adi ndi mbàkonka búngì bwònsò bùvwàmù abu, pashìishe bàlekela kwabanya twarta, ne bàalukila, ne bàsòmba (nwamònu anyi?), bwalu nebiikalè pàmwàpa bamanè kutwàbanya twònsò diine dībà adi, anyi búngì bwònsò butwikalà babiikile mu tótò atu mwaba kampànda abu. Nsongààlùmè ayi neyìjuukè, yìzobakajè twarta atu nwènù batàngile, dībà adi wèwè ukèba kàmwè, ukèba kàmwè, anyi cinyi cikwabo mushindu awu. . . Pashìishe pàndì mbwela, nèngìikalè anu. . . Mwaba wònsò wàmà Mukalenge bwa mèmè kubiikidila awu. . . Ne Yèyè mwambè ne: “Kùbiidikù to nansha kakese,” mèmè ncyàkubàbiikilakù to nansha kakese (nwamònu anyi?), anu cyònsò cidìku aci.

23 Nenku ndi. . . Mudimu wà bwambi awu wùkaadi anu munkaci mwa kwenda kujìmina wòwò mwine; kùdì cintu kampànda cya citàmbe bunene munkaci mwa kulwa. Vùlukàayi ne, mwaba awu ki wùdibi ne musangu wònsò wùtùci cyàmbiibwa pa cibumbà cya ku cyambilu eku anyi mu cyambilu emu, ne kacya cyòci kacitu cyanjì kupangilakù to. Nudi bavùlùke mudimu wà bwambi wà mu cyanza awu anyi? Nudi bamòne cyàkenzàwu anyi? Meeji a mu mwoyi, nudi bamòne cidici cyenzè anyi? Mpindyewu tàngilààyaaku eci: kwamba Dìyì, ne kumòna cidìDi dyènza. Nwamònu anyi? Ndi munwàmbile kaaba aka kùkaadi bidimu—ekeleeziya (Ndi ngambila beena tabernacle)—kùkaadi bidimu, kùkaadi bidimu bisatu anyi binaayi, cintu kampànda civwa pabwìpì ne kudìvwija cintu cya balenga ne byanza; cidì pabwìpì ne kwenzeka. Nenku’s ki cyòci eci mpindyewu munkaci mwa kubwayika bwa. . . Cidì munkaci mwa kudyàngacila mbùngakeenu. Mpindyewu, tudi ne kusàkidila bwa bwalu abu. Kaa, mushindu mwine wutùdì ne kusàkidila’s wè. Anu ne disànkà dya dìyiila ne panshì.

24 Mpindyewu, tudi ne ndambu wa nkonko ya mishilè ncyoncyoncyo mwab’ewu, ne tudi baswè kubwelamù buludì.

Muntu kampànda ùvwa mutàngile mikàndà yònsò yímvwà naayi eyi. Mémè kwamba ne: “Ee, muntu wa meeji matwè’s bidi bìmukèngela anu wùmwpèlè.” Kadi mémè ncyèna muntu wa meeji matwè to. Bidi bìkèngela ngiikalè naayi yàbùngì bwa kutàpamù dísù. Ee, ewu n’Diaglott, ne eci m’Bible, ne eci mmukàndà wà myaba yidì myakù. Pa nanku cìdi... Netùlombè anu Mukalenge bwa kutùkwàcisha ne kutùludika bwa kwandamuna ku nkonko eyi anu bilondèshile diswa Dyèndè dya Nzambi ne Díyi Dyèndè.

²⁵ Nenu mpindyewu, twinyikàayi mitu bwa katancì kakese cyanàanà bwa disambila. Mukalenge, tudi ne kusàkidila Kùdi byùmukila mu ndòndò wa mwoyi wètù bwa byÛdì mutwènzèle mu malòòlò asatu a ndekeelu aa. Kaa, pa kumòna bambi bàtwilàngàne mu cibambalu cya kuntu kwàka bèèlangana mwoyi ku cyanza, ne diitabuuja divwijulula dipyadiyà, ne—ne cidya cipyacìpyà cya dyela. Bàbìikila ku tèlèfonè... Ne myoyi yetu yicyònkómoka, ne bantu munkacì mwa kupeta Nyuma Mwímpè paanyimà pàà bamanè kwikala—kumòna Díyi Dyebe, mùdìDi dyamba anu menemene ku kantu ne ku kantu mùdì kupeta Nyuma Mwímpè Webè. Tudi ne kusàkidila kwàbùngì bwa cyòci aci, Mukalenge.

²⁶ Wèwè udi utùpeepejila maalu, bwalu tudi cisàmbà cya bupwekèle. Nenu tudi tulòmba, Nzambi, bwa—bwa Ûtùlekèlèku misangu yònsò tudìvwija anu bapwekèle menemene. Bwalu bidi... Mushindu wà muntu udi udìpwekesha awu nyèyè wabàndishiibwa. Ne lungènyi lwà pa buloba lùdi dikùtakana bwa Nzambi; kadi byàkasànkisha Nzambi bwa kusùngila aba bàdi bajimine ku dikùtakana dya diyiisha.

²⁷ Nenu mpindyewu, Taatù, ndi mwaba ewu ne nkonko yidì myediibwe byùmukila mu myoyi ya meeji matòoke yidì bwalu butonde. Ne lùmwe lwà ku yòyi lwòlò lwandàmùnyìibwe bibì ndufwànyine kukùpa muntu awu mu njila mubì, pa kwela bukènkè bubì pa lukonko lwèndè lùdi lùmutàcisha. Pa nanku Mukalenge Nzambi, ndi ndòmba bwa Nyuma Mwímpè Webè àlwekù pambidi pèètù ne àbuululèku bintu ebi, bwalu bàakafùnda mu Mifùndu ne: “Lòmbaayi nenùpetè, ne kèbaayi nenùpetè; kookòla nebàkunzùlwilè.” Nenu cyòci aci ki citùdi munkaci mwa kwenza mpindyewu, Mukalenge, tukookola ku ciibi Cyebe cya luse. Biimàne mu mundidìmbi wà bwakànè Bwebe bwa Nzambi, tudi tusèngeleela bwa Mashi a Kilisto wa Nzambi ne bwa Nyuma Mwímpè.

²⁸ Ne katwèna tulwa dilòòlò edi anu ne bwalu twàjikìjì malòòlò asatu a dilongesha pa Nyuma Mwímpè awu to, tudi tulwa ne kaneemu ne meeji matòoke bitàmbe kwikala bya ndòndò. Tudi tulwa byenzè bu ne ndilòòlò dya ndekeelu ditùdì bafwànyine kwikala pa buloba. Tudi tulwa biikàle twitabuuja ne Wèwè udi wandamuna ku masambila ètù. Nenu Mukalenge, tudi tuKulòmba mpindyewu bwa útùsànkishèku ne Mwoyi Wèbè wà

Cyendeleele. Ne ku dyandamuna dya Dìyì Dyebe, swàku bwa Nyuma Mwîmpè, Éyì Nzambi, bu mutwásangányi ne ng'Wèwè mwine munkaci mwetu, tudi tulòmba bwa Yéyè kutùbuulwilakù dilòòlò edi bintu bitùdi tujinga. Ne twètù tuvwa tujinga anu bwa ne misùukà yetu yikalèku mu diikisha, ne meeji ètù mu diikisha, ne biikàle ne diitabuuja mu Nzambi bwa kuya kumpàla bwa kunana mabènesha àtùYe mulayè. Tudi tulòmba nùnkù mu Dîna dya Yesu. Amen.

²⁹ Mpindyewu, ndi ne nkonko yònsò yìvwàbo bampèèshe, pa kuumusha lùmwèpelè. Nenku mwva mwandàmùne Mwanèètù Martin mwànà uvwa mungeelè lukonko dilòòlò dya dyàbwàbwa awu, anu lùmwèpelè cyanàànà. Kùvwa yàbùngì kaaba aka makèèlèlè dilòòlò, kadi àvwa mmalòmbà a masambila. Nenku Mwanèètù Martin mmungeelè lukonko pa Yone 3.16—anyì Yone 3, ngeela meeji, pa: “Muntu yéyè kàyi mulediibwe kùdi màyi ne kùdi Nyuma, kèna mwa kumòna Bukalenge to,” ne mucipàlakàje ne mukàbà wà mèyi wùmvwà mulòpòle pa Ebelù. Nenku mèmè kutwilangana nendè mu cibambalu cya paanyimà emu dilòòlò dishààle, ne—kumpàla kwa mèmè kupeta mpùngà wa kumwandamuna, nenku mèmè kumwandamunapù, pa cyena-bwalu aci.

³⁰ Mpindyewu, kùdikù muntu kaaba aka uvwa kàyipù makèèlèlè dilòòlò anyì? Twánjì tùmònaàyìbì byanza, bya bàvwà kabàyipù makèèlèlè dilòòlò. Kaa, twètù, tuvwa cya bushuwa mwa kujinga bwa nwìkalakù neetu. Tudi bapicile mu cikondo cya butùmbì cya dikèma. Nyuma Mwîmpè. . .

³¹ Ndi mufwànyine, bwa katanci kakese cyanàànà... Kacyàkutàpangana ku mwoyi to. Eci cidi cikwàciibwa pa mukàbà wà mèyi. Nenku bu byòbì mwa kwenzeka ne mwambi kampàndà—anyì muntu àbengè kutwà ku cyànyì pa bîndì pabwìpì ne kwamba mpindyewu ebi, anyì mene mu nkonko ayi, ndi ndòmba, mwanèètù, bwa kùlukù kwela meeji ne ncyà kacyi cyùmvwika nansha, kadi aci—ùvulukè ne mukàbà wà mèyi ewu wùdi munkaci mwa kukwàciibwa mu tabernacle wetù emu. Tudi tulongesha cisàmbà cyetu twètù. Bambi bààbùngì bàà miitabuuja mashiilèshiiilàngàne mbasòmbe mwab'ewu. Nenku ndi muswe kubwela cyàkàbìdi mu cyena-bwalu aci, bwalu kùdi bàmwè bàà ku bantu bèètù bàvwà bapangè mwa kubwela munda emu makèèlèlè dilòòlò bândì mmòna babwelè dilòòlò edi. Ne ndi muswe kukenketulula bwa katanci kakese cyanàànà, bu nwènù mwa kucingaanyishila, pa bîmvwà mwambè makèèlèlè dilòòlò abi; ne bivwa mpa Mpenta, pa dipeta dya Nyuma Mwîmpè.

Mpindyewu, ndi mbala mu *Emphatic Diaglott* wa nkùdimwinu wa cyena Ngelikà, mùmvwà makèèlèlè dilòòlò, udi mutèèka mubuulula kumpàla kwànyì mpindyewu ewu. Nnkùdimwinu wa ntwàdijilu wa kuumusha mu cyena Ngelikà kuya mu Anglais. Kacyèna cìpicila ku bakùdimunyi bakwabo, cidi—ne nkùdimwinu mikwabo to, cidi anu buludì kuumuka

mu cyena Ngelikà kuya mu Anglais. Mpindyewu, myakù ya Anglais, misangu yàbùngì yìtu ne muumvwija pàbìdì, mündi mufwànyine kwamba mpindyewu ne, *board*. Angàtaayi mwakù awu *board*. Udi mufwànyine kwamba ne: “Ee, ùvwa ùswa kwamba ne tuvwa *tumusuuya*.” To! “Kaa, yèyè—yèyè mmufutè *mfrangà ya byàkudyà* byèndè.” To! Ee, yèyè. . . “*Ndibaya* ku luseke lwà nzùbu.” Ee, nwamònu anyi? Anyi cìmwè cya ku byòbì abi. . . Kùdì myakù yinaayi anyi yitaanu mishìilàngàne yìdì mifwànyine kukwàciibwa naayi mudimu; bikèngela ùpetè cyambilu. Mwakù *see*. *See* mbwena kwamba ne “kuumvwa,” mu Anglais. *Sea* mbwena kwamba ne “mushiki wà màyi.” *See* mbwena kwamba ne “kutàngila.” Nwamònu anyi? Kadi mu nkùdimwinu eyi, mwakù wùdìbo bangàte mwab’ewu ewu, wùmvwà mwambè makèèlèlè dilòlò mu Byenzedi nshapità mwi² awu, mwaba wùdìbo bambè ne: “Ndìmi ya kapyà yàkasomba pa. . .” Mpindyewu, ndi muswe anu kwalukila anu paanyimà bwa katanci kakese. Nudikù baswe, katanci kakese cyanààna, kuwùtàngilula katanci kumpàlà kwa twètù kuya kutàmba kule anyi?

³² Mpindyewu, buulùlaayi, nwènù mu nkùdimwinu wenù wa Roi Jacques anyi mu yònsò munùdì nubala amu. . . Neku ndi muswe kucibala. Neku tèèlejàayi ne ntèmà yònsò mpindyewu. Kanwìkadi nwàvwa kucyùmvwà bibì to. Bààbùngì leelu ewu, nansha mwakunyaanyi wa bakàji mwine, bààbùngì bàà kùdìbo mbabiikile, bambè. . . Màmamù Morgan. . . Bààbùngì bàà kùdìbo bàvwamù makèèlèlè dilòlò. Màmamù Morgan ngumwe wa ku bàna beutu bàà bakàji bàvwàbo balekèle; ne yèyè ùvwa pa dibèjì dya mènà a bàkaavwà bafwè kànsèrè mu Louisville kùkaavwa bidimu dikumi ne bisambombo, anyi dikumi ne mwandamutekètè. Ngeela meeji ne mmusòmbe cyàkàbìdì paanyimà apa dilòlò edi. Kàvwa mwa kuumvwa to, mwàmbye, bwalu mvwa ngaakwila buludi ku cikòkokolo. Ne bwa bwalu bwabo bòbò ndi muswe kwambululakù cyòci eci bwa katanci kakese.

³³ Mpindyewu, ndi mbala mu Mufundu wà Byenzedi 2 ewu:

. . . *pàakakùmbanà ditùkù dya Mpenta, bàvwa bònsò* mu meeji *àmwè*. . . (Mpindyewu, ntu muswe aci kutàmba dîyi dimwe: bwalu nudi bafwànyine kwikala dîyi ne dimwe pa ciibùngì cya byena-bwalu, kadi apa meeji àbò àvwa àmwè). . . meeji *àmwè* ne *mu kaaba kàmwè*.

Nenku dyàkàmwè kwàkalwa cyonà cìfùmìne mu dyulu cyenzè bu cipeepèlè cìkolè cya civuma, ne cyàkùuja. . . nzùbu mujimà mùvwàbo basòmbèle. (Kabàyi batwè binù, bàsambila to, kadi basòmbe). . .

. . . *Ndìmi* mipandùlùke. . . (N-d-i-m-ì—ndimi. “Mipandùlùke” mbwena kwamba ne,

“myabùlùke.”) . . . Ndìmì . . . yàkabàmwènekela . . .
myenzè bu . . . kapyà, ne lùm wè . . . (“Lùm wè,” ku
 bùm wè) . . . lwàkasòmbela *pa yònsò wa kùdìbo.*

Ne bònsò bààkuujiibwa tètè . . . (“Ne,”
 mutwàngaji.) . . . *bònsò bààkuujiibwa tètè ne Spiritù*
Mwìmpè, ne bààkabanga kwakula mu myakulu
mikwabo, mùvwà Nyuma ùbàpèèsha mwa kwakula
amu.

Mpindyewu *kùvwa beena Yudà basòmbèle mu*
Yelusàlè mǎ, bantu badìfìle ne kasukì, bafùmìne mu
ditùngà ne ditùngà dyònsò mwinshì mwa dyulu.

. . . *pàvwà cyòcì eci . . . ne mulubù ewu*
pàakatanggalakàwu, musùmbà wàkadisanga, ne
bàvwà mu dipampakana, bwalu . . . yònsò wa kùdìbo
wàkumvwa ne . . . yèyè wàkula mu mwakulu wèndè
wàkamulelèbo.

³⁴ Mpindyewu mǎnaayi! Pààkalwà kapyà aku, cìvwa nndimì;
 pàvwàbo bààkula, cìvwa mmwakulu. Mpindyewu, kùdì
 dishiilangana dinènaanènààlè pankacì pàà ndimì ne myakulu.
 Bwetu twètù’s byònsò bìdì anu bya mwomùm wè. Kadi, mu
 cyena Ngelikà, “ludimì” mbwena kwamba ne ng’eci nùnkù.
 [Mwanèètù Branham ùdì ùleeja—Muf.] Dìcì ng’eci. Nwamònu
 anyi? Aci kaciyèna cìswa kwamba mwakulu to; cìdì cyùm vwiya
 citùpà cya mubidì wèbè cìdì ludimì aci. Nwènù bamòne bìmpè,
 mbacyàndàmùne ne *ndimì ya kapyà* cìdì cyùm vwiya ne “bu
 ndimì,” anu mùdì ludimì lwà kapyà amu, ludimì luleepa lwà
 kapyà. Mpindyewu, tàngilàayi disùminyina adi mpindyewu. Ne
 wònsò wà ku myaba ayi mpindyewu, kanùwùpu mwoyi to.

³⁵ Mpindyewu, netwikalè mwa kufila kaadinàya kakese
 dilòòlò edi. Nenku nèngìikalè mwa kunùlekeelacì. Mpindyewu
 vùlukàayi ne, cintu kampànda cyòcì cibèngangana, aci
 ncikutàngìle wèwè. Kadi mushindu wùm wèpelè wùdiku muntu
 mwa kupeta cintu kanà cyònsò kùdì Nzambi nku diitabuuja. Ne
 kumpàlà kwa wèwè kumòna mwa . . .

³⁶ Bìdì bikèngela mmanyè cìndì ngenza kumpàlà kwa mèmè
 kupeta diitabuuja mu cìndì ngenza aci. Udi musèle mukàjèèbè
 awu bwa cinyi? Uvwa ne diitabuuja mu yèyè. Ukààvwa
 mumuteetè, mumujoojè, mumòne ne nku cimyi kùvwàye
 mufùme, ne yèyè ùvwa nganyi. Bìdì nanku awu ne Mufùndu,
 ne Nzambi. Kì cìdì cyèenza bikèènà-kumòna ebi, Dikunji dya
 Kapyà edi—edi, bintu byònsò ebi, bwalu Nzambi wàkabilaya.
 Nzambi ngudi mwambè nanku. Mèmè nkààdikù muMuteetè ku
 Dìyi Dyèndè ne mmanyè ne Didi Bulelèlè. Nenku londàayi
 Dìyi Dyèndè. Dìbà adi kwòkò kwikàle kaacibwejàkàjì kakese
 mwaba kampànda, dìbà adi kùdì cintu cipampàlamùke mwaba
 kampànda. Bwalu Nzambi (tèèlejàayi!)—kacya Nzambi kàtukù
 mwanji kwenza anyi kàadyàkukwàtakù mudimu pambèlù pàà

mikenji Yëndè Sungasunga—anyì bibèngàngàne ne mikenji Yëndè Sungasunga nansha. Muvù wà mashika kawàkulwakù mu muvù wà luuyà to, ne muvù wà luuyà kawàkulwakù mu muvù wà mashika to. Mabèji kaàkupòòpokakù mu muvù wà bintu bitòloka ne kwalukila mu muvù wà mabèji àpòòpoka to. Kwèna anu mwa kwenza nanku to.

³⁷ Mûngâmbì makèlèlèlè dilòlò bwa mushimì wà mâyi a kazeze, mwikàle wela mâyi ku bikùnyìlbwà byebe. Anyì wèwè mwimàne mwab'ewu munkaci mwa budimi, ne kwikàle mîdimà ya menemene, wèwè kwamba ne: “Kaa, nzembu minene, ndi mumanye ne udi mu mpàta emu. Mpindyewu, nyewu ndi mujimìne, nciyi mumanyè kûnyaayà to. Fìlakù bukènkè, bwa mmonèku mwa kwenda! Kùdi nzembu bùngì bukùmbàne bwa kukenkesha mu mpàta emu mwònsò.” Aci ncyà bushuwa. Eyowa's, mukalenge! S'kùdi nzembu bùngì bukùmbàne mu cibambalu emu bwa kumùkenkesha nansha kakùyì makènkè awu, kakùyì aci to. Kadi's bìdi bìkèngela bwa wèwè kuyìlombola. Mpindyewu, udi mufwànyìne kwelela cyòci aci mbilà mikolè too ne muwikalà kùciyikù mwa kwela kabidi mbilà to, kacyiyikù mwa kukenkesha to. Kadi wèwè mwenzè bilondèshìle mikenji ya nzembu, dîbà adi's neùpetè bukènkè.

³⁸ Ee, ki mushindu wumwewumwe wùdibi ne Nzambi. Nzambi m'Mufùki munene wa maulu ne buloba, umwèumwè awu makèlèlèlè, leelu, too ne kashidi. Yèyè ùcìdi anu Nzambi. Kadi Yèyè neàkwatè mudimu anu paùdi ulonda mikenji ne dileeja Dyèndè dya njila. Balundà bàanyi, ndi ngamba nùnkù: Kacya nci tukù mwanji kucimòna cipangile to, ne kacyàdyàkupangilakù to.

³⁹ Mpindyewu, tùmònààyìbì. Yesu mu Luukà 24:49 wàkatùma bapostolo ne mudimu paanyimà pàà bòbò bamanè kusùngidiibwa ne kujidiibwa bilondèshìle Dìyi; babingìshìibwe mu kwitabuuja kwa Mukalenge Yesu; bajidiibwe mu Yone 17.17 pàakambà Yesu ne: “Bàjidilè, Taatù, ku Bulelèlè. Dìyi Dyebe ki Bulelèlè.” Ne Yèyè ùvwa Dìyi.

⁴⁰ Mpindyewu, kubàpèèsha bukolè bwa kwondopa babèèdi, kwipata baadémons, kujuula bafwè; ne bàakaalukila bènda bàcyònkomoka. Ne mènà àbò àvwa mu Mukàndà wà Mwoyi wà Mwànà wa mukooko. Nwènù's nudi bavùlùke mutùdi balongè cyòci aci mpindyewu. Kadi kabàvwa banji kwikala bakùdimùne mucimà to. Yèsu wàkambila Peetèlò bufùkù bwa dipoopediibwa Dyèndè dya pa nkùrusè, Wàkamba ne: “Paanyimà pà wèwè mumanè kukùdimuna mucimà, dîbà adi ùkankamikè bânà beenu.”

⁴¹ Nyuma Mwîmpè ùdi cìdì... Udi witabuuja bwa Mwoyi wà Cyendelele, kadi pàdi Nyuma Mwîmpè ùlwa Yèyè ngudi Mwoyi wà Cyendelele. Udi witabuuja bwa... Udi mwimita kùdi Nyuma ku dijidiibwa, kadi kwènaku mwanji

kulediibwa kùdì Nyuma to anu pàdì Nyuma Mwîmpè ùbwelà. Neya bushuwa. Mwânà ùdì ne mwoyi mu difù dya maamù, tuumisunya tukese atu tùzakalala; mmwoyi kampànda awu. Kadi mmwoyi mushiilàngàne pàdiye wèyela mweyelu wà mwoyi mu tuumimpèmpè twèndè amu. Mmwoyi mushiilàngàne. Ki cidì bwalu ncyôci aci, cidì . . .

⁴² Mwanètù munanga Méthodiste, ne Pèlerin de la Sainteté, ne Nazaréen, dibàtiiza dya Nyuma Mwîmpè ndishiilàngàne ne dijidiibwa. Dijidiibwa ndikezudiibwa, didì dilongolola dya Mwoyi. Kadi pàdì Nyuma Mwîmpè ùlwa, Yèyè ki Mwoyi. Dilongolola ndisukula dya dibùngù; Nyuma Mwîmpè ndyuja dya dibùngù. *Dijidiibwa* mbwena kwamba ne “musukula ne mutèeka ku luseke bwa mudimu.” Nyuma Mwîmpè nkucitèeka kwa mu mudimu. Wèwè udi dibùngù didì Nzambi musukùle.

⁴³ Ne tudi tusangana ne Nyuma Mwîmpè n’Nzambi Yèyè mwine munda mwebe. Nzambi ùvwa kumutù kwebe mu Dikunji dya Kapyà ne Mòsà. Nzambi ùvwa neebe munda mwa Yesu Kilisto. Mpindyewu Nzambi ùdì munda mwebe mu Nyuma Mwîmpè. Kaciyi nzambi yisatu to, Nzambi umwèpelè ùkwàta mudimu mu midimu yisatu.

⁴⁴ Nzambi ùpweka milongo, ùpweka ùmuka kumutù kwa muntu. Muntu kàvwa mwa kuMulenga to, bwalu wàkenza mpekaatu mu budimi bwa Edènà ne wàkaditàpupula ne bwobùmwè Bwèndè. Dìbà adi cyàkenzekà ncinyi? Byàkakèngela bwa kwikalaYè kumutù kwèndè. Mashi a bimpàngà bya ngombe ne a mbùji kàvwa mafwànyine kuMulekela wènza cyàkàbidì bwobùmwè ne muntu to; kadi ku mikenji ne mèyi, biikàle bìleeja mu mundidimbì cikondo cìvwà cìlwa eci, cya dilàmbula dya bimpàngà bya ngombe, ne bikwabo, ne mikooko . . . Pashiishe pààkapwekà Nzambi ne kusòmbela mu mubidi mujidila, mulela kùdì mukàjì virgo, bwa Nzambi Yèyè mwine . . . Nudi bamanyè cyàkenzà Nzambi anyi? Yèyè—Yèyè kààkenza cintu nansha cimwe to pa kuumusha . . . Wàkatèeka Ntentà Wèndè munkaci mwa yetu twètù. Nzambi wàkasòmbela mu Ntentà wàkabiikidiibwa ne n’Yesu Kilisto. KwasaYè anu Ntentà Wèndè pàmwè neetù, kulwaYè . . . (Nèngikalè—mwa kuyiisha pa cyôci aci mu dinda, pa nanku mbîmpè ncilekèle nanku.) Mpindyewu, aci—mwàkaasà Nzambi ntentà anyi kusòmba pàmwè neetù . . .

⁴⁵ Nenku mpindyewu Nzambi ùdì munda mwetu. Yesu wàkamba mu Yone 14 ne: “Mu ditùkù adi nenùmanyè ne Mèmè ndi munda mwa Taatù, Taatù munda Mwànyì, ne Mèmè munda mwenu, ne nwènù munda Mwànyì.” Nzambi munda mwetu. Kiipàcilà kàvwa cinyi? Kukumbaja ndongamu Wèndè.

⁴⁶ Nzambi ùvwa ne ndongamu kampànda. Ùvwa muswe kukwàcila mudimu munkaci mwa bantu, ne Wàkawùtwàla mu Dikunji dya Kapyà, divwà Kapyà kàà kakàyi kùmvwika kàvwà kalembèlèle kumultù kwa bânà bàà Izaleela aku.

Pashiishe Kapyà kàmwèkàmwè aku kàakamwèneshiibwa mu mubidi wà Yesu. Ne Yèyè wàkamba ne Ùvwa kiine Kapyà aku ne: “Kumpàlà kwa Abraham kwikalakù, NDI.” Yèyè ùvwa Kapyà aku. KwambaYè ne: “Ndi mufùme ku Nzambi, ne Ndi ngaalukila ku Nzambi.” Ne paanyimà pàà lufù, dijiikiibwa, ne dibiiikà Dyèndè dya ku lufù, Pòlò Munsantu wàkatwilangana Nendè mu njila—pàcivwà dîná dyèndè Shawùlà apu—mu njila wa ku Damàsèkè, nenku Yèyè ùvwa mwalùkile cyàkàbìdì ku Dikunji dya Kapyà adi. Bukènkè bwàkamufomija mèsù. Ncya bushuwa.

47 Kadi’s ki Yèyè ewu leelu ewu, Dikunji dya Kapyà òmòwèdìmwè adi, Nzambi umwèumwè awu mwikàle wèza bimanyinu bimwèbimwè abi, byenzi bimwèbimwè abi. Bwa cinyi? Ùdi munkaci mwa kukwàta mudimu munkaci mwa bantu Bèndè. Ùdi munda mwetu. Mèmè. . . Ùdi neenù mpindyewu, “kadi Mèmè nèngiikalè munda mwenu. Nèngiikalè neenù, munda mwenu mene, too ne ku ndekeelu kwa dikumbana dya maalu ònsò,” nshìikidilu wa buloba. Yèyè ùvwa mwa kwikala neetù.

48 Mpindyewu, mònaayi. Yesu wàkabàtùma ne mudimu bwa kubàndabò ku Yèlusàlèrà ne kwindila. Mwakù *kujànguluka* mbwena kwamba ne “kwindila,” kî mbwena kwamba ne kusambila to, mbwena kwamba ne “kwindila.” Kabàvwa banji kukumbana bwa kuyiishabò to, bwalu bàvwa bamanyè dibiiikà Dyèndè dya ku lufù anu ku Mupersona Wendè, ku diMumònà dya pambèlupambèlu. Yèyè—Yèyè wàkabàtùmina dîyi bwa kabàyiishi kabidi to, kabànji kwenza cintu nansha cimwe to too ne pàvwàbò mwa kwanji kuvwàdikiibwa ne Bukolè bwa ku dyulu.

Ncyèna ngiitabuuja ne muyiishi mmutùmiibwe kùdi Nzambi anyi ùdi mwa kujidiibwa mu mushindu mwímpè mu mudimu wà bwambi. . . Bwalu Nzambi kèna ne mikàlu to. Ne cidi Nzambi wèza musangu wumwe aci, Yèyè ùdi ùcyèna dîbà dyònsò. Mpindyewu, piikalàbi ne Nzambi kàakaswa kubàlekela bàyiisha anu too ne pàvwàbò mwa kuya ku Mpenta ne kupetabò dilabula dya Mpenta, muntu nansha umwe, ambà anu mudyènzèle mu yèyè ku dijinga kampàndà dya ndòndò anyi bulongolodi kampànda bumutùme’s, kènàku ne bukenji bwa kubànda mu cyambilu to pàdiye kàyi mùle tètè ne Nyumà Mwímpè. Aci ncyà bushuwa menemene. Bwalu ùdi ùbàlombola ku didifwikakajila dya mu meeji a mu mutù dya bulongolodi kampànda pàdiye kàyi mùle tètè ne Nyumà Mwímpè to; ne pashiishe, mpàdiye ùbapèesha cyàkudya cya nkuci; *Mwànà Wa Mukòòkò Nè Nkuci*, mutùvwà bacýàmbè makèlèlèlè dilòlò amu.

49 Mpindyewu mònaayi. Yèyè wàkamba ne: “Nùbandè ku Yèlusàlèrà ne nùshaalèku; nwindile anu cyanààna kuntwaku too ne pàNgàatùmà mulayi wà Taatù.” Nenku dîbà adi,

cyàkenzàbo ncinyi? Bàvwamù lukàmà ne makumi abidi, balùme ne bakàji. Bàakabwela mu cibambalu cya kuulu mu ntempèlù.

Mpindyewu, ditùkù dya Difestò dya Mpenta dikaavwa dyènda diseemena, kuumukila ku dikezula dya ntempèlù, dishebeya dya mwànà wa mukooko wa paasàkà too ne—ne ku dilwa dya Mpenta, uvwa mamuma a nzànzànzà a dinowa, cibilù cya disànka, cibilù cya disànka cya Mpenta. Nenku pa nzùbu. . .

⁵⁰ Mpindyewu, mémè nkààdikù mukafikè mu matùnga awu. Matùngà a kùdì díbà dipàtukila mmpùùkàpùùkà bwa kwikalawù ne cibàndilu cya munda mwa nzùbu. Cibàndilu cìvwa pambèlù. Pambèlù pàà ntempèlù, mudìbo batùlondèle, kùvwa cibàndilu cìvwa cìfila ku kaacibambalu kakese kuntwaku; udi ubànda, ubànda, ubànda, too ne paùdi ukafika mu kaacibambalu kakese kuulu aku, kenzè bu diyeebà ku lusongo lwà ntempèlù aku, kaacibambalu kakese kàà mushindu kampànda, kaacibambalu kàà kuulu. Ne Bible mmwambe ne bàvwa muntwamu ne biibi bìvwa bikànga, bwalu bàvwa ne bwòwà bwa beena Yudà, bwalu bàvwa bafwànyìne kubàsùnsulula bwa dikuukwila dya Mukalenge Yesu, paanyimà pàà Kaayifà mwakwidi munene awu, ne Ponsiyo Pìlaatù, ne bakwabo abu bamanè kuMushebeya. Mushindu awu bàvwa bàtùùkakanakù ne beena Kilisto bònsò bàà ku dìnà abu. Nenku biibi bìvwa bikànga, ne bòbò bàvwa munkacì mwa kwindila.

⁵¹ Mpindyewu, mu bibambalu bya nanku awu abi, kakùtu màdìdiishì to. Màdìdiishì àvwa ntuntu tukese tucyàmakaja twènzè bu tuubiibi nanku, tùvwàbo bàkòka bwa kuunzulula. Mu bibambalu amu mùdì tuumyèndù tukese twà màfutà a mabengu tukùdika ne twikàle tùteema. . . Ní ukààdikù mufikè mu Californie ku Cafétèria kàà Clifton, pwèkà mu nzùbù wa mwìnshì mwa buloba amu, neùsanganè cimwè cya mushindu awu menemene, wà cibambalu cya kuulu aci. Kacya nukààdikù bakùfikè anyi? Mbanganyi mwab'ewu bàkaadiku bakùfikè? Ndi mmòna bantu bàshikula mitù. Ee, nudi bamanyè cìndì ngamba aci. Eyo. Ùpwèkè muntwamu, neùmone Lupangu lwà Getsèmànè; kumpàlà kwa aci, neùbwelè mu cimwè cya ku bibambalu bya kùdì díbà dipàtukila abi. Aci ncilelèlà menemene. Udi usanganamù kaamwèndù kakese kuuja tètè ne màfutà a olèvà ne kaamukùsù kàà cilàmbà katèèkamù, kàteema.

⁵² Mpindyewu, twàmbè ne bòbò bàvwa kuulu aku, babàndile pa cyòci eci lwà pambèlù. Bàvwa babànde muntwamu bakasokòme, bwalu bàvwa ne bwòwà bwa beena Yudà. Yesu kàvwa mubàmbìle bwa kuyabò mu cibambalu cya kuulu to. Ùvwa mwambe anu ne: “Nwìndilè mu Yelusàlèmà.” Bu bòbò mu nzùbu kampànda panshì apu, s'bvwa bikolè bwa kumanya cìvwa mwa kwenzeka. S'bvwa mwa kubwelamù ne kubàkwàta. Pa nanku kuyabò mu kaacibambalu kakese kàà kale mu nzùbu wa kuulu, muulu menemene amu mu cisàsà, nenku mwòmò amu, bakànge cibambalu aci mu mushindu wa beena Yudà kabàyikù

mwa kubwela mùvwàbo amu to. Ki kusòmbabò muntwamu bindìle munda mwa matùkù dikumi.

⁵³ Mpindyewu, mpindyewu, tudi mu Byenzi 1. Mpindyewu, tèèlejààyaaku ne ntèmà yònsò mpindyewu. Nwamònu cimfwànyì aci anyi? Pambèlù pàà nzùbu awu kaacibàndilu kakese aku kàvwa kabànde, ne bòbò bàvwa babwelè mu kaacibambalu kakese aku amu. Panshi mu ntempèlù amu bàvwa munkaci mwa kwenza Difestò dya Mpenta. Kaa, s'kùvwa maalu manene munkaci mwa kwenzeka. Mpindyewu, ditùkù dya Mpenta pàakakùmbanàdi, bàvwa bònsò ne meeji àmwè, meeji àmwè, biitabùùje ne Nzambi ùvwa ne cya kutùma mulayì awu. Muntu ne muntu mwab'ewu àbwelèku mu meeji àmwèàmwè awu dilòlò edi ne àmonèku cidi cyènzekà. Cidi ne cya kwenzuluka. Mmulayì anu wumwewumwe wùvwàbo bòbò nawu awu. Nwamònu anyi?

⁵⁴ Cìvwàbo bènta ncinyi? Bàlonda dileeja dya njila, bàlonda mi—mi—mikenji ya Nzambi ya ne: “Nwìndilè too ne. . .”

⁵⁵ Mpindyewu, bàvwa ne bwòwà bwa beena Yudà. Mpindyewu, vùlukààyi aci. Bàvwa ne bwòwà bwa beena Yudà. Mpindyewu, dyàkàmwè kulwakù cyonà cyenzè bu cipeepèlè cya cìvuma. Kacìvwa cipeepèlè cya cìvuma to; cìvwa bu cipeepèlè cya cìvuma. Nèmbalè tuumaalu twà dyela nsèke mu ndambu wa tusunsa emu pa mukùdimunyi awu. Cìvwa bu cipeepèlè cya cìvuma. Mu ngaakwilù mukwabo, cìvwa ncipeepèlè cya citàmbe mfùkulu (kaa!), cintu kampàndà cìvwàbo mwa kuumvwa pambidi's. Cipeepèlè aci cìvwa munda mwabo. Kwàkalwa ci—cipeepèlè cya cìvuma, cyenzè bu cipeepèlè cya cìvuma. Cipeepèlè aci kacìvwa cìvuma to, kadi cìvwa cyùmvwika anu bu cipeepèlè cya cìvuma, cyenzè bu cintu kampànda cya cyènta ne: Hyu! Kacya nukààdikù bacyùmvwè anyi? Kaa, ekelekele! Cyenzè bu cipeepèlè cya cìvuma. Mpindyewu tângilàayi. Nenu cyàkuuja. . . Mpindyewu, mwómò emu ncyambè ne “mujimà,” kadi mu cyena Ngelikà mbambè ne “Mujimà (M-u-j-i-m-à ne dileetà dinene), Nzùbu Mujimà,” myaba yònsò munda amu. Mutanta wònsò, ditumba dyònsò, kaamutanta kakese kònsò kàvwa kàmwèke anu kuujìbwe naaci. Kabìyi bya dyamba ne: “Ambàayi túng, Bàna beetu, nudikù bumvwè cìndi mèmè muumvwè eci anyi?” to. To! Cìvwa mmyaba yònsò, bu cipeepèlè cya cìvuma. Mpindyewu tângilàayi. “Kwàkalwa cyonà bu cipeepèlè cikolè cya cìvuma ne (mutwàngaji. Mpindyewu tabaleelàayi miine ne ayi. Bwa cyanààna, nudi nuCyàmbishisha cintu kampàndà cidiCi kaciyi cyàmba to. Nwamònu anyi?)—ne bu (cyàkenzèkà kumpàla cìvwa ncyonà, cintu kampànda bu cipeepèlè cya—cya cìvuma cilwè pambidi pààbò)—ne (nudi bavùlùke ne, makèlèlè dilòlò mvwa muye ku cisùmbishidi cya byàkudyà ne mèmè kusùmba mulungu wà dyàmpà ne munyìnyì. Ncintu cìvwa cyendè naadi. Dyàmpà ncintu, munyìnyì ncikwabo ncintu. Nenu cyonà cìvwa ncintu

cìvwà cibàlengè)—ne kwàkamwènèka kùdìbo, (kumpàlà kwabo) ndimì—ndimì mipandùlùke.”

56 Kùdikù muntu mwab’ewu ukààdi mumòne *Mikenji Dikùmì* ya Cecil DeMille anyi? Nuvwakù bamòne pàp’vwa Mikenji ayi munkaci mwa kufùndiibwa anyi? Mwakàcikwàtàyè mwine’s, ncìvwa mumanyè to. Kùvwa bintu bibidi anyi bisatu bìm’vwa mumòne muntwamu bingààkanangà cya bushuwa. Cintu cya kumpàla mbukèn’kè bwa diikala ditwile dya màyi a matàmbà abu, ki mùdi mmwènèkelu waCì menemene. Nwamònu anyi? Cikwabo cintu cìvwa mpààkafùndiibwà Mukenji awu apu, ne paanyimà pàà cimanè kujika, nuvwakù bamòne tupyà tùvwà tùtùuka ku Dikunji dinene dya Kapyà adi atu, ne kùvwà tuundimì tukese twà kapyà tùtùukakù anyi? Nuvwakù bamòne aci anyi? Mpindyewu, ki cìndi ngeela meeji ne ncìvwàku dya Mpenta. Kwàkabàmwènèkela. . . Mu mushindu wà ne bàvwa mwa kuCimòna. Kì mbambè ne: “Yàkamata munda mwabo” to. Kadi kwàkabàmwènèkela ndimì (mutwàcibìikilà), ndimì, bu ludimì mùdi ludimì *elu*, mmwènèkelu wa ludimì ewu, ludimì lwà kapyà. Mpindyewu, dicì—mùngàmbì, dicì ndici; munu mmunu. Munu kawèna wùmvwija ne udi mucyùm’vwè to; cici cyùm’vwija ne cìvwa ne mmwènèkelu wa munu. Ne byòbi ne cìvwa ndici, kacyèna cyùm’vwija ne bàakacyùm’vwa to; cìvwa ne mmwènèkelu wa dicì. Eci cìvwa kapyà kàvwà ne mmwènèkelu wa ludimì, kacyi muntu kampàndà wàkula to, kapyà kàvwà ne mmwènèkelu wa ludimì.

57 Mpindyewu, tèèlejàayi. Tàngilàayi mùdi cyena Ngelikà cicyàmba kaaba aka:

Ne ku dyàkàmwè kwàkalwa cyonà. . . cyenzè bu cipeepèlè cicolè cya cìvuma. . . (Mvensà mwi3—mwi3.)

Ne ndimì myabùlùke *yàkabàmwènèkela*,. . . (Kabiyi ne ndimì myabùlùke yìvwa munda mwabo, anyi ne bòbò bàvwa bààkula ne ludimì lwabùlùke to; cìvwa ndimì myabùlùke yàkabàmwènèkelà. Mpindyewu, tàngilàayi. Kì nCyanji kwikala pambidi pààbò to. Cìdikù mu cibambalu amu, cinyùngùlùka eku ne eku bu cipeepèlè eci). . . *kùdìbo*. . . *cyenzè bu*. . . *kapyà*. . . *ndimì* myabùlùke. . . *yàkabàmwènèkela*. . . (aci nkumpàla kwabo) *cyenzè bu*. . . *kapyà*, (ndimì myenzè bu kapyà) *ne lùm’wè* (ku bùm’wè) lwàkiikila pa *yònsò wa kùdìbo*. (Kabiyi ne lwàkabwela munda mwabo to; lwàkiikila pamutù pààbò.)

58 Mpindyewu, mònaayi mùdi Roi Jacques mufwànyine kusàka aci ku luseke: “Ne ndimì mipandùlùke yàkalwa pamutù pààbò, anyi yàkiikila (tudi tucibala bishi mu Roi Jacques amu?) yàkasòmba pamutù pààbò.” Nwamònu anyi? Mpindyewu, kayìvwa mifwànyine kubànda muulu mwàmwa kadi kusòmba to. Aci tudi bamanye. Kadi nkùdimwinu wa ntwàdijilu

mmwambe ne: “Lwàkiikila pamutù pààbò,” ngeela meeji; kî mmwômò anyi? Lekèlaayi ncivwijè mu cyôci menemene. Eyowa! “. . .yàkiikila pamutù pàà yônsò wa kùdìbo.” Ludìmi lwa kapyà lùmwe lwàkiikila pamutù pàà yônsò wa kùdìbo. Nwamònu mwaba awu anyi? Nudi nucyùmva anyi? Aci ki cintu ciibìdi cyàkenzekà. Cya kumpàla civwa ncipeepèlè, pashiishe dimwènèka dya ndimi ya kapyà.

⁵⁹ Civwa mmu kaacibambalu kakese aka kàvwà ne tuumyèndù tukese tùvwà tùteema ne màfutà a mabengu etu. Elààyiibi meeji ne bôbò bàvwa basômbe kuulu aku. Ne umwe wamba ne: “Kaa!” Ùtàngila mu cibambalu cijimà amu; civwa mu cibambalu cijimà amu. Dìbà adi kwambabò ne: “Tàngilàayi!” Ndìmi ya kapyà yàkabanga kulwa mu nzùbu mujimà amu. Mpindyewu tàngilàayi. Ne kwàkamwènèka ndìmi ya kapyà eyi.

Mpindyewu tàngilàayi cìdi cìlondà:

Ne (Mutwàngaji mukwabo; cintu kampànda cikwabo cyàkakenzeka.) bààkuujiibwa bônsò tètè ne Nyuma Mwìmpè, . . . (Cintu ciibìdi cyàkenzekà.)

⁶⁰ Mpindyewu môngaayi, twètù tudi baswe kushintulula aci bwa kwambacì ne: “Bàvwa ne ndìmi ya kapyà, ne kaaba aka bàkukumina; ne pashiishe bààkapàtuka ne bààkabanga kwakula mu mwakulu mwenyi.” Cintu bu nanku kaciyènakù mu Mifundu to, mulundà wanyi. Muntu kanà yônsò udi wakula mu mwakulu mwenyi dìbà dya kupeta kwa Nyuma Mwìmpè aci cìdi cìbèngangana ne Bible. Nenku nènnùleejè mu tusunsa tukese etu ne nnùjaadikila ne mèmè ntu ngiitabuujà dyakula dya mu myakulu myenyi, kadi kabiyi pa dipeta dya Nyuma Mwìmpè nansha. Aci ndipà dya Nyuma Mwìmpè. Nyuma Mwìmpè n’Spiritù.

⁶¹ Mpindyewu tàngilàayi. Ndìmi eyi yìvwa mu cibambalu amu myenzè bu kapyà, ne yàkasòmba pamutù pàà muntu yônsò. Dìbà adi bààkuujiibwa tètè ne Nyuma Mwìmpè (cintu ciibìdi), ne pashiishe, paanyimà pàà bôbò bamanè kuujiibwa tètè ne Nyuma Mwìmpè, bààkaakula mu myakulu, kaciyi mu ndìmi to, mu myakulu. Nukààvwakù bamòne aci anyi? Bààkabanga kwakula mu myakulu mikwabo bilondèshile mùvwà Nyuma mubàpèeshe mwa kwakula. Mpindyewu, mutooyi ewu wàkuumvwika too ne pambèlu.

⁶² Mpindyewu tàngilàayi. Mpindyewu, twàngatàayi cyàkàbìdi cifwànyikijilu aci bwa kanùlu kucipwa mwoyi to bwa mpindyewu. Bilondèshile Mufundu awu, bôbò mu cibambalu cya kuulu bindile, dyàkàmwè cyonà cyenzè bu cipeepèlè cikolè cya civuma, civwà pamutù pààbò; civwa n’Nyuma Mwìmpè. Mbanganyi bàdì biitabuujà ne aci civwa ndimwènèka dya Nyuma Mwìmpè? Cyenzè bu cipeepèlè, cipeepèlè citàmbe mfùkilu. Dìbà adi kumònabò. Nenku mwaba awu kùvwa tundimì tukese twà kapyà, twòtò atu lukàmà ne makumi abidi,

ne kubangatù kupweka ne kusòmbatù pamutù pàà yònsò wa kùdìbo. Cìvwa ncinyi aci? Cìvwa ncinyi aci? Dikunji dya Kapya, divwà Nzambi Yéyè mwine kàdi munkaci mwa kuDyàbanya kùdì bantu Bèndè, ùbwela munda mwa bantu. Yesu ùvwa ne cintu cyònsò mu kaabujimà; Yéyè ùvwa ne Nyuma kàyi mupima to; twètù tudi tuMupeta mutùpimina (Nudi numòna cìndi muswe kwamba aci anyi?), bwalu twètù tudi bânà bapyàna. Mwoyi Wèndè—Mwoyi Wèndè wà Cyendeleele nguvwa wùbwelà awu. Mpindyewu, cyàkenzekà ncinyi? Dìbà adi bònsò bààkuujiibwa tètè ne Nyuma Mwìmpè.

⁶³ Mpindyewu, ndi muswe nnùkonkèku cintu kampànda. Manungànyì awu àkabanga dìbà kaayi? Pìikalàbi ne byàkakèngela bwa kupàtukabò mu cibambalu cya kuulu aci bwa kutùlukilabò ku bibàndilu abi ne kupàtukilabò mu mbàlandà wa nzùbù wa bukalenge awu amu—anyi mu—mbàlandà wa ntempèlù amu, uvwa pàmwàpa mu ntàntà wa kupita mìsèèsù yibidi ne mwaba wùvwàbo bàsanganyibwa, mu nzùbù wa kuulu awu ne pànshì, pambèlu mu mbàlandà mùvwà bantu bònsò bakùngwile. . . Nenku bààkapàtuka muntwamu benzè bu bakwàcike ne Nyuma. Bwalu bantu abu bààkamba ne: “Bantu aba mbùle ne mvinyò mupyamùpyà.” Kacya kabàvwakù banji kumòna cya nanku to.

⁶⁴ Nenku muntu ne muntu ùvwa ùteeta kwamba ne: “Nyuma Mwìmpè wàlu. Mulayi wà Nzambi wùdi pambidi pàànyì. Ndi—ndi muujiibwe tètè ne Nyuma.” Ne yéyè mwikàle mwena Ngàlèlè, muntu uvwayè wàkula nendè awu, Arabe anyi mwena Peelààsà, ùmuumvwa mu mwakulu wa kwàbò kumulelà.

⁶⁵ “Mmunyi mutùdi tuumvwa (kaciyi mwakulu mwenyi to)—mmunyi mutùdi tuumvwa muntu ne muntu mu mwakulu wa kwàbò kumulela? Bònsò bàdi bààkulà aba kì mbeena Ngàlèlè anyi?” Ne mwikàle pàmwàpa wàkula cyena Ngàlèlè. . . Kadi pàvwàbo bàcyùmva, cìvwa mmu mwakulu wà kwàkabàlelelèbo. Kabiyi nanku to, ndi muswe nùnkonkè—nùngandàmùnèku ku lukonko elu: Mmunyi mwàkenzekàbi ne Peetèlò wàkajuuka mwaba awu ne kwakula mu cyena Ngàlèlè, ne musùmbà mujimà awu bùmva cìvwàye wàmba aci? Misùùkà binunu bisatu yàkalwa kùdì Kilisto anu mwaba awu pèndè Peetèlò wàkula mu mwakulu wùmwe. Bushuwa’s! Cìvwa n’Nzambi munkaci mwa kwenza cishimà. Peetèlò, kùdì batèèleji bàmwèbàmwè abu benza ne bàvwà basòmbèle mu Mèzòpòtaamiyà, ne beenyi, ne bàvwà biitàbe diitabuujà dyabo, ne bakwabo bònsò bafùmine pa buloba bujimà bàvwà biimàne mwaba awu. . . Kadi Peetèlò mwimàne ùyiisha mu mwakulu wùmwe, muntu ne muntu ùmuumvwa, bwalu bantu binunu bisatu bààkangingalala ne bààkabàtijiibwa dyàkàmwe mu Dìnà dya Yesu Kilisto. Aci cidi bishi?

⁶⁶ Mònaayi, nwènù balundà bàànyì, ncyènàku mwa kutèkemena ne mwanèètù mwena dìngumba, anyi mwena

Mpenta neitabè aci mpindyewu mene to. Kadi londèshaayi cyôci aci mu Bible nungambilè dibà kanà dyônsò mwaba wùkaadibo bapetèku Nyuma Mwîmpè ne baakùle mu mwaku wùvwàbo kabàyi bamanyè civwàbo bàmba aci. Ne pùikalàbi ne mushindu awu ngwàkaMupetàbo kwókù aku, Nzambi mudishikàmìne...Bìdì ne cya kwenzeka musangu wônsò mushindu anu wumwewumwe awu.

⁶⁷ Mpindyewu, ncyèna mwa...Mpindyewu, kwa Kònee-... Tudi bavùlùke ne, patwàpwekì ku Sàmaalèyà, makèèlèlà dilòlò awu, twásangànyì ne kakùvwakù cintu nansha címwè cilonda ne bàakuumvwa mu mwakulu mukwabo to, cintu nansha címwè cyambiibwe pa bwalu abu. Kadi pàakayàbo kwa Kòneeliyò, kùvwà bantu bàà matùnga asatu mashiilàngàne aku, bàkaakula mu myakulu. Ne pààkaakulàbo, pùikalàbi ne bààkaakula, bàkaMupeta, mwàkambà Peetèlò, mushindu anu wumwewumwe wàkaMupetàbo bôbò ku cibangidilu awu. Nenku bààkamanya ne bàà Bisàmbà bya bendè bààkapeta ngàsà kùdì Nzambi, bwalu bààkapeta Nyuma Mwîmpè anu mwàkapetàbo bôbò ku cibangidilu. Ndi ne lukonko kaaba aka, cintu kampànda pa bwalu abu mu tusunsa tukese emu. Mvwa muswe bwa kutèeka bishimikidi, bwa nwènù kumòna ne bwalu bùdi cinyì.

⁶⁸ Mpindyewu ncyèna mwa kutèkemena ne bantu bàdì balongèshiibwe bishiilàngàne...Nenku ntèèlèjaayaaku, nwènù bàna beetu bananga, beena Mpenta, bàà mushinga mukolè. Ncyèna mufwànyine kulongesha eci pambèlu to. Eci cidi... Ncyèna mufwànyine kwenza cintu nansha címwè bwa cijuula dikòkangana to. Kadi twètù katùyi bapetè Bulelela to, netwàsè lwendu dibà kaayi? S'bidì bikèngela bwa kwikalèku cintu kampànda mwab'ewu bwa kutwòlolaci. Bikèngela tùpetè ngàsà wa Dyambwibwa mwaba ewu mpindyewu. Bikèngela bwa Bulelèlà bùpatukilè patòoke.

⁶⁹ Cidì muntu mufwànyine kwenza ncinyì yèyè mwikàle mpudimaci, kamàmà, ne kàyikù mwa kwakula to nansha kakese? Mmufwànyinekù kupeta Nyuma Mwîmpè anyi? Kadi bu ne kàtukù ne ludimi lwine, ne mukwàcikwètù awu pèndè ùjinga kusungidiibwa? Nwamònu anyi? N'Nyuma Mwîmpè, ndibàtiiza. Ne pashiishe, mapà ónsò aa bu mùdì dyakula dya mu myakulu, dyandamuna dya myakulu, mpaanyimà pàà wèwè mumàne kubwela mu Mubidi ku dibàtiiza dya Nyuma Mwîmpè. Bwalu mapà awu àdi mu Mubidi wà Kilisto.

⁷⁰ Mpindyewu, cìndì ngambidila cyôci eci...Mpindyewu, tàngilàayi kùneeku. Nudikù bafwànyine kutèkemena ne ekeleeziya wa Katolike, uvwa ekeleeziya wa nzànzànzà wàkavwijiibwa bulongolodi pa buloba paanyimà pàà bapostolo awu...Pashiishe ekeleeziya wa Katolike wàkavwijiibwa bulongolodi, kaa, ndambu wa nkàmà ya bidimu paanyimà pàà lufù lwà mupostolo wa ndekeelu, bidimu bitwè ku nkààmà

yisambombo ne—paanyimà pàà bapostolo, paanyimà menemene pàà Nsangilu wa Nicée, pààkadisangishà baataatù bàà ku Nicée ne kudyènzabò bulongolodi; pashiishe kwenzabò ekeleeziya wa buloba bujimà, uvwa ekeleeziya wa Katolike awu. Mwômò amu mmwàkenzàbo ekeleeziya wa buloba bujimà. Ne mwakù *katolike* mbwena kwamba ne “wa buloba bujimà”; mbwena kwamba ne myaba yònsò. Bòbò. . . wa cyena Loomò—Loomò wa cimpàngaanù awu wàkakùdimunyiibwa kulwayè Loomò wa ciipaapà. Ki kushikikabò paapà kampànda bwa kwikalayè mfumu bwa kwangatayè kaaba kàà Peetèlò, bu mwàkeelàbo meeji ne kwambabò ne yèyè nguvwa Yesu mupèeshe nsapì ya Bukalenge. Nenku paapà awu kàvwa mwa kutùpakana to, ne ki mùcidìbi too ne leelu bwa ekeleeziya wa Katolike. Bwa ne. . . Dyèndè dīyì yèyè ki mukenji ne dīyì ditùma. Yèyè mpaapà udi kàyì mwa kutùpakana to. Aci ki cyàkiitabiibwà.

⁷¹ Nenku dībà adi, bwalu bantu kabàvwa mwa kwitaba dilongesha edi dya Katolike, bàvwa bàbàshebeya, bàbòòshila ku dikunji, ne bikwabo byònsò. Tudi bònsò bamanyine aci ku mifundù minsantu ya Josèphe, ne *Mukàndà Wà Bafwile Diitabuuja Wà Fox*, ne mikwabo minsantu yàbúngì. . . *Babùlònà Yìbìdì wà Hislop*, ne maalu-malonda ma—manene. Pashiishe, cyòcì—paanyimà pàà bidimu cinunu ne nkàmà yitaanu, mutùdì bamanyè, bya Bikondo Bya Mìdimà, Bible ùvwa munyèngiibwa ku byanza bya bantu. Ne Wà—Wàkasokokiibwa kùdì nsaserdose kampànda wa mutekète, ne bikwabo byònsò, mutùdì tuumvwa bàmba.

⁷² Pashiishe paanyimà pàà aci kulwakù Dilongolola dya kumpàla, dīvwa dya Martin Luther adi. Nenku yèyè wàkapàtuka wàmba ne kòomunyò udi Katolike mwinyike ne mmubidì—mubidì mwena-dìinà wà Kilisto awu, wùvwa anu wùleeja mubidì wà Kilisto cyanàànà. Ki kwimanshayè kòomunyò awu pa kabàsà kàà kutwila binù ku cyàltàr, anyì pa bibàndilu, ne kubèngayè bwa kucìbìikila ne mmubidì mwena-dìinà wà Kilisto, ne kuyiishayè ne: “Mwakàne neikalè ne mwoyi ku diitabuuja.” Mpindyewu, kwèna mwa kutèkemena ne ekeleeziya wa Katolike neàtwe ku cyèndè to, nansha kakese, pàdì mfùmwbò udi kàyì mwa kutùpakana awu ùbambila ne to. Eyo.

⁷³ Pashiishe paanyimà pàà Martin Luther, ùyiisha Dibingishiibwa, John Wesley wàkalwa pèndè ùyiisha Dijidiibwa. Ki kuyiishayè ne muntu, paanyimà pàà mumanè kulingishiibwa (bìdì anu bimpè) kadi bìdì bikèngela ùjidiibwè, ùkezudiibwè, muji wà bubì wùmushiibwè mu wèwè kùdì Mashì a Yesu. Mpindyewu, kwèna mwa kutèkemena ne ba-Luthériens nebàyiishè Dijidiibwa nansha, bwalu kabàakuciyyiishakù to.

⁷⁴ Paanyimà pàà Wesley mumanè kuyiisha Dijidiibwa, ne tusùmbusumbu twà tukese-tukese tumanè kwabulukanganakù, twàkalwà: ba-Méthodistes bàà Wesley, ne ba-Nazaréens, ne bikwabo, twòtò atu twàkalamà kapyà kàteema mu cikondo

cijimà cyabo aci atu, pashiishe kulwakù Mpenta wàkamba ne: “Mona’s, Nyuma Mwïmpè ndibàtiiza adi, nenku tudi twakula mu myakulu pa kuMupeta.” Bushuwa. Dìbà adi pàdi aci cìlwa, kwèna mufwànyine kutèkemenena ne ba-Nazaréens, ne ba-Méthodistes bàà Wesley, ne bakwabo abu ne nebiitabuuje aci to. Kì mbafwànyine kuciitabuuja to. S’bààkacibiikila ne ndémon. Eyo. Cyàkenzekà ncinyi? Bààkabanga kupweka; Mpenta wàkabanga kubànda. Mpindyewu ncijuukè too ne mwàlu Mpenta kupeta dyèndè pèndè dinyùkushiibwa. Wàdivwiji bulongolodi ne wàpàtuku, kàcìyi wìtaba cintu cikwabo nansha cimwe to. Bàkaadi ne tunungu ne tukenjikenji twàbò sungasunga, ne aci cyàkòsu bwalu.

⁷⁵ Mpindyewu, pàdi Nyuma Mwïmpè ùbwela ne ùsokolola Bulelèlè bwa cintu kanà cyònsò ne ùcijaadika ku Bwikadi Bwèndè Yèyè mwine ne ku Diyì Dyèndè, kwèna mwa kutèkemenena ne beena Mpenta nebàmbè ne: “Nèncitàbè” to. Bikèngela wimanè pàà nkààyeebè mwàkiimanà Luther, mwàkiimanà Wesley, ne mwàkiimanà bakwabo bònsò amu. Bikèngela wèwè kwimanyina cyòci aci bwalu dìbà dyàfiki. Nenku cyòci aci ki cidì cimvwijà mèmè kazòòlò kàà cizubu ku mukòlò. Aci ki cidì cimvwijà mushiilàngàne.

⁷⁶ Ne mèmè ncyèna mwa kwasa lwendu mùdi Mwanèètù wa musinga mukolè Oral Roberts, ne Tommy Osborn, Tommy Hicks, ne bakwabo abu to, bwalu ekeleeziya kayààkutwà ku cyànyi to. Bàdi bòbò bamba ne: “Yèyè ùdi wìtabuuja dikùbiibwa dya Cyendelele. M’Baptiste. Kèna wìtabuuja dyakula dya mu myakulu bu cileeki cya mbangilu cya Nyuma Mwïmpè to. Tàpulukàayi ne mulùmyàna awu!” Nwamònu anyi?

⁷⁷ Kadi lwàku ùkungamanganè naaci tǔng. Twàku cyàdi. Bàdi mwa kukungamangana ne ba-Luthériens, Ba—ba-Méthodistes’s. Beena Mpenta bàdi mwa kukungamangana ne ba-Méthodistes. Mèmè ndi mwa kukungamangana ne beena Mpenta naaci. Ncya bushuwa menemene. Ncilelèlè. Mbwa cinyi? Twètù tudi twendela mu Bukènkè bu mùdiYe Yèyè mu Bukènkè. Nwamònu anyi? Twètù tudi twenda tubànda ne Cibeeba cya Mfumu, ne pàdici citàmba kuya kule, mpàdi ngàsà ùtàmbe kufidiibwa, mpàdi bukolè bûtàmbe kufidiibwa, mpàdi citàmbe-mfùkulu citàmbe kufidiibwa. Nenku’s ki bwalu abu. Dìbà ndyòdi edi didi Nyuma Mwïmpè mupwekè mu mmwènekulu wa Bukènkè mùvwàYe ku cibangidilu amu, Dikunji dya Kapyà, ne muDimwènèshe, wènta bintu anu bimwèbimwè byàkenzàYe pàvwàYe pa buloba apa abi. Ne Yesu wàkamba ne: “Mmunyi munùdi numanya ne mbabingè anyi kì mbabingè? Ku mamuma àbò nkunwàbàmanyinà. Ewu udi ungiitabuuja Mèmè, byenzedi bìNdi ngenza yèyè neàbyènzè pèndè. Bimanyinu ebi nebiifilè bàdi biitabuuja.”

⁷⁸ Mpindyewu nwènù bânà beetu beena Mpenta. Mèmè ndi neenù. Ndi umwe wenu. Ndi mupetè Nyuma Mwïmpè. Nkàadi

mwakùle mu myakulu, kadi ncitu muyipetè pa kupeta kwa Nyuma Mwimpè to. Ndi mupetè dibàtiiza dya Nyuma Mwimpè; ntu nkààdi mwakùle mu myakulu, mwambe biprofeta, mupetè mapà a dimanya, lungènyi, dyandamuna, ne byònsò abi biikàle byènzeka. Kadi ndi muswikùbwe ku cyònsò cya ku bintu abi, bwalu mpindyewu ndi mwànà wa Nzambi. Bukolè, Kapyà kàà Nzambi, bìdi mu musùkà wànyi; ludìmi lwà Kapyà lwàkiikilà—lwàkabwelà munda mwànyi ne kwosha cyònsò cìvwà cibènganà ne Nzambi aci alu, ne mpindyewu ndi mulombola kùdi Nyuma Wendè. Yèyè mmufwànyine kwamba ne: “Ndà *eku*,” pàànyi kuya. “Ndà *eku*,” pàànyi kuya. “Akùlà *apa*,” pàànyi kwakula. “Ne enzà *cikampànda*, ne *cikansanga*, ne *cikankènga*.” Ki bwalu abu’s, anu bu. . . Udi mulombola kùdi Nyuma. N’Nzambi munda mwebe, wènza diswa Dyèndè. Nansha ciikàle cinyi, Yèyè ùdi wènza diswa Dyèndè.

⁷⁹ Mpindyewu, tèèlejàayi. Ngǎnji mmonè mbalè kaaba aka kumpàlà kwa kubanga nkonko pa nkòngamyakù ewu. Mpindyewu, mu Nkùdimwimu wa Vatican, Cibungu cya 7, 190—1205:

“Mbikolè bwa kushindika ní cìvwà ndíyì dya bantu abu bàakula mu mwakulu mwenyi; anyi mulubù anyi manungànyè a bwenzeji bwa cipeepèlè citàmbe mfùkilu cya cìvuma aci bwàkasalulà musùmbà awu to.”

Kabàvwa mwa kucyùm vwa to. Mpindyewu tàngilàayi. Ní cìvwà mbantu. . .

⁸⁰ Nèmfilè anu cìfwànyikijilu cyanaànà. Musùmbà wà bantu ngwòwò ewu wà beena Ngalèlà bapèlè, bavwàle mbondya. Ne ki bóbò aba mu mùsèèsù mwàmwa. Kacya kabàvwakù banji kumòna cintu bu nanku to; ne byanza byela muulu, batùùlùke mu cibambalu cya kuulu aci, panshì pa bibàndilu abi, babwelè muntwamu, buujìbwe anu tètè; kabàvwakù banji kwakula to. Nwamònu anyi? Ki bóbò bàdi batùùlùka bàpìcìlà mwaba awu abu. Nenku mpindyewu, twàmbè ne, bàvwa bènda bàtetuka mu cyòci eci. Ki bantu kwambabò. . . Mwena Ngelikà kampanda ùlwa lubilu kùndi, twàmbèbi ne, mèmè ndi ngaakula cyena Ngalèlà.

Wèwè uya kùdiye lubilu wamba ne: “Mbwalu kaayi ebu kùdi’s, Mulùmjànà?”

⁸¹ “Ndi muujìbwe tètè ne Nyuma Mwimpè. Bukolè bwa Nzambi mbutùùlùkile mu cibambalu mwàmwa. Cintu kampànda ngingenzèkèle. Kaa, butùmbi kùdi Nzambi’s wè!”

Ki mukwabo ewu apa, ùvwa yèyè wàkula ne Arabe kampànda, kadi yèyè mwena Ngalèlà wàkula mu mwakulu wà ci-Arabe—Arabe.

⁸² Mpindyewu, kabèèna mwa kumanya ne, cìvwà ncipeepèlè cya cìvuma cìvwà cikòke bantu abu pàakakungwilà musùmbà

awu apu anyi, anyi ndyakula dya mu mwakulu mwenyi wùvwàbo bààkula awu? Mpindyewu, Bible kèna wàmba anu menemene . . . Nudi ne bintu bibidi binùdi mwa kutàngila. Cìvwa ne . . . Bantu bàà—bàà pambèlu bààkamba ne: “Mmunyi mutùdi tuumvwa muntu ne muntu mu mwakulu wètù wà kwàkatùlelelèbo?” Kì ncyambè ne ngùvwàbo bààkula to, kadi bôbò mbàvwà bàwùmvwa.

⁸³ Pashiishe kasùmbù kàmwèkàmwè aku, bantu bàmwèbàmwè abu, umvwijaayaaku cyôci eci’s. Peetèlò ùtùpikila pa cintu kampànda e kwambayè ne: “Nwènù beena Ngalèlè, ne nwènù bàdi basòmbèle mu Yelusàlèma, eci cìmanyiibwè kunùdi (bantu bààkamba ne bôbò kabàvwa ne mwakulu wà cyena Ngalèlè to) eci cìmanyiibwè kunùdi ne tèelejàayi mèyi àanyi (mmu mwakulu kaayi—kaayi mùvwàye wàkula amu, ne bônsò abu?); mônga, bantu aba kî mbakwàcike maalà munùdi nwènù nucinka amu to, pa kumônga ne tucidi anu pa dîbà citeema dya ditùkù, kadi eci ncyàkambàbo kùdi mupròfetà Yowèlè ne: ‘Nebyènzekè ku matùkù a ndekeelu, mùdi Nzambi wàmba, ne Mèmè nèngìcìkijè Nyuma Wanyi pa mubidi wònsò. Bânà beenu balela balùme ne bakàji nebàmbè bipròfetà.’” Ki wènda ùya wènda ùya, kwambayè ne: “Nwènù ne byanza bya lwonji nudi bapoopèle Mwànà wa Nzambi pa nkùruse kàyi mwenzè bwalu to. Davidi wàkamba bwa bwalu Bwèndè . . . ‘kàvwa mwa kushiya musùùkà Wèndè mu iferno, anyi Yèyè kàvwa mwa kwitaba bwa Wa Cijila Wèndè àmonè dibola nansha.’” Ki yèyè ne: “Bìmanyiibwè kunùdi ne Yesu umwèumwè unùdi bapoopèle pa nkùruse ewu Nzambi mmumuvwijè Mukalenge ne Kilisto.” Nenku pààkumvwàbo cyôci eci . . . Amen! Nganyi? Muntu yònsò wa mwinshì mwa maulu. Ncinganyi cìvwa munkaci mwa kwenzeka aci? Yèyè kàvwa wàmba ne: “Mpindyewu, nèngààkulè mu cyena Ngalèlè; nèngààkulè mu *cikampànda*; ne nèngààkulè mu *cikansanga* nansha . . . ? . . .”

⁸⁴ Pàcìvwa anu Peetèlò wàmba mèyi aa, bôbò kwamba ne: “Balùmyànà ne bânà beetu, tudì mwa kwenza cinyi bwa kusùngidiibwa?” Ki Peetèlò kubàpèèshayè mèyi àvwà àkèngelà kwamba. Ki mushindu wùdibi byènzeka misangu yònsò ngwòwò awu. Nwamònu anyi?

⁸⁵ Nditùngunuka, kukolesha bwa kubwela mu Nzambi, lwendu lwà sheemàsheemà. Udi umanya munyi? Nenku mpindyewu, Luther pààkapetàye dibingishiibwa, wàkabìikila aci ne n’Nyuma Mwímpè. Úvwa n’Yèyè. Nzambi ngwàkazabikamù ndambu wa Cyôci aci. Pashiishe kwambaYè cinyi? Wesley kupetayè Dijidiibwa, kwambayè ne: “Balùmyànà, paùdi wela mbilà, wàMupeci.” Kadi bààbùngì bàà kùdibo bààkeela mbilà kadi kabàyi baMupetè to. Beena Mpenta pààkaakulàbo mu myakulu—myakulu myenyi, bààkamba ne: “Balùmyànà, nwàMupeci.” Kadi bààbùngì bàà kùdibo kabààkaMupeta to.

Kakùtu bintu pààbì ne mbimanyinu bya kumanya aci to. “Mushindu wùmwèpelè wunùdi numanya mucì,” mwàkambà Yesu, “nku bimuma bìdiwu wùkwàma,” byenzedi bya Nyuma, mamuma a Nyuma. Dìbà adi paùdi umòna muntu udi mùle tètè ne bukolè, udi mùle tètè ne Nyuma Mwimpè, dìbà adi udi umòna nsòmbelu udi mushintùlùke. Udi umòna bimanyinu ebi bìfila aba bàdi bìitabuujà: “Mu Dìna Dyànyì bôbò nebìipatè baadémons, nebààkulè myakulu mipyamìpyà. Nyòka yèyè mubàsùme, kî mmufwànyine kubènzela bwalu to. Bôbò bapetè cintu cya cishebeyangana, banwè, kî ncifwànyine kubàshebeya to. Nebàtentekelè babèèdi byanza, ne babèèdi nebàsangalè.” Ekelekele! Bimanyinu bya mushindu ewu mbìdi bìfila aba bàdi bìitabuujà. Kadi nudi nubwelamù bìshi? Mapà awu àdi mu Mubidi. Nudi nubwela mu Mubidi bìshi? Kí nku dyakula kunùdi nubwelamù to; kadi ku dibàtìijibwa nkunùdi nubwela mu Mubidi wùmwè (Kolintò wa Kumpàla 12.13). Ku Nyuma umwe nkutùdi bônso tubàtìijibwa mu Mubidi awu ne bìikàle ne bukenji ku mapà ònsò. Mukalenge ànùbènèshè.

⁸⁶ Mpindyewu, bu muntu mwa kutèeleja mukàbà wà mèyi ewu anyì muntu mwab’ewu mufwànyine kubènga kucìitaba, vùlukàku ne, ùcyènzèku ne musàngeelu, wèwè mwanèètù, bwalu mèmè ndi mukunangè.

93. Lukonko lwà kumpàla dilòlò edi: Mwanèètù Branham, mèmè ndi ngeela meeji ne télévision ùdi mulawu kùdi bàà pa buloba. Udikù wela meeji kaayi pa bwalu abu?

⁸⁷ Ee, udi mucifunde ewu nî nganyi, mèmè nèntwe ku cyebe. Mbamuvwijè mulawu kùdi bàà pa buloba. Ùvwa mwa kwikala dibènesha kùdi bàà pa buloba, kadi bôbò mbamuvwijè mulawu. Cintu kanà cyònsò cya bu nanku, nwènu bananga bàanyi, ncyùdi wèwè mwine ubandila’s. Byòbì ne télévision ùdi mulawu, nanku’s cibèjibeji cidi mulawu, nanku’s cisanji cya kadyòmbà cidi mulawu, ne misangu yàbùngì tèlefonè ùdi mulawu. Nwamònu’s, nwamònu’s, nwamònu’s, nwamònu anyi? Mbilondèshile cyùdi wenza nendè. Kadi bu mùdìbi ne mwanèètù wa balùme ewu ùvwa mwambè dilòlò adi ne, kakùcyèna kabidi ndongamu miine ku télévision to; ayi’s mmfrangà bùngì cyanàanà’s. Muiiishi wetù wa kàyi dyeyà ewu udi uyiisha Ewanjeeliyo mu Kaabujimà kènàku ne mushindu wà kufuta bwa ndongamu ku télévision to. Nenku ki bwa cinyi... Mwanèètù wa balùme awu ùvwa wàmba dilòlò adi, ngeela meeji, mwaba kampànda, ne: “Tuutùlà lupwishi ku cisanji cyebe cya kadyòmbà,” anyì muntu kampànda, anyì ne: “Cyàngatùlùlè mu ditumba amu ùteelejèku ndongamu ayi.” Neya bushuwa’s.

⁸⁸ Kadi, mukwètù munanga, nansha wèwè mwikàle nganyi, ncyà bushuwa ne mèmè ndi ntwà ku cyebe. Ncilwè cimwè cya ku bintu bya kutàmba kwela mulawu bwa bukwàbantu. Mwómò amu bàdi bàngata mfrangà yònsò eyi yìvwà yikèngelà kuya ku bitàdi bya mbùlámàtadi, kadi kubyèla mu mamanyisha

a ndongamu yònsò ya mfwankà ne maalà a wiskí eyi ne bintu bya mushindu awu, ne bàkòselamù bitàdi bivwà ne cya kuya kùdi mbùlámàtadi abi; ki pashiishe bànyùnguluka nunku bàkwàta bayiishi bàya naabò ku tubàdi bwa kubàdiila mfrangà pambidi. Mèmè ndi ntwà ku cyebe, ncintu cibì be. Mpindyewu, aci kacyèna. . . Nudi bamanyè's, cidi anu ncintu cyùdi pèèbè mumòne's. Twasàkidila, mwanèètù wa bakàji, mwanèètù wa balùme, yònsò uvwa mwelè lukonko alu awu.

94. Mpindyewu, lùmwe lwa lwìmpè ndwòlò elu. Lukonko: Kùdi myaba mu Bible bu mùdi Samwèlè wa Kumpàla 18.10, udi wamba ne nyuma mubi wa kùdi Nzambi wàkenza bintu kampànda. Ncyèna ngumvwa cya ne “nyuma mubi wa kùdi Nzambi” aci to. Bu wèwè mwa kuswà umvwijàku bwalu ebu.

⁸⁹ Ee, pàmwàpa ku dikwàcisha dya Mukalenge, ndi mwa kucyùmvwija. Kì mbwena kwamba ne Nzambi n'Nyuma mubi nansha. Kadi nyuma wa cintu cyònsò ewu ùdi ùkòòkela Nzambi. Ne Yèyè ngudi wènzeja bintu byònsò bilondèshile cidiYe Yèyè muswe. Nwamònu anyi?

⁹⁰ Mpindyewu, mu lukonko lwebe, udi wamba bwa nyuma mubi wàkapàtuka ùfùmina kùdi Nzambi bwa kutàcisha Shawùlà. Yèyè ùvwa ùsanganyibwa mu mmwènekelu—ngiikàdilù wa dibungama, mucibùlùke, bwalu, dyàmbedi yèyè ùvwa mutwè cimpingà. Nenku paùdi utwà cimpingà, nyuma mubi—Nzambi neànyishilè nyuma mubi bwa kukutàcishayè.

⁹¹ Ndi muswè nnùbadilèku cintu kampànda mu—mu katanci kake. Ndi ne dyeji dikwabo kaaba aka pa bwalu abu. Nwamònu anyi? Nyuma yònsò ewu bùdiye naabù mbwa kukòòkela Nzambi. Nudikù bavùlùke pàvwà Yèhoshàfàtà ne Aakàbà bàkèba kuya mu mvità apu anyi? Kadi katanci aka, kùvwa—bàvwa basòmbe mu bibweledi bya cimenga. Kadi Yèhoshàfàtà ùvwa muntu mwakàne, ne wàkamba (bamfumu babidi abu bàvwa basòmbe mwaba awu, ne bààkasanga makolè àbò pàmwè) nenku kwambayè ne: “Twànji kukonka Mukalenge ní tudi mwa kuya anyi kubènga kuya.”

⁹² Kì Aakàbà kuya kangata bapròfetà nkàmà yinaayi bàvwàye naabò, bònsò, bàvwàye mulamè ùdiisha ne mudyundishishe mafù ne bikwabo byònsò; bàvwa ne mubidi tumatuma. Kì kulwabò mwaba awu, ne kwambabò bònsò cipròfetà ne díyì dimwe, bàmba ne: “Ndà, Nzambi neàkupèèshè bucimunyi. Ndà ku Laamòtà-giiladà ne Nzambi neàkukwàcilè cintu aci kuntwaku.” Umwe wa kùdibo ùvwa mudyènzèle nsèngù yibidi ne wàkabanga kusempela eku ne eku cyenzè bu cifwànyikijilu, wàmba ne: “Ku nsèngù ya byamù eyi, wèwè neubàsakè too ne pambèlù pàà ditunga; ndyebe wèwè.”

⁹³ Kadi nudi bamanyè's, kùdi cintu kampànda kùdi mulùme wa Nzambi cya kàyikù wa bàdingidija kùdi byònsò abi to. Nwamònu anyi? Cyòci kaciyi cipetangana ne Mifundu to, kùdi

katanyi. Bwa mwena kwitabuuya wetu yônsò mulelèlà ewu . . . Ki Yèhoshàfàtà kwambayè ne: “Ee, bapròfeta nkàmà yinaayi bàba bàdi bàmwèka anu bìmpè. Bàdi bàmwèka bantu bìmpè.”

“Kaa, s’mmwômò’s,” mwàkambà pàmwàpa Aakàbà.

Kadi Yèhoshàfàtà kwambayè ne: “Kwênàku ne mukwabo anyi?” Bwa cinyi mukwabo pèèbè naabò nkàmà yinaayi biikàle ne díyì dimwe? Bwalu wàkamanya ne kùvwa cintu kampàndà cìvwà kacìyi cyùmvwika mu cyòci to. Nwamònu anyi?

Yèyè ne: “Eyowa, tudi ne mukwabo, mwànà wa Imla, kuntu eku,” yèyè ne, “kadi mèmè ntu mumukìne.” Bushuwa’s. Wèwè’s neùkangè wèndè ekeleeziya díbà kanà dyònsò dyùdi mwa kucyènza. S’neùmwpipàtè mu ditùnga. Nwamònu anyi? Bushuwa’s. “Mèmè ntu mumukìne.”

“Cyùdi mumukìnyine ncinyi?”

“Yèyè misangu yèndè yônsò ùtu anu wàmba bipròfeta bìndwisha mèmè.” Ngeela meeji ne Yèhoshàfàtà wàkamanya dyàkàmwè ne kùvwa—cintu kampàndà cìvwà kacìyi mu cyòci to.

Ki kwambayè ne: “Anji ndàayi nùkakèbè Miikà awu.”

Ki kuyabò kamukèba, nenku ki yèyè ulwàlwa ewu . . . Nenku pààkayàbo, bààkatùma mùsànjeelà wàkamba ne: “Mpindyewu, anji indilà kakese. Mpindyewu, bóbò nya’ bàdi ne ba-Docteurs mu Bunzambi kuntwaku nkàmà yinaayi. Bóbò ki bàdi batàmbe bwìmpè mu ditùnga, ne màpòlomè a Ph, LLD, ne bikwabo byònsò.” Yèyè ne: “Mpindyewu, udi mumanye’s, wèwè kaamuntu kàdi kakàyi kalongè mukàndà aka, kùyi kabèngangana ne cìsùmbù cijimà cya balombodi bàà ekeleeziya cyàcya to.”

⁹⁴ Imla kwambayè nunku, anyi ndi muswe kwamba ne, Miikà kwambayè nunku ewu: “Mèmè ncyàkwambakù cintu nansha cimwe to anu pàdi Nzambi ùcitéeka mukana mwànyì, ne díbà adi nèngàmbè anu menemene cidiYe Yèyè wàmba aci.” Mèmè ntu muswe bya nanku. Mèmè ntu muswe bya nanku. Mu ngaakwilù mukwabo ne: “Mèmè nènshaalè ne Díyì.” Cìvwà bakwabo abo bàmba nansha ciikàle cinyi. Awu ne: “Ee,” yèyè ne, “mèmè’s ngudi ukwambila awu. Wèwè kùyi muswe kwipaciibwa to, mbìmpè wàmbe naabò cintu cìmwèmwè aci.”

Ki kuyayè kuntwaku. Kwambayè ne: “Nye anyi?”

Yèyè ne: “Ndàaku.” Yèyè ne: “Mpèèshaayi bufùku ebu. Ngánji nyiikilanganè ne Mukalenge pa bwalu abu.” Mèmè ntu muswe bya nanku. Ki bufùku abu Mukalenge kumumwènekelaYè, nenku pààkacyàbu yèyè kuya. Ki kwambayè, pàvwàye wènda ùya apu, kwambayè ne: “Ndàaku; kadi ndi mumòne Izaleela bu mikooko kayiyi ne mulami to, mitangàlàkàngàne pa tukùnà.” Kaa, ekelekele! Aci kadi kumupàtula mupùyyà wònsò.

Ki yêyè ne: “Ncìvwa mukwambile anyi? Mémè’s mvwa mucimanyè. Ki mùtùye wènzenza menemene dibà dyònsò, wàmba cintu kampànda cibì cya cìndwisha.”

⁹⁵ Bwa cinyi? Ùvwa mushààle ne Dìyi. Bwa cinyi? Mupròfetà uvwa mumudyànjidile, Dìyi dya Nzambi difùmina kùdì Eliyà, mupròfetà mulelèlà, yêyè wákamba ne: “Bwalu wedi panshi mashi a Naabòtà kàyi mwenzè bwalu, mbwa neyilakè èbè pèèbè mashi.” Ki kumwambilayè cintu cibì. Elishà ùkaavwa mumanè kuya mu Dyulu. Kadi yêyè ùvwa mumanye ne Elishà ùvwa ne Dìyi dya Nzambi, pa nanku yêyè kushààla ne Dìyi. Mémè ntu muswe aci. Kushààla ne Dìyi.

⁹⁶ Piikalàbi ne Bible mmwambe Yesu Kilisto umwèumwè awu makèèlèlà, leelu, too ne kashidi; bukolè Bwèndè bùcidi anu bùmwebùmwebè abu; Nyuma Mwímpè mbwà ewu yònsò udi muswe, àlwe, àshaalè ne Dìyi. Eyowa’s, mukalenge! Cìdì bakwabo bàmba nansha ciikàle cinyi. Nansha badìshiiibwe bilenga bya bishi ne mu bilongelu búngi kaayi mùdìbo bapicile, aci kacyèna cipetangana naaci to.

Ki dibà adi kwambayè. . . Mulùmyànà munene menemene udi ne nsèngù kumutù ewu, wíkala mwa kucisàka—pambèlù pàà ditunga kumpalà kwa mfumu awu, kuseemenana e kumunàngulayè dipi ku mishiku (muyiishi mukese ewu). Ùvwa mumanye ne yêyè’s ùvwa anu munsantu mukese mubùnguluki wa mu malaba ewu pa nanku kakùvwakù cintu cìvwa cìfwányine kwambiibwa pa bwalu abu to, pa nanku kumunàngulayè anu dipi ku mishiku’s. Kwambayè ne: “Ndi muswe nkukonkè cintu kampànda.” Yêyè ne: “Njila kaayi udi Nyuma wa Nzambi muyiilè pàpàtukuYè mu mémè piikalàbi wèwè udi muMupetè?”

⁹⁷ Yêyè kwamba ne: “Neùmvwè pawikalà ukààdi musòmbe mu nsànji kuntu kwàka bu mupika.” Yêyè ne: “Ndi mumòne Nzambi musòmbe pa nkwaswa wa butùmbi (Amen! Mpindyewu tèèlejàayi!), ne cilwilu cya mu Dyulu cìvwa ciMunyùngulùkile.” Bwalu bùvwa cinyi? Mupròfetà Wèndè ùkaavwa mumanè kwamba cìvwa mwa kwenzekela Aakàbà. Nzambi. . . Kàvwa ng’Eliyà wákamba aci to; ùvwa mmupròfetà mwela maanyi awu. Cìvwa n’Dìyi dya Mukalenge, EMU MMÙDÌ MUKALENGÈ WÀMBA. Ki Miikà kwambayè ne: “Ndi mumòne cilwilu cijimà cya mu Dyulu cinyùngulùkile Nzambi mu muyiiki munene. Ne bàvwa bàakula ewu ne ewu. Ki Mukalenge kwambaYè ne: ‘Nganyi uTùdiku mwa kutùma pa buloba, nganyi wa kunùdi udi mwa kuya pa buloba, bwa kuseeswisha Aakàbà, bwa kumufikisha ku diya kuntu kwàka bwa kuuja Dìyi dya Nzambi, bwa kumufikisha ku dimwasabò? Nganyi uTùdiku mwa kutùma pa buloba?’”

⁹⁸ Ee, ewu wàmba ne n’kampànda anyi n’kansanga. Kadi paanyimà pàà katanci, nyuma mubi, nyuma wa mashimi kubàndayè ùfùmina mwinshì mwàmwa e kwambayè ne: “Bu

Wèwè anu mwa kungaanyishila mèmè. Mèmè ndi nyuma wa mashimi. Nèmpwekè pa buloba nkabwelè munda mwa bayiisha bônso abu, bwalu kabèèna ne Nyuma Mwîmpè to; nenku nèmbàfikishè (bàdi anu nsongàalùmè milongeshila mu tûlaasà)—nenku nèmpwekè pa buloba, ne nèmbwelè mu yônso wa kùdîbo, ne nèmbàseeswishè, nenku mbàfikishè ku dyamba dya cipròfetà cya mashimi.” Ncyàkambàye anyi? Ki yêyè ne: “Ki mutwàseeswishangana nanku.” Ki kupwekaye pa buloba.

Yêyè kwamba—Nzambi kwambaYè ne: “Wèwè udi ne dyanyisha Dyànyì bwa kuya.”

⁹⁹ Ki kupwekayè pa buloba ne kubwelayè munda mwa bapròfetà bàà mashimi abu, beena mudimu wà bwambi mulongela mu tûlaasà abu, ne kubàfikishayè ku dyamba dya cipròfetà cya mashimi. Ûvwa nnyuma wa mashimi ùkwàta mudimu ku diswa dya Nzambi. Ngǎnjì. . . Anu cintu cikwabo kampànda cinùdi bafwànyine kumòna kaaba aka, katanci kakese cyanàànà. Tàngilàayi eci. Ndi muswe bwa nùbuululèku naanyì mu Kolintò wa Kumpàla mu nshapità mwi5, mvensà wa kumpàla, katanci kakese cyanàànà. Kolintò wa Kumpàla. . . Nenku tàngilàayi eci panwikalà baswè kumòna cintu kampànda, mùdì Nzambi wènza cintu kampànda—mùdì nyuma mibi ayi, mwikalàyi—mwikalàyi mwa kukwàta mudimu. . . Eyo, Pòlò ngudi wakula:

Bàdi bamba kùdì bantu bààbúngì ne kùdì masandi a bajikè munkaci mwenu, ne miine masandi a bajikè awu àtù kaayikù. . . matèèdiibwe munkaci mwa bàà Bisàmbà bya bendè to, . . . (Nudikù nwela meeji kaayi pa bwalu abu munkaci mwa ekeleeziya?) . . . mu mushindu wà ne muntu mwikalè ne mukàji wa tatwèndè.

Kadi nwènù nudi nudyùja makaaya, ne kanùyikù. . . (Tùmonèbi. Ngeela meeji ne ndi mubuulùle mabeji abidi ku. . .) . . . Nwènù nudi—Kadi nwènù nudi nudyùja makaaya, ne kanùyikù nudila mwadi mùvwàbi bikèngela to, bwa. . . (Mpindyewu, anjì indilaayi kakese kaaba aka. Ndi. . . Eyowa, ncyà bushuwa. Eyowa.) . . . nudila mwadi. . . (Ki cyôci aci.) . . . nudyùja makaaya, ne kanùyikù. . . nudila mwadi, bwa ne yêyè udi mwenzè cyenzedi eci ùwakù mufwànyine kwikala muumùshùbwe munkaci mwenu.

¹⁰⁰ Ncyèna mumanye to. Ncyèna ngeela meeji ne muntu kanà yônso ewu mmufwànyine kusàkidilakù díyì anyi kuumushilakù to, kadi mèmè ndi anu ntwa nyama ku mikolo bìndì ngiitabuuja: Muntu yêyè mùle tètè ne Nyuma kèna mwa kuMujìmija to. Nwamonu’s, nwamonu anyi?

Bwalu mèmè mu bulelèlà mwikalè nciyipù mu mubidi, kadi mwikalèpù mu nyuma, nkàadi mumane

kulumbulwisha, byenzè bu ne mwwapù, pa bìdì bitàngilà ewu udi mwenzè cyenzedi eci awu,

Mu dîna dya Mukalenge wetù Yesu Kilisto, panùdi badìsangishè, ne wanyì nyuma, pàmwè ne bukolè bwa Mukalenge Yesu Kilisto,

Bwa kwelela Sàtaanà muntu wa nanku awu bwa dibùtudiibwa dya mubidi, bwa nyuma wàmòna mwa kusùngidiibwa mu ditùkù dya Mukalenge Yesu.

¹⁰¹ Nzambi, mwikàle wàmabila Ekeleeziya wa cijila's, mwine udi Mubidi Wèndè pànu pa buloba awu, mwikàle (mpindyewu, eci mpaanyimà pàà Dipungila Dikùlukulu, mu Dipyadipyà) wàmabila muntu uvwa wa bukooyà ne manyaanù bya menemene munkaci mwa cisàmbà ne ùvwa musòmbe ne mukàji wa tatwèndè mumuledi. Kwambayè ne: "Cintu cya mushindu awu mu Mubidi wà Kilisto...Nwènù, Ekeleeziya, nùmwelèlaayi dyabùlù bwa dibùtudiibwa..." Nwamònu anyi? Nzambi ùtu wànyishila...Ne pàdiYe ne cintu cidiYe muswe kumòna cyènjilbwa, bwa kwela muntu kampànda mfimbù, Yèyè neàmulekelèlè nyuma mubi pambidi pèndè bwa kutàcishayè muntu awu bwa—bwa kumwaluja. Mpindyewu, tudi tusangana mwine muntu ewu paanyimà. . .

¹⁰² Ki lutàtù lùdi naalu maekleeziya leelu ewu ndwòlù alu. Pàdi muntu ùbwela mu Mubidi wà Kilisto ne ùlwa cimwè cya ku bidimba kadi ùbanga kwenza bubì, pamutù pàà nwènù bònsò kudìsangisha ne kwenza cintu cimwècimwè eci. . . Kadi nwènù, beena Branham Tabernacle, enzàayi nanku. Bwalu panùdi anu numutwà nyama ku mikòlò apu, yèyè ùdi mwinshì mwa Mashì. Ne yèyè ùdi anu ùtùngunuka ne kwenza kwenzulula cintu cimwècimwè cya kale aci dībà dyònsò. Disangishaayi nùmwelèlè dyabùlù bwa dibùtudiibwa dya mubidi, bwa nyuma wendè—bu—wàmòna mwa kusùngidiibwa mu ditùkù dya Mukalenge. Kadi nùtangilàayi nùmonè mùlwalwà mfimbù wa Nzambi awu. Nùtangilàayi nùmonè mùdi dyabùlù ùmupyà. Nyuma mubi ngudi umukwàta awu.

¹⁰³ Nanku nsongàalùmè ewu's wàkadìlongolola. Wàkaalukila. Tudi tusangana mu Kolintò Mwibìdì mwaba wàkadìsukulàye anu menemene kumpàlà kwa Nzambi.

¹⁰⁴ Tàngilàayi Yobò, muntu mupwàngàne, muntu mululàme. Kadi Nzambi's wàkaanyishiila nyuma mubi bwa kulwayè pambidi pèndè, ne kumunyooka, ne bikwabo byònsò bwa dipwàngaja dya nyuma wendè. Nwamònu anyi? Pa nanku nyuma mibì yitu ne. . . Nzambi ùtu misangu yàbùngì ùkwàta mudimu ne nyuma mibì bwa kukùmbaja ndongamu Wendè ne diswa Dyèndè.

95. Mpindyewu, lwà kapanda—mutù menemene ndwòlù elu, Lukonko (Ngeela meeji ne ùdi anu yèyè muntu umwèumwè awu, bwalu mbimwèke anu bu ne ncyanza cimwecimwe aci):

Byòbì ne muntu ùdì ne cya kwikala ne Nyuma Mwîmpè bwa kwikala—kwikala ne Nyuma Mwîmpè bwa kwikala mukùdimùne mucìma ne bwa kuya mu Dyambwibwa, ngiikàdilù wa bânà bàkaadi bafwè kumpàlà kwa bidimu bya dijingulula dya maalu neikalè cinyi? Ne bôbò abu nebàjuuke ku lufù dîbà kaayi?

¹⁰⁵ Mpindyewu, mwanèètu wa balùme, mwanèètu wa bakàji, ncyèna mwa kukwambila aci to. Kakwèna Mufùndù nansha wumwe pa bwalu abu mu Bible wùndiku mwa kupeta mwaba nansha wumwe to. Kadi ndi mèmè mwa kwamba cìdì àànyì meeji. Mpindyewu, eci necinùkànkàmikèku nwènù bàdì bìitabuujà ngàsà wa Nzambi abu. Nudi numòna's, muntu ewu mmuswe kumanya (bu mudìbi ne ndukonko lwîmpè lutàmbe. Nwamònu anyi?) muntu ewu mmuswe kumanya cìikalà dibìikà dya ku lufù—cìikalà mwa kwenzekela mwànà wa mu dibòko, pìikalàbi ne bìdì bikèngela bwa kwikalayè ne Nyuma Mwîmpè bwa kuyayè mu Dyambwibwa... Anu mungàmbi amu, ncyà bushuwa. Aci mbilondèshìle Bible. Aci ndilongesha dya mu Mifùndu. Kaciyi—kaciyi bwa kuya mu Dyulu to... Bwalu bantu bàdì bùle tètè ne Nyuma Mwîmpè mbìikalà mu dibìikà dya ku lufù dya kumpàla, Basungula. Kadi bàshàadilè bàà ku bôbò abu... Bakwabo bafwè kabàkwikala ne mwoyi to munda mwa bidimu cinunu. Paanyimà pà Bukalenge bwa bidimu cinunu, pashìishe dibìika diibìdì, cilumbulwidi cya Nkwasa Mutòòke munene. Nwamònu anyi? Aci cidi menemene dilondangana dya Bible. Kadi muntu ewu mmuswe kumanya bwalu bwa bânà bàà mu mabòko aba. Bôbò... Mu ngaakwilù mukwabo, bôbò bàkaavwa ne Nyuma Mwîmpè kumpàlà kwa kulediibwabò anyi? Bàkaavwa baMupetè anyi? Mpindyewu, aci mèmè ncyèna mwa kukwambilaci to.

¹⁰⁶ Kadi mpindyewu, twàmbèbi nunku ewu: Tudi bamanyè ne bânà bàà mu mabòkò bàdì bàfwa, baledi bààbò nansha biikàlè banganyì, bôbò mbasùngidìibwe. Mpindyewu, mèmè ndi mbèngangana ku mèyì ne cilongelu cya bapropetèta pa aci. Bôbò mbambè ne yèyè ní ùvwa—ní mmufwè mwikàle ne muledi mubiipe, ne mwànà awu mmufwànyine kuya mu iferno, ùbola ùbolelamù; bwèndè bwalu kabùciyikù kabidi to. Ee, Yesu... Yone wàkamba pàakalwà Yesu apu ne: “Mònaayi Mwànà wa mukooko wà Nzambi udi umusha mpekaatu wa bàà pa buloba.” Nunku mwànà ní ùvwa muntu wetu ewu, uvwa ne cya kupìcila ku dilumbulwisha dya Nzambi awu, pèndè Yesu's mufwe mbwà kuumusha mpekaatu, mpekaatu ne mpekaatu yònsò's wàkuumushiibwa kumpàlà kwa Nzambi pàakafwà Yesu bwa kiipàcilà aku apu. Mpekaatu yebe yàkafwidiibwa luse. Mpekaatu yànyì yàkafwidiibwa luse. Ne mushindu wumwepele wùdiku mwa kufwidiibwa luse ngwà kwitaba dikufwilà Dyèndè dya luse adi. Mpindyewu, mwànà wa mu dibòko kèna mwa kwitaba difwidiibwa dyèndè dya luse to, pa nanku yèyè kì

mmwenzè bwalu nansha bùmwè to. Kí mmwenzè bwalu nansha bùmwè to nansha kakese. Nenku kakùyi mpatà to yèyè ùdi ne cya kuya mu Dyulu kakùyi dibànzà to.

¹⁰⁷ Kadi newămbè ne: “Neàye mu Dyambwibwa anyi?” Mpindyewu—mpindyewu, edi ndíyì dyànyì mèmè mwine; aa mmeeji àànyì mèmè mpindyewu. Kanwikadi. . . Ncyèna mwa kujaadika cyôci eci ne Bible to. Kadi tàngilàayi. Piikalàbi ne Nzambi, kumpàlà kwa difùkà dya dyulu ne buloba, ùvwa mumanye muntu yònsò uvwa mwa kwikala pa buloba ewu. . . Nudi nwitabuuja aci anyi? Yèyè ùvwa mumanye kajiijijiji kònsò, nkùpà yònsò, dínà lujiiji lwònsò, Ùvwa mumanye kantu ne kantu kònsò kàvwàku mwa kwikala pa buloba. Piikalàbi ne Ùvwa mumanye nanku. . .

¹⁰⁸ Tàngilàayi. Twàngatàayi cileejilu, Mòsa. Mòsa pààkalediibwayè, ùvwa mupròfetà. Kumpàlà kwa Yelèmiya. . . Nzambi wákambila Yelèmiya ne: “Kumpàlà mene kwa wèwè kuvùngiibwa munda mwa mamwèbè, kumpàlà mene kwa wèwè kuvùngiibwa munda mwèndè, Mèmè nkàávwa mukumanyè, ne mukujiidile, ne mukujaadike mupròfetà wa bàà bisàmbà.” Yone Mubàtiji, bidimu nkàmà mwandamutekète kumpàlà kwa kulediibwayè, Yeshàayi wákamumòna mu cikèèna-kumòna, kwambayè ne: “Yèyè ndíyì dya ewu udi wela lubilà mu cipèèlà.”

¹⁰⁹ Didyànjila-kulongolola anyi didyànjila-kumanya dya Nzambi ndimanyè byònsò bya bânà bakese bàà mu mabòko (nwamònu anyi?), civwàbo ne cya kwenza. Ne Yèyè ùvwa mumanyè ne nebáfwe. Ùvwa mumanyè. Kakwèna cidi mwa kwenzeka Nzambi kàyi mucimanyè to. Kakwèna cidi mwa kwenzeka bwa. . . Anu mùdì Mulami Mwïmpè wa mikooko amu, mùdiYe ùbwela. . . Mpindyewu, bwa kwangata eci ku Mifundu, ncyèna mufwànyine kwamba ne Mufundu mmwambè *cikampàndà-ne-cikansanga* to. Ndi ncyàngata pàànyì anu nanku ne mmeeji àànyì.

96. Mpindyewu, lukonko lùdi lùlondà ndúndì mèmè ndyèlela meeji ne pámwàpa muntu kampàndà ùvwa pa címvwà mwambè dilòlò adi aci. **Umvwìjàku cya ne mukàji udi ùsùngidiibwa ku dilela dya mwànà aci.**

¹¹⁰ Mukàji kèna ùsùngidiibwa ku dilela dya mwànà nansha. Kadi twànji tùbuululàayi mpindyewu mu Timòtè wa Kumpàla 2.8 bwa katanci kakese cyanàànà. Nenku twànjàayi anu kujandula cidi Bible wàmba bwa mwànà. Mpindyewu, ndi mumanyè ne aci ndilongesha dya Katolike, mùdì beena Katolike bàmba ne mukàji ùdi ùsùngidiibwa ku dilela dya bânà, ku dilela dya mwànà. Kadi katwikadi. . . Mèmè ncyèna ngiitabuuja nanku nansha. Timòtè wa Kumpàla nshapità mwi2, tùbangilàayi ku mvensà wa 8, nenku tùbalè anu katanci kakese cyanàànà mpindyewu. Eyo, tèelejàayi.

Bya mwomumwe kabidi, bakàji beenu bàdilengèjè ne mwàdilu wa bupwekèle... (Kabivwa bikèngela bwa twètù kulomba ciine aci to, mmwômò anyi? Tèelejàayi eci nùnkù)... ne didipòpa; kabiyi ku diluka dya bipya bya nsukì yèndè, anyi ngòlò, anyi masàngà, anyi bilàmbà bya mushinga mukolè to; (Bànà beetu, ndi nnwàmbulwishakù kaaba aka, mündi ntèkemenà. Tufulu twònsò twà bijèngù tupyatùpyà etu ku ditùkù anyi matùkù ónsò àsàtù atu. Nwamònu anyi? Abi kí mbikùmbànyìne beena Kilisto to.)

Kadi (bìdi bikùmbànyìne bakàji bàdi bàmba mùdìbo ne difwànà dya Nzambi) biikàle ne byenzedi bìmpè.

Bakàji beenu bàyilè mu cinyàànyà mu dikòòkela dyònsò.

Kadi ncyèna ngiitaba bwa mukàji àlongeshè to, anyi àngatè bukòòkeshi kumutù... mulùme, kadi ikalè... mupùwe.

Bwalu Adàmà ngwàkenjiibwa dyàmbedi, ne pashiishe Evà.

...Adàma kí ngwàkaseeswishiiibwa nansha, kadi mukàji pàakaseeswishiiibwàye wàkasanganyiiibwa mu dishipa dya mikenji.

Kadi yèyè neàsungidiibwè ku dilela dya bânà pìikalàye... (Mpindyewu, kèna wàmbila mukàji wa pa buloba, udi ulela bânà awu to)... pìikalàye mutùngùnùke mu diitabuuja... (Nwamònu anyi? Pìikalàye mutùngùnùke. Yèyè ùkaadi... Kì mukàji udiyè wàmba nyèyè awu, mukàji ukàadi mumanè kusùngidiibwa awu. Nwamònu anyi?) ...ne dinanga ne cijila pàmwè ne didipòpa dyònsò.

¹¹¹ Kí ndilela dya mwànà didi dimuvwija musùngidiibwe nansha, kadi mpàdiye ùkolesha bânà, wènza wèndè mudimu, kàyi ùkolesha tumpuusù, tubwà, ne bikwabo byònsò abi bwa kwangatabi kaaba kàà mwànà, mùdìbo bènza leelu ewu emu to, bàbìpèèsha dinanga dya maamù bwa wàmòna mwa kwikala ùpàtuka ùya mu lunyaanya bufùkù bujimà. Bàmwè bantu's ki cidìbo bènza. Nwamfwilaayikù luse, kadi ncidìbo bènza. Awu ngaakwilù mukolè be bwa mèmè kwamba nanku, kadi bulelèlè bìdi anu bulelèlè. Nwamònu anyi? Bòbò kí mbaswe mwànà to bwa kushààlabò balamina panshi kùdiye. Kadi mu kulela kwa bânà, pìikalàye mutùngùnùke mu diitabuuja, cijila, ne didipòpa dyònsò, yèyè neàsungidiibwè. Kadi pìikalàbi ngudikù, wèwè neàsungidiibwè pèèbè, pìikalàbi ne udi mulediibwe cyàkàbìdi. Newikalè mwa kwondopiibwa pìikalàbi ne udi mwitàbùùje. Wèwè udi mwa kupeta Nyuma Mwìmpè pìikalàbi ne udi muMwitàbùùje, udilongolola Bwèndè Yèyè, pìikalàbi ne

udi mudilongòlòle Bwèndè Yèyè. Nenku yéyè neàsungidiibwè pìikalàbi ne mmutùngùnùke ne kwenza maalu aa (nwamònu anyi?), kadi kî nne bwalu mmukàjì to. Pa nanku aci ncyà bushuwa, mwanèètù wa balùme, mwanèètù wa bakàjì. Kî ndilongesha dya Katolike to nansha kakese. Mpindyewu ndi muswe. . . Lukwabo ndwòlò elu lùdì lukolè lwà menemene. Pashiishe tudi ne lukwabo kabidi. Ndi ngeela meeji ne tudi pàmwāpa ne dībà bwa kulwādamuna. Nkàadi mwangāte dībà dyònsò ditùvwā naadi. Mpindyewu, ebi bìdi anu—ebi bìdi anu bipeta bya paanyimà pàà ditàbuluja’s. Ebi mbipeta bya paanyimà pàà masangisha awu, nkonko eyi.

97. Mpindyewu: Mwanèètù Branham (mbalùtuutè ku màshinyi a mikàndà), kùdikù Mufùndù bwa muntu wākula mu myakulu ne wādamuna mukenji wèndè yéyè mwine anyi? Byòbi nanku, swàku ùmvwijè. Kolintò wa Kumpàla anyi Kolintò 14.19 ne Kolintò 14.27 kabidi.

¹¹² Eyo, tūyaayi ku Mufùndu awu bwa tūmonè cidìwu wamba. Ne pashiishe netūmonè ní tudi tulama cyòci eci mu Mifùndu. Tudi baswè misangu yònsò kwikala anu mu Mifùndu. Ne Kolintò 14. Mpindyewu, muntu ewu mmuswe kumanya ní mbya mu Mifùndu pàdi muntu wādamuna mukenji wèndè yéyè mwine wùdiye mufilè ku dyakula dya mu myakulu. “Byòbi nanku, swàku ùmvwijè Kolintò 14.19.” Tūmonèbi, 14 kùdì 19. Eyo, tudikù.

Kadi mu maèkèleeziyà ndi. . . mbîmpè bwa mêmè kwakula myakù yitaanu ne lumvu lwànyì, bwa ku dîyi dyànji ngaamòna mwa kulongeshakù bakwabo kabidi, pamutù pàà binunu dikumi. . . mu. . . myakulu myenyi.

Mpindyewu, udi ulonda mmvensà wa 27, udiyè muswe kumanya.

Muntu yéyè wākula mu mwakulu mwenyi, cìikalè kùdì babidi, anyi ku. . . bôbò bààbùngì basatu, ne ciine aci ku muntu ku muntu, ne muntu umwe àdamunè.

¹¹³ Mpindyewu, ndi ngangata kùdì muntu ewu ùteeta kafika (cìndì muswe—nènnùbadilè cintu kampànda katanci kakese cyanààna). Kadi ndi ngeela meeji ne kùdì mwanèètù wa balùme anyi wa bakàjì ewu ùteeta kafika nku ne: “Mbikùmbàne bwa muntu udi wakula mu myakulu bwa kwandamunayè kabidi mukenji wùdiye mufilè awu anyi?” Mpindyewu, mulundà wanyì munanga, bu wèwè anu mwa kubala mvensà wa 13 mu nshapità umwèumwè awu, neàkwambilè:

Ki bwa cinyi ewu udi wakula mu mwakulu mwenyi àsambilè bwa yéyè kwandamuna.

¹¹⁴ Bushuwa’s. Yéyè ùdi mwa kwandamuna mukenji wèndè yéyè mwine. Mpindyewu, bu twètù anu mwa. . . Twànjàayi anu. . . Ee,

wêwè. . . Balà cyônsò aci kaaba aka, nenku neùmonè ne Cidi. . . Balà anu nshapità mujimà awu. Mwîmpè be, ùdi ùcyùmvwija.

¹¹⁵ Mpindyewu, dyakula dya mu myakulu. . . Mpindyewu, patùcidipu apa. . . ne bu mùdi eci munkaci mwa kukwàciibwa pa mikàbà ya mēyì, ndi muswe kwamba ne ndi ngiitabuuja dyakula dya mu myakulu anu mûndi ngiitabuuja dyondopa dya kùdi Nzambi amu, ne di—dibàtiiza dya Nyuma Mwîmpè, dilwa dya Cyàkàbìdi dya Kilisto, ne bukolè bwa buloba bùcìvwavwà; ndi ngiitabuuja cyôci aci anu mûndi ngiitabuuja, kadi ndi ngiitabuuja ne dyakula dya mu myakulu didi ne kàadi kaaba anu mùdi dilwa dya Kilisto ne kàadi kaaba amu; dyondopa dya kùdi Nzambi didi ne kàadi kaaba; bintu byônsò bìdi ne kàabi kaaba.

¹¹⁶ Mpindyewu, kunùdi nwênù, ndi mupetèku mpungà bwa kwamba byôbi ebi mpindyewu, ne ndi muswe kubyùmvwija. Kadi mēmè mutàpe muntu ku mwoyi, kî nku bukole to. Ncyèna ne meeji a kufila cibwejàkàji to. Kadi tèlèjàayi. Lutàtù lùtùbo naalu kùdi beena Mpenta mu dyakula dya bwa myakulu myenyi (cìndi mēmè mwine; ndi mwena Mpenta. Nwamònu anyi?). . . Mpindyewu, citù lutàtù ncyôci eci: ncyà ne kabàtu bàbìneemeka to. Ne cikwabo cintu, bàdi bôbò bàbìlekela anu mùyaayàbi amu. Kabèena bàalukila ku Dìyi to.

¹¹⁷ Mpindyewu tèlèjàayi. Mushindu ngwôwò ewu—lekèlaayi—mushindu ngwôwò ewu wùdi ekeleeziya ùlongolodiibwa. Mpindyewu, mu ekeleeziya wa beena Mpenta, bu mēmè mwa kwikala mpaasàtà wa ekeleeziya ewu, nēnnwāmbilè mûndi mufwànyine kumulongolola (nwamònu anyi?), bu ne mvwa—bu ne mvwa kaaba aka dibà dyônsò bwa kwikala mpaasàtà wendè. Mvwa mufwànyine kwitaba dipà dyônsò dya mu Bible. Kwanji kwambila beena kwitabuuja bwa kubàtijiibwabò mu Nyuma Mwîmpè. Ne pashiishe, bìvwa bikèngela bwa dipà dyônsò dya mu Kolintò wa Kumpàla 12 kwikaladi dikwàta mudimu mu ekeleeziya wanyi, bu mēmè mwa kuàpetamù, mubidi mujimà wùkwàta mudimu.

¹¹⁸ Mpindyewu, nwênù baswè kumòna. . . Mpindyewu kî mmēyì a kadyuwù ngamba to. Ne vùlukàayi ne, ncyènakù mufwànyine kwamba dīyì nansha òimwè dibèngàngàne to—ndi mufwànyine kupenda Nyuma Mwîmpè. Ne Nzambi mmumanye ne ncyènakù mufwànyine kucyàmba bibi to. Nwamònu anyi? Kadi ndi ngamba eci anu bwa kunùpèeshakù mmwènenu wa Mifùndu paanyimà pàà mēmè mumanè kucìlonga mpindyewu munda mwa bidimu makumi abidi. Ndi nyiisha kùkaadi bidimu bitwè ku makumi asatu. Ne ndi anu mupìcile mu bintu byônsò, mupàndùke ànu bwoyà mu cibàalà's; s'nudi mwa kudifwànyikijila mùvwàbi mwa kwikala. Ne ntàngila muntu ne muntu, ne dilongesha dyèndè, pa buloba bujimà. Ne mbyàngata bwalu mbwa dyàkalenga dyànyì. Mbwa dyàkalenga dya bantu pa kuumusha anu dyànyì mēmè mwine to. Bidi bikèngela ngùumukè

pànwapa. Bidi bikèngela bwa nwènù nùumukè pànwapa. Kadi mémè muumukè bu mupròfetà wa mashimi, nènjimijè musuùkà wànyì sungasunga ne nènjimijè misuùkà yenu pàmwè naanyì. Pa nanku ncitàmbe ne—ncitàmbe ne cyàkudyà cya bwàcyàbwàcyà; ncitàmbe ne dimanyika; ncitàmbe ne cintu cikwabo kanà cyònsò; cidi Mwoyi bwànyì mémè. Nwamònu anyi? Nenku ndi muswe kwikala misangu yònsò anu ne meeji matòoke matàmbe kwikala a ndòndò.

¹¹⁹ Mpindyewu, paùdi ubwela mu ekeleeziya kampànda wa Mpenta, cintu cya kumpàla. . . (Ncyèna nswà kwamba ne nyònsò to. Yìmwè ya kùdiyi yidi. . .) Misangu yàbùngi paùdi ubwela mu ekeleeziya kampànda ne ubanga kuyiisha; paùdi uyiisha apu, muntu ùjuuka wàkula mu myakulu. Mpindyewu, munanga awu ùdi mwa kwikala anu menemene mùle tètè ne Nyuma Mwímpè, ne cidi mwa kwikala Nyuma Mwímpè wàkwila mu muntu awu, kadi bwalu bùdi ne, kí mmulongèshìibwe to. Mudimu wà bwambi ewu pa cibùmbà cya ku cyambilu piikalàbi ne wùdi wàkula ku disonsodiibwa, nyuma wa bapròfetà ùdi ùkòokela mupròfetà. Nwamònu anyi? “Bintu byònsò byènjiibwè. . .” Mpindyewu, ndàayi kùdi Pòlò kaaba aka nùmonè bwa cinyi ùdi wàmba ne “pàdi umwe wàkula,” ne bikwabo. . . “pàvwàye ùbwela, mùvwa anu cibwejàkàji pa cyòci”

¹²⁰ Mpindyewu, mémè ngenza dibìikila dya ku cyoshelu, muntu ùjuuka wàkula mu myakulu. S’cidi anu. . . Ee, s’mbipiciibwe ne mwimànyike dyenza dya dibìikila dya ku cyoshelu adi’s. Bidi bidìimanyika’s. Nwamònu anyi?

¹²¹ Ne pashìishe, cikwabo cintu. Misangu yàbùngi bantu bàdi bàjuuka bàakula mu myakulu, ne bantu basòmbe bàcyànkunya bàzòkà, munkaci mwa kukènzakana. Nzambi Yèyè wàkula, shàala mupùwe, tèèlejà! Piikalàci Bulelèlè, cyòci ciikàle Nyuma Mwímpè wàkwila mu muntu awu, shàala mupùwe ùteelejè, ikalà ne kaneemu. Mbifwànyine kwenzeka ne dyandamuna dilwe kùdi wèwè. Nwamònu anyi? Sòmba mupùwe; tèèlejà bwa dyandamuna. Mpindyewu, kwòkò kakùyi mwandamunyi mu ekeleeziya to, dibà adi bantu bàdi ne cya kushàala bapùwe mu Mubidi.

¹²² Nenku dibà adi, pàdibo bàakula mu mwakulu mwenyi, Bible mmwambe ne, bàdyàkwilè bóbò biine ne Nzambi. Ewu udi wakula mu myakulu myenyi ùdi ùdikolesha yèyè mwine. Mpindyewu, ki myakulu myenyi nyòyi ayi: mishindu ya mwakulu, myakulu mbishìilàngàne. “Bidi bintu cyanàànà,” mùdiye wàmba. . . Kadi cidi cipàtulà díyi cidi ne cidici cyàmba. Kadi nwènù. . . Mpungi yèyè ùpàtulà díyi, bikèngela ùmanyè mùdiye ùpàtulà díyi adi (. . .mwelè wèwè anu cyanàànà) pàtupù kwàkumanya mwa kudìlongolola ku mvità to. Muntu yèyè wàkula mu myakulu, wènza anu “tuut”; piikalàbi ne ki cyònsò cidiku pa bwalu abu, cya ne nganyi wàmanya cya dyenza. Kadi yèyè ùpàtulà díyi dya *ditàbulujangana*, didi

dyùmvwija ne “juukàayi panshi!” Yèyè ùjima *midilu*, cidi cyùmvwija ne “lààlaayi panshi.” Nwamònu anyi? Yèyè ùtuuta *màzaji* cidi cyùmvwija ne “asàayi màzaji.” Bìkèngela cìfilè dyumvwija kampànda, kabiyi anu kwakula nàka to. Pa nanku mu ekeleeziya, kwòkò kakùyi mwandamunyi to, kadi kwòkò mwandamunyi, dìbà adi myakulu yìdi ne kàayi kaaba mu ekeleeziya amu.

¹²³ Mpindyewu, ku lukonko lwebe, mulundà munanga, lùdi lwàmba ne: “Mbipicìibwe ne mèmè mwakùle myakù binunu bitaanu. . .yitaanu, mu mushindu wà bantu mwa kungumvwa pamutù pàà binunu bitaanu (anyì cinyì cikwabo cìdici cyàmba) mu mwakulu mwenyi.” Aci’s ncilelèlè. Kadi tùngunukà ne kubala: “. . . ambà anu ciikàle ku dibuulula anyì ku dyandamuna bwa dikoleshangana.” Nwamònu anyi? Bwa kukoleshangana.

¹²⁴ Mpindyewu, nènnpèèshèku anu kaadyeji kakese kàà ne kadi bu—kadi. . . Bu ne mvwa mpaasàtà wa ekeleeziya ulwàlwa ewu, bu Nzambi mwa kumbiikila bwa kwikala mpaasàtà wendè, mushindu wùndi mufwànyine kumulombola ngwòwò ewu: Ndi mufwànyine kuteeta kupetakù muntu yònsò udi ne dipà muntwamu. Ne mvwa mwa kulomba bwa bantu abu kudisangishabò bu dìbà dijimà nanku kumpàlà kwa masangisha kubangawù, mu cibambalu cya pàà nkààyabò. Kubàlekela bàsòmba mu bwenzeji bwa Nyuma. Nenku katancì aka, muntu ùlwamù, mwikàle ne dipà dya dyakula dya mu myakulu. Nenku ùdi wàkula mu myakulu. Bònsò bàshààla basòmbè bapùwe. Ne pashìishe mukwabo ùjuuka wàndamuna cidi yèyè awu wàmba aci. Mpindyewu, kumpàlà kwa cyòci aci kufidiibwaci kùdi ekeleeziya, Bible ùdi wàmba ne bìkèngela bàcìjingùlùle kùdi bantemu babìdi anyì basatu. Mpindyewu, abu mbantu bàdi ne dijingulula dya nyuma (nwamònu anyi?), bwalu misangu yàbùngì makolè mabi àtu àbwelamù. (Nwamònu anyi?) Pòlò wàkacyàmba. Kadi dìbà adi, bukolè bwa Nzambi bùdimù pààbù. Ngambilaayi disangisha dìdi bubì kabùyi bùsanganyiibwamù. Ngambilaayi mwaba wùdi bàna bàà Nzambi basangile wùdi Sàtaana kàyi munkaci mwabo. Mmu byònsò’s. Pa nanku kubiipishi kwìsù bwa aci to. Nwamònu anyi? Sàtaanà ùdi myaba yònsò. Mpindyewu, ki bwalu abu’s. Muntu kampànda wàkula mu myakulu. Mpindyewu, kùdi basatu basòmbè mwaba awu biikàle ne Nyuma wa dijingulula. Nenku umwe wàkula mu myakulu ne ùfila mukenji. Mpindyewu, kacỳèna mwa kwikala ditèèlè dya Mufùndu to, bwalu Nzambi kàtu ùkwàta mudimu ne dyambulula dìdi kadiyi ne musinga to, ne Yèyè mmutwàmbile bwa katùcyènjì to. Nwamònu anyi? Pa nanku kì ng’aci to. Mmukenji mutùmina ekeleeziya.

¹²⁵ Tudi bapetè bintu bibidi mu ditàbuluja edi bwa too ne mpindyewu. Tàngilàayi ne cyònsò cya ku byòbì cìvwa—cipwàngàne, mu kantu ne kantu kònsò. Nwamònu anyi? Cibwelè mu mudimu. Muntu umwèpelè mujuukè kuulu,

mwakùle mu myakulu, ne bafile dyandamuna, ne mwalùkile buludì ne mushindike mukenji wùvwà mufùme ku dipàtuka awu. Mukwabo wàkajuuka dilòlòlò adi, ne mwambè ku—ku disonsodiibwa dya cipròfetà, ne mwambè cintu kampànda, kàyi mumanyè civwàye wàmba aci to; kadi pashìishe ku ndekeelu kwambayè ne dìyi dikolè ne: “Wa disànka ng’ewu udi ulwa mu Dìna dya Mukalenge.” Ne lùkàsà lwònsò cintu kampànda kunkwàtaci ne kwambaci ne: “Mu mushindu mukwabo wa disànka ng’ewu udi witabuuja ne eci m’Mukalenge udi mulwè.”

¹²⁶ Mònaayi munda amu—dìbà adi ki Nyuma Mwìmpè kumataYè mu citanda makèèlèlè dilòlòlò awu. Nwamònu anyi? Aci mbwà dikoleshangana. Mvwa mwimàne mwaba awu nteeta bwa kwambila bantu ne bàvwa ne cya kupeta Nyuma Mwìmpè. Kadi dyabùlù ùvwa mulwè mu nyungulukilu wa bantu amu, wàmba ne: “Kanùtèeleji to; shààlaayi bapùwe.”

Mwakùnyàànyi wa bakàji kwambayè ne: “Bill, mvwa ne disànka dyàbùngì be paùvwà uyiisha apu; mèmè kudyùmvwà anu bu ne mvwa mwa kajuuka kutùpika mpicila mu cimanu’s.”

Mèmè ne: “Juuka ùtupikè’s.” Ki cyònsò cidiku.

Ki kwambayè ne: “Kadi wèwè mubange kwenza nanku,” ki yèyè ne, “bantu’s nebàbangè kwela mbilà,” yèyè ne, “dìbà adi mèmè kudyùmvwà anu bu ne mvwa kantu cyanààn.”

¹²⁷ Mèmè ne: “Awu’s ndyabùlù. N’Sàtaanà awu. Pààluyè kwenza nanku awu apu,” mèmè ne, “bivwa bìkèngela anu wèwè kajuuka nansha bìshi.” Twètù’s tudi baakwidi bàà Nzambi, biikàle tufila mulàmbù—mulàmbù wà nyuma, mamuma a mishikù yetu biikàle tutùmbisha Dìna Dyèndè. Nwamònu anyi?

¹²⁸ Mpindyewu, mpindyewu, cyènzèki ncyeci. Dìbà adi Nyumà Mwìmpè kubwayikaYè, bwalu civwa anu. . . “Wa disànka ng’ewu udi witabuuja.” Malòlòlò abidi, anyi asatu malondàngàne mùndì muteetè kwadija aci mwòmò amu; ki pashìishe, Nyuma Mwìmpè kwakulaYè e kwamba (ku disonsodiibwa’s) kwamba ne: “Wa disànka ng’ewu udi ulwa mu Dìna dya Mukalenge.” Kadi kumpàlà kwa mèmè kwamba nì ncinyi nì ncinyi, nkààvwa mucyàmbè cyònsò. “Wa disànka ng’ewu udi witabuuja ne Mukalenge mmulwè mu eci.” Nudi numòna anyi? Nenu ki cyòci cìndi mfùma ku dyamba eci ne, Nyuma Mwìmpè n’Nzambi Yèyè mwine munda mwebe. Nwamònu anyi? Nenu bôbò kucibàkula. Nwamònu anyi? Ki dìbà adi Nyuma Mwìmpè kupòna munkaci mwa bantu amu. Nwamònu mùdiYe—mùdiYe ùkoleshangana anyi, cipròfetà aci?

¹²⁹ Mpindyewu, kùdi dishiilangana pankaci pàà cipròfetà ne mupròfetà. Cipròfetà cidi cyùmuka kùdi muntu ciya kùdi mukwabo, kadi mupròfetà mmulela mupròfetà kubangila anu ku kalààlù. Bàdi bôbò ne EMU MMÙDÌ MUKALENGÈ WÀMBA! Kakwèna dibàlumbulwisha to. Kwèna umòna bìimana kumpàlà kwa Yeshàayi, anyi Yelèmiyà, nansha umwe wa ku bapròfetà

abu to, bwalu bàvwa ne EMU MMÙDÌ MUKALENGE WÀMBA! Kadi nyuma wa cipròfetà munkaci mwa bantu; bikèngela nùmutabàlèlèlè, bwalu Sàtaanà neàdifindemu. Nwamònu anyi? Mpindyewu. Kadi cìdi ne cya kujinguludiibwa.

¹³⁰ Mpindyewu, netwikalè—netwikalè mwa kwenza ditàbuluja. Mpindyewu, eci nùcitàbàlèlèlaayi ne ntèmà yònsò mpindyewu, nwènù bambi. Tudi pabwìpì ne kwenza ditàbuluja. Eyo. Anyi pàmwàpa tudi twenza anu disangisha dya ciibidilu dya ekeleeziya. Ekeleeziya ùdi ùlákuka kapyà. Bivwa bikèngela kwikalabì nanku díbà dyònsò. Ee, pàmwàpa tudi ne bantu bataanu anyi bàsambombo bàdi ne mapà; umwe wàkula mu myakulu, babidi anyi basatu pàmwàpa bàkula mu myakulu, banaayi anyi bàtaanu biikàle ne myakulu, biikàle ne dipà dya myakulu, bààkula mu myakulu myenyi. Babidi anyi basatu bàà kùdìbo biikàle mwa kwandamuna. Pàmwàpa kùdi umwe—babidi, anyi basatu bàà kùdìbo biikàle ne mapà a lungenyi. Eyo. Bàdi bàdisangisha bònsò, bantu bàdi ne mapà abu. . . Nwènù. . . Mapà awu mmanùpèèbwe kí mbwà kunaya naawu to, kí mbwà kwamba ne: “Butumbi kùdi Nzambi’s wè, mèmè ndi ngaakula mu myakulu! Aleluuyah!” to. Newikalè—udi—udi udìpwekesha wèwè mwine milongo. Mmanùpèèbwe mbwa kukwàta naawù mudimu. Nenu wèbè mudimu mu ekeleeziya bivwa bikèngela kulwawù kumpàlà kwa disangisha dyena diìnà kubangadì, bwalu ewu udi kàyi mulongèshìibwe neikalè munkaci mwetu.

¹³¹ Díbà adi nudi nuya pàà nkàayènu mu cibambalu aci, ne nusòmba muntwamu, nwènù bònsò pàmwè, bwalu nudi bakwàcishanganyi mu mudimu wà Evanjeeliyo. Díbà adi nudi nusòmbamù. “Mukalenge, kùdikù cintu cyÙdi muswe bwa twètù kumanya dilòlò edi anyi? Akùlaaku neetu, Éyi Taatù wa mu Dyulu,” nwenza disambila, misèngeleelu; nwimba misambu. Dyàkàmwè Nyuma ùtùùluka, wìkila muntu kampànda, awu wàkula mu myakulu. Muntu ùjuuka wamba ne: “EMU MMÙDÌ MUKALENGE WÀMBA.” Ncinyi aci? Tèelejàayi. “Ndàayi nùkambilè Mwanèètù Jones àmwanгалè mwaba wùdìye musòmbèle awu, bwalu mààlabà mu mapingaja nekùlwe mvùla wa kajoomona wànyangakaja citùpà cya buloba aci; ne neàjoomonè nzùbu wendè awu. Àngatè bintu byèndè àkebè kwa kuya àye!”

¹³² Mpindyewu, aci’s—aci’s cìdi cyùmvwikakù cìmpè. Kadi nwindilè kakese. Bìdi bikèngela mwikalè bantu basatu biikàle ne Nyuma wa dijingulula. Umwe wa kùdìbo wamba ne: “Cìvwa cya kùdi Mukalenge.” Mukwabo wamba ne: “Cìvwa cya kùdi Mukalenge.” Abu mbantèmù babidi pa basatu—babidi anyi basatu. Eyo. Bàdi bàcifùnda pa dibèjì dya mukàndà. Aci ncìdi Nyuma mwambe. Eyo. Bààlukila ku disambila, biikàle bàsàkidila Mukalenge.

¹³³ Paanyimà pàà katanci: “EMU MMÙDÌ MUKALENGE WÀMBA (mupròfetà ùdi ùjuuka kuulu) EMU MMÙDÌ MUKALENGE WÀMBA, dilòòlò edi, nekùlwe muntu mukàji ùfùmina ku New York City; ùdi mu kalààlù kàà dyambwila babèèdi; nèabwelè mu citanda emu mwambwila mu kalààlù kàà dyambwila babèèdi. Udi ne mushwalà wà munshingù wà màyi a matàmbà mudijingila ku mutù. Ùdi ùpùnga ne lufù lwà kànsèrè. Cidì cyenzè bwa kwikalayè mu mushindu awu, Mukalenge ùdi nendè cilumbù: musangu kampànda yèyè wàkiiba mfrangà ya mu Ekeleeziya Wendè pàcìvwàye ne bidimu dikumi ne bisambombo. Ambilaayi Mwanèètù Branham àmwambilè maalu awu. EMU MMÙDÌ MUKALENGE WÀMBA, yèyè mulongòlòle bwalu abu, neòndopiibwè.” Nwindilè katanci. Aci’s ncyumvwike cìmpè cya dikèma, kadi nwindilè katanci. Neùfundè dìnà dyebe pa dibèji dya mukànda adi anyi, wèwè mujinguludi? Neùfundè dìnà dyebe anyi?

¹³⁴ “Cìvwa cya kùdi Mukalenge.” Umwe wàmba ne: “Cìvwa cya kùdi Mukalenge.” Dìbà adi—dìbà adi nudi nucifùnda ne: “EMU MMÙDÌ MUKALENGE WÀMBA, dilòòlò edi nekùlwe muntu mukàji, bwalu *kampànda*.” Ewu udi ne dijingulula dya nyuma, babidi anyi basatu bàà kùdìbo bàdi bàfundapù mènà àbò. Mikenji yònsò ayi yidi yìfidiibwa. Eyo.

¹³⁵ Pashìishe paanyimà pàà katanci bàdi bàbanga kuumvwa kangonga kàdila. Ekeleeziya wàbangì. Pashìishe bàdi bàlwa ne mikenji ayi, bàyitèeka anu pa cyambilu apa. Anu apa mpàdiyì ne cya kutèekiibwa. Mèmè ndi mwaba kampànda ndonga, nsambila. Paanyimà pàà katanci mpàtuka paanyimà pàà misambu munkacì mwa kwimbiibwa. Ekeleeziya yònsò mujimà ùdi mu bulongàme, bantu bènda bàlwa, bàsòmbe, bèèlangana meeji, bàsambila; ki cidì cikèngelà bwa nwènù kwenza. Kì nkulwa mu ekeleeziya kuditwa mu diyikilangana muntu ne mukwèndè to, nudi nulwa mu ekeleeziya mbwa kuyiikila ne Nzambi. Enzèlaayi bwobùmwe bwenu pambèlù pàapa. Nwamònu anyi? Nzambi ngutùdi twenza Nendè bwobùmwe mpindyewu. Kadi twètù tudi tulwa apa twakula, bintu byònsò mu cimùmà, mu kaneemu kònsò, Nyuma ùkwàta mudimu. Mwimbi wa cisanji cya pyànò ùdi ùlwa ku cisanji aci tusunsa tutwè ku tutaanu kumpalà kwa dimbisha dya misambu kubangadi, ùbanga bitùlùbitùlùlù menemene ne:

Ku nkùrusè kwàkafwilà Musùngidi wanyì,
Kùngààkadilà mwadi bwa kukezudiibwa ku
mpekaatu;

Anyi musambu kampànda mwímpè ne mutalàle, bitùlùbitùlùlùlù menemene. Wòwò awu wùdi wùbweja Bwikadi bwa Nyuma Mwímpè mu disangisha. Nwamònu anyi? Eyo.

¹³⁶ Bantu mbasòmbe mwaba awu. Bàmwè bàà kùdìbo bàdi menemene—bàbanga kudila myadi ne bàlwa ku cyoshelu,

bànyingalala kumpàlà mene kwa disangisha kutwàdijadi. Nyuma Mwimpè ùdi mwaba awu. Nwamònu anyi? Ekeleeziya ùdi mu didinyèngà dya pa kulela. Beena Kilisto bàdi munkaci mwa kusambila, bàkaadi pa myaba yabo. Kí mbasòmbemù biikàle bàcyànkunyangana ne bàzòkà, bàmba ne: “È, Liddie, mpèèshèku kàpèntà kèèbè aku; ndi muswèku. . . Udi mumanye’s. Udi mumanye’s. Ndi dijinga ne. . . Udi mumanye’s, ditùkù adi pàmvwà muyè kuntu kwàka mukasùmbe bintu ku màkàjiiyè apu, ndi nkwambila’s, nkààvwa mwambe kukudyata pa bàna bàà nkàsà’s. Nkààvwakù mumòne cya nanku. . . Udi wela pèèbè meeji kaayi bwa bwalu abu?” Kaa, luse’s wè! Kadi kubiikila aci ne nnzùbù wa Nzambi. Mòna’s, s’mbundù. Mubidi wà Kilisto munkaci mwa kudisanga. Ki twètù bàdi basòmbemù abu.

Muntu musòmbè ku luseke aku ne: “Twàmbè ne, udi mumanye patùvwà bayè kuntwaku, *cikampànda* ne *cikansanga* eci. . .” Aci ncìmpè bwa pambèlu, kadi mùneemu nnzùbù wa Nzambi.

¹³⁷ Bwelàayi biikàle mu disambila; sòmbaayi pa myaba yenu. Mpindyewu, ncyèna ngambila ekeleeziya yenu to, nwènù bàna beetu. Ncyèna mumanye cinùtu nwenza to; bàndi ngambila mbeena tabernacle ewu. Ndi ngambila bàànyì mèmè bàà kwànyì kumbèlu. Nwamònu anyi? Ncyà bushuwa.

¹³⁸ Mpindyewu, panùdi nubwela mushindu awu, pashìishe katanci aka, mpaasàtà ùpàtuka. Ùdi mu citaleela. Kabyèna bikèngela bwa kwikaleyè wàndamuna *cikampànda*, *cikansanga*, ne *cikankènga* to. Ùdi ùpàtuka buludì mu—mu cyashima cya mudimu wèndè wà bwambi. Ùvwa ùsanganyiiibwa mwinshì mwa bukolè bwa Nyuma Mwimpè. Ùdi ùbwela buludì mu mwaba wùdi ndimì mikwabo ya kapyà mitwilàngànle awu. Ncyambè kwikala dikunji mpindyewu (nwamònu anyi?), didi munkaci mwa kunyunguluka. Ùdi ùpàtuka apa, wàmbula eci. “Mukenji wà kùdi ekeleeziya: ‘EMU MMÜDÌ MUKALENGE WÀMBA, Mwanèètù Jones àmwangalè ku nzùbù kwèndè aku. Mààlabà mu mappingaja pa díbà ibidi jaajaaja mvùla mukolè wa kajoomona neànyangakajè citùpà cya buloba cidìye aci. Àmbulè bintu byèndè àkwatè njila àye.’” Mwanèètù Jones ùdi wàngata aci. Eyo. Aci twàlamì. “EMU MMÜDÌ MUKALENGE WÀMBA, nekùlwe mukàji kampànda kaaba aka dilòòlò edi dìnà dyèndè *Kampànda*, ne cìvwa—mmwenze *cikampànda*.” (Múngáfumu ku dyamba amu, nwamònu’s, mushindu awu.) Eyo, aci nciitèka mwaba awu. Ki cyòci aci. Bàkaadi mpindyewu bamanè kusòmba pa myaba yabo mu ekeleeziya. Eyo.

¹³⁹ Pashìishe ùdi wàngata mukenji awu. Nenku katanci aka, ùdi ùbanga kuyiisha. Kabyèna bikèngela bwa cintu nansha cimwè cicyamakanè to; cikaadi cimanè kwenzeka. Mpindyewu, tudi tutungunuka, tudi tuiyisha diyiisha.

¹⁴⁰ Ne paanyimà pàà katanci pàdì. . . Katanci aka pàdì diyiisha ne dyàjiki, mulongo wà dyondopa wùdi wùbanga. Ki muntu mukàjì ulwàlwa ewu. Muntu kampànda ùvwa mwakùle mu myakulu mwambe ne mukàjì awu ùvwa ùlwa. Nwamònu anyi? Yònsò wa kutùdi mmumanye ciikalà mwa kwenzeka. Yònsò wa kutùdi mmucimanyè. Mònaayi mùdi diitabuuja dibanga kwibakiibwa ku ndimi ya kapyà yìdi miimàne kumutù kwenu aku ayi mpindyewu. Dyàbangi kuungwila mushiki. Mòna's, cidi anu mudimu mumana kujikija; kwàjiki.

Mukàjì awu. . . Nèngàmbè ne: “Màdamù *Kampànda*, wa mu New York City, musòmbè kaaba aka. . .” Nwamònu anyi?

“Kaa, ncyà bushuwa's. Udi mumanye ciine aci bishi?”

“Mmukenji wà kùdi Mukalenge mutùmina ekeleeziya. Paucìvwà ne bidimu dikumi ne bisambombo, kùvwakù mu mwaba *kampànda* ne mwenzè—mwàngate mfrangà kampànda mu ekeleeziya, ne muyìbè, mupàtùke muyè, ne mukasùmbe naayi bilàmbà bipyabìpyà anyi?”

“Kaa, aci ncyà bushuwa. Ncyà bushuwa.”

“Ncyòci aci menemene cidi Nzambi mutwàmbile dilòlò edi mwambidile kùdi Mwanèètù *Kampànda*, mwakùle mu myakulu; Mwanèètù *Kansanga* mwandàmune; Mwanèètù *Kankènga* ewu mwambe, mwena dijingulula, mwambe ne cìvwa cya kùdi Mukalenge. Ne mbulelèlà.”

“Eyowa's!”

“Nenku, EMU MMÙDÌ MUKALENGÈ WÀMBA, ndà ùkacìlongòlòlè, nenku newòndopiibwè kànsèrè keebe aku.”

¹⁴¹ Mwanèètù Jones wàlukila kumbèlu, wàngata matempu, wàlukila, wàngata nkwasà yèndè ne mèèsà, ùmba ùmwangala ne mwine mwaba awu. Pa dìbà ibidi jaajaaja mààlabà mu mapingaja: Bùù! ncintu cyònsò nkòong cìyaaya cyàcya. Nwamònu anyi? Dìbà adi ekeleeziya ùdi ùtùmbisha. . . “Twasàkidila, Mukalenge Yesu, bwa bwímpè Bwebe.” Mpindyewu, ki mùdi bwalu nanku, bwa kwibaka, bwa ekeleeziya.

¹⁴² Mpindyewu, kadi cyòci kacìyi cyenzèke paanyimà pàà bòbò bacyàmbè? Dìbà adi nudi ne nyuma mùbì munkacì mwenu. Kanwèna baswè cintu cibì aci to. Bwa cinyi nuswà cintu kampànda cya cibì pàdì ma—maulu mùle tètè ne bya bushuwa bya Mpenta? Kanwàngaci mupinganyi wà kalekale wà kùdi dyabùlù awu to. Angàtaayi cintu cìlèlèlà. Nzambi ùdi naaci bwenu nwènù. Dìbà kanwènjikù kabidi masangisha to, ne kanùtèèki cintu kaaba aka to, too ne pààshìndikà Nzambi ne nudi nwàjaalàmì, bwalu nudi mukwàcishi wa ekeleeziya mu dikwàtè dya mudimu dya Evanjeeliyo. Mpindyewu, nwacyùmù ne ncinyi anyi?

143 Nenku myakulu, myakulu myenyi. . . Muntu nansha umwe udiyè—kí mmumanye cidiye wàmba to. Yèyè ùdi wàkula; kadi díyì dyònsò ditu ne dyumvwija kampànda. Aci cidi ne dyumvwija kampànda. [Mwanèètù Branham ùdi ùtuutakaja byanza—Muf.] “Klak, klak, klak!” Aci cidi ne—aci cidi—aci cidi mmwakulu mu mwaba kampànda.

144 Pàmvwà mu Afrike, neivwakù neitàbuuja to, kadi cintu cyònsò cívwa cyènza mutooyi cívwa ne dyumvwija dya mushindu kampànda. Bible mmwambe ne kakwèna díyì nansha òmwè didì kadiyi ne cidìdi dyàmba, kadiyi ne dyumvwija to. Díyì dyònsò dikaadiku dipàtùdiibwe edi didì ne dyumvwija bwa cintu kampànda. Mòna’s, mvwa mwa kuumvwa bantu bàmba. . . Mvwa ngamba ne: “Yesu Kilisto, Mwànà wa Nzambi.”

145 Umwe wa kù bòbò ùvwa wènza ne [Mwanèètù Branham ùdi ùpàtula díyì dya mwandamunyi wa beena Afrike—Muf.] Mukwabo wàmba [Mwanèètù Branham ùdi ùfla cyàkàbidi cifwànyikijilu—Muf.]. Ne ciine aci cívwa: “Yesu Kilisto, Mwànà wa Nzambi.” Nwamònu anyi? Cívwa ne. . . Kadi kaciyi ne dyumvwija nansha òmwè bwànyì mèmè to, kadi kùdìbo bòbò cívwa mmwakulu anu wà mwomùmwè ne mùndì mèmè ngaakula neenu emu. Mwandamunyi wa mu ciiZùlù, ciiXhosa, cyena Basuto awu, ne bikwabo, pàvwàbo bàlwa, cyònsò cívwa cyàmbiibwà, muntu yònsò ùvwa ùmvwa. Ne bintu binùdi nuumvwa bantu aba bàakula bu beelè màyì mukana, ne nwela meeji bu ne ndikukumina bùngì cyanààna ebi, kí nnanku to; bìdi ne dyumvwija. Pa nanku bivwa bikèngela twètù kubineemeka, kubitèeka pa kaaba kààbì.

146 Mpindyewu, pàmwàpa kí nkufidiibwe mukenji nansha wumwe to. Mpindyewu, disangisha dyàjiki; dibìikila dya ku cyoshelu didì munkaci mwa kwenjiibwa. Ne paanyimà pàà katanci (kakùyì kufidiibwe mukenji nansha wumwe paanyimà pààpa to) muntu kampànda ùjuuka pàdìbi anu ne wàpeci mpùngà bwa cyòcì aci. Nyuma Mwímpè. . . Mpindyewu, Bible mmwambe ne: “Kwòkò kakùyì mwandamunyi to, àshaalè mupùwe.” Nansha cyòcì cìjinga kwakula bya bìshi, shàala mupùwe.

147 Wèwè udi wamba ne: “Ncyèna mwa kushàala mupùwe to.” Bible mmwambe ne uvwa mwa kushàala mupùwe. Nwamònu anyi? Pa nanku aci—aci ncidì cikòsa bwalu. Nwamònu anyi? Àshaale mupùwe.

148 Nenku, pàdì, pààlwà mpùngà wa bintu byònsò biikàle mu bulongàme, dibà adi pààtùpikilà Nyuma Mwímpè pambidi pèndè bwa kufila mukenji, dibà adi kuwùfla. Kì cyòcì aci menemene cívwa cikèngelà bwa nwènù kwenza. Pashìishe dyandamuna dilwa, dyàmba ne: “Kùdi muntu mukàjì mwab’ewu dìnà dyèndè Sally Jones (Ndi ntèkemena ne kakwèna mukàjì wa adi dìnà kaaba aka to, kàdi. . .) Sally Jones. (Nwamònu

anyi?) Tudi tumwambila ne edi dilòlò ndyèndè dya ndekeelu bwa dibìikidiibwa dyèndè. Àcìlongòlòlè ne Nzambi bwalu ùdi ne cikondo cìpì cìikalàye pànwapa.” Mpindyewu, Sally Jones neànyeemenè ku cyoshelu ne lùkàsà lwònsò (nwamonu anyi?), bwalu ndibìikidiibwa dyèndè dya ndekeelu. Nwamònu anyi? Ki difilà dya mukenji ndyòdi adi, anyi dishindika, anyi cintu kampànda.

¹⁴⁹ Ki ekeleeziya wa Mpenta mu mudimu nyèyè awu. Kakwènakù mushindu wà nyuma mibì kudifindayimu nansha, bwalu cìkaadi. . . Bible ùdi wàmba anu menemene ne: “Cìikalè ku muntu ku muntu, ne bìikalè basatu; ne babidi anyi bapite apu bàjingululè.” Ki ekeleeziya nyèyè awu. Kadi tudi naabi penyì leelu ewu? Kutùpika, kwenza bikàsà, kuseka kadi kupàtuka pàdi muntu kampànda wàkula mu myakulu apu; mukwabo ùtàngila, mwikàle wàkula bwa cintu kampànda cìkwabo ne bantu bàkùngwila; mpaasàtà wènza cintu kampànda; anyi bantu bàkùngwila eku ne eku. Ee, aci kî ncìmpè to. Pàmwàpa mpaasàtà ùyiisha, kadi muntu kampànda ùjuuka ùmwimanyika mu. . . Pàmwàpa ùbala Bible kadi muntu. . . Ùbala Bible, kadi muntu paanyimà pàapa wàkula mu myakulu. Kaa, to! Nwamònu anyi? Muyishi ùyiisha mu cyambilu, muntu ùjuuka ùmwimanyika, wàkula mu myakulu. Bìdi anu bìmpè. Ncyèna ngamba ne kî n’Nyuma Mwìmpè to, kadi bìvwa bikèngela bwa nwènù kumanya muwa kukwàta mudimu ne Nyuma Mwìmpè mwine awu (nwamonu anyi?), kukwàta Nendè mudimu.

Mpindyewu, ndi—ndi ngangata. . . Nucidikù ne kaaba bwa lukwabo kabidi anyi? Pashìishe, màalabà ndyalumingu. Pashìishe, netwikalè. . . Twànjààyi anu. . . Lukwabo ndwòlò elu. Ngeela meeji ne ndwà lutàmbe kwikala lwà ngàsà. Nenu mpindyewu, bu nwènù bònsò mwa kuntwàlaku kabidi katanci kakese, bu nwènù mwa kuswà. Ne pashìishe, nèngìikalè. . . Ndi muswe bwa nwènù—ndi muswe bwa nwènù kuumvwa eci nùnkù. Mvwa mulame elu nùnkù mu kiipàcilà. Elu ndwànyi lwà ndekeelu.

Mpindyewu, dyàmbedi, nêmbalè tuntu tubidi tùdi muntu ewu mukonkè. Ntufùnda pa kabèji kàà kale, tufùnda ne cyanza cilenga cya dikèma. Ncyèna ne cingènyingenyi cya ne ùvwa nganyì to, dîna dya—dya muntu nansha umwe wa kùdibo kî ndifùndapù to.

98. Mwanèètù Branham, mbìmpè bwa bambi kwenzabò ntàntà mile ya dilòmbà dya mfrangà mu masangisha àbò, bàmba ne Nzambi ngudi mubàmbile ne bantu bùngì kampànda mu batèleji bàdi ne cya kufila mfrangà bùngì kampànda anyi? Pìikalàbi mbìmpè, ndi muswe mmányè. Anyi byòbi bibi, ndi muswe mmányè. Bwalu ebu mbuntàcìshe bibì be.

¹⁵⁰ Mpindyewu, udi umòna’s, wèwè mulundà wanyì, nènkwambilè, nènkwambilè cìndi mèmè ngeela meeji. Wamònu

anyi? Mpindyewu, aci kî mbwena kwamba ne ncilelèlè to. Ndi ngeela meeji ne ncibi be.

¹⁵¹ Mpindyewu, ndi ngeela meeji nùнку ewu. Nzambi ngudi muntùme mu budimi bwa bwambi. Nkààdikù mumòne bikondo bîmvwà mmwèka mufwànyine kwikalakù. . . Nenku ncivwa—ncìvwakù ne mfrangà nansha mikese to. Nenku mvwa ngamba ne: “Endèshaayi anu cyanàànà dilòngò dya disangishila milàmbù adi.”

Kadi mulongolodi wa ndongamu ùlwa kùndi wàmba ne: “Tàngilà, Billy, tudi ne dibànzà dya ndola binunu bitaanu dilòdòlò edi, Mulùmnyànà. Udi ne mfrangà ayi ku Jeffersonville bwa kudifuta anyi?”

¹⁵² Mémè kwamba ne: “Bìdi anu bîmpè. Nzambi ngudi muntùme mwaba ewu, bwa cyanàànà ncivwa mwa kwikala mulwe to. (Nwamònu anyi?) Endèshaayi anu dilòngò dya disangishila milàmbù adi cyanàànà.”

Kadi kumpàlà kwa disangisha kujikadi, muntu kampànda kwambayè ne: “Udi mumanyè’s, Mukalenge mmutèèke mu mwoyi wànyì bwa kufila ndola binunu bitaanu bwa cyòci eci.” Nwamònu’s, nwamònu anyi? Dyàmbedi, anji kwikala mulombòdìibwe bwa kucyènza.

¹⁵³ Mémè ncitu ngiitabuuja bya dilòmbalomba, dilòmbà dya kàà pa luse, diikala ne kanza koolola bwa mfrangà abi to. Ndi ngeela meeji ne ncintu cibi. Mpindyewu, mwanèètù, pawikalà wèwè ucyènza, ncikutàpi ku mwoyi to. Wamònu anyi? Udi—udi wèwè mufwànyine kwikala ne dyanyisha dya kùdi Nzambi bwa kucyènza. Kadi ndi mémè ngamba anu bwànyì mémè mwine. Ncitu ncìitabuujakù to.

¹⁵⁴ Mpindyewu, ntu mene mumanye bambi bàtù bàya bàmba. . . Mvwa mwimane, anu abidi àdì panshì aa. . . Mpindyewu, aba kî mbeena Mpenta to, aba bàdi. . . Ee, ng’ekeleeziya (nwamònu anyi?), ekeleeziya mikwabo. Kùvwa nku disangisha dinene dya mu ntentà. Gertie, wèwè’s uvwa naanyi, bakwabo bààbúngì bàvwapù. Ne bààkangata mapingaja majimà ku dingumba dya dyendè luumù—abidi anyì asatu madìsangè (ng’ekeleeziya ya ciibidilu ya ciibidilu, mùdì ekeleeziya yetu ya cyena-leelu mùneemu mu cimenga emu, ne bikwabo) ku mpungilu munene—ne kwangatabò mapingaja majimà, biimàne pa cibùmbà cya ku cyambilu—ne biikàle bàfuuna ne ne Nzambi ùvwa mwa kunyangakaja bya pa madimi byabo, kufila dìsaamà dya tunèkè kùdi bàna bààbò balela, ne bintu bya mushindu awu, bòbò kabàyi beelè mfrangà mu disangisha adi. Aci’s mbulelèlè bwa menemene, ne Bible ewu kumpàlà kwànyì. Mémè kwamba ne: “Aci nkupenda kwa Nzambi ne kwa bayiidi Bèndè.” Nzambi Yèyè mukutùme, Yèyè ngwatàngila bwalu bwebe. Yèyè kàyi mukutùme to, dìbà adi dingumba ditangilè bwalu bwebe.

Kadi—kadi wêwè . . . Nzambi Yêyè mukutùme, Yêyè ngwatàngila bwalu bwebe.

99. Kadi bishi bwa dinaya dya Noël mu ekeleeziya wa Nyuma Mwimpè?

¹⁵⁵ Ee, cyôci citàngile Kilisto kaayi, mbifwányineku anu kwikala bimpè. Kadi byôbi ne mbya Taatù Noël, mèmè ncitu ngiitabuuja yêyè awu to. Nkààdi—nkààdi mumane kukola—nkààdi mumane kukola muumùke pa aci. Ncyèna ngiitabuujakù bya Taatù Noël abi to nansha kakese. Nwamònu anyi? Nenku tùmwe twa ku tuubintu tukese twà Noël tùdibo naatù etu, ndi ngeela meeji ne mbintu bya macimbu. Nenku . . . Kadi ndi ngeela meeji ne bôbô bàkaadi buumùshe Kilisto yònsò mu Noël amu kadi kupingajamù bya Taatù Noël abi.

¹⁵⁶ Kadi Taatù Noël awu's mbwalu bufwikakaja. (Ncyèna munkaci mwa kutàpa ní nganyì ní nganyì wa kunùdi ku mwoyi nansha, mündi ntèkemena, pa bìdi bitàngila bânà.) Kadi nènwnwãmbilè. Mùneemu emu kî nkwanji kwenza ntàntà mule to, bidimu bitwè ku makumi abidi ne bitaanu, anyi makumi asatu, pàvwà mwambi kampànda mu cimenga emu, mpaasàtà wa—wa ekeleeziya kampànda munene mu cimenga emu, ùmvwàku mèmè ewu mumanye bimpè menemene, mulundà wanyì wa pa mwoyi, kulwayè kùndi. Nenku Charlie Bohannon (Mwanèètù Mike, wêwè's udi muvùlùke Charlie Bohannon, mulundà wanyì mwimpè). . . Twètù basòmbe mu bìrô byèndè ne yêyè kwamba ne: “Ncyàdyàkwambilakù bàanyi bânà anyi kulekelakù bàmbila bàanyi biikùlù mashimi awu kabidi to.” Yêyè ne: “Mwanàanyi mulela wa balùme mmulwe kùndi paanyimà pàà mumane kukumbaja bidimu dikumi ne bibidi, wàkula bwa mwine Taatù Noël awu. . .” Ki yêyè, kwambayè ne: “Mòna's . . . Munanga wanyì, ndikù ne bwalu bwa kukwambila,” yêyè ne: “Maman. . .” Nudi bamanye's, ki kutùngunukayè ne kwamba bwalu bùvwàye mwenzè abu.

Pashiishe paanyimà pàà yêyè mwalùkile, kwambayè ne: “Nenku, Papa, mbya mwomùmwe bwa Yesu mwine ewu anyi's?”

¹⁵⁷ Ambilàngànaayi bulelèlè. Taatù Noël awu's mbwalu bukwàtakaja bwa beena Katolike bwa muntu kampànda, Kriss Kringle anyi Nicolas Munsantu, munsantu mwena Katolike wa kale wa beena Allemagne wa kùkaadi bidimu ne bidimu uvwa wendakana eku ne eku wènzela bânà bintu bimpè. Kadi mbajuukè kwendesha bwalu abu bùkaadi cilèlè. Kadi Yesu Kilisto ùdi Mwànà wa Nzambi. Yêyè ngwa cya bushuwa, ne Ùdi ne mwoyi.

Mpindyewu, ki lukonko ndwòlò elu, lwà ndekeelu, lùdi lwà dikèma . . .

¹⁵⁸ Mpindyewu tàngilààyaaku. Nudi bafwányine kubènga kutwà ku cyanyi pa bwalu abu. Kadi pawikalà cya bushuwa mubènga kutwà ku cyanyi, wavùluka, biikalèku mu meeji a

bulundà's, kî mmwômò anyi? Ndi mukunangè, ne ncyêna muswe bwa—ncyêna muswe bwa kukutàpa ku mwoyi to. Mémè ndi anu, ndi muswe anu kwikala ne meeji matòoke. Mémè nciyi mwa . . . mémè ngambila mwanàànyì wa balùme mashimi, díbà adi mémè's ndi mwena mashimi. Nwamònu anyi? Ndi muswe kwikala mmwambila bulelèlè.

¹⁵⁹ Mpindyewu, ndi mmwambila bwa Taatù Noël, ngamba ne: “Eyowa, ncyà bushuwa, Taatù Noël ùtukù. Ikàlà utàngila Papa mu bufukù bwa Noël.” Nwamònu anyi? Eyowa.

¹⁶⁰ Nudi bamanyè's, ditùkù adi mvwa kuntwaku, ne mémè kutèeta cyòci aci pa mwànà mutekète wa bakàjì anu bwa kumòna cyanààna. Ki kunguujilabò cya bushuwa dyàbwàbwa adi. Mvwa nsanganyibwa mu nzùbu awu. Ne bóbò bàvwa biimàne mwaba awu, lwà ku Quaker Maid eku. Nenku mvwa muyè kuntwaku bwa kusùmba byàkudya. Ki twètù, mémè ne mukajàànyì, tuvwa muntwamu. Nenku kùvwa kànà kakese kàà bakàjì, kakàyi ne ngondo mipite pa dikumi ne mwandamukùlù to, nenku ùvwa mwimàne mwaba awu, wènza, wimba ne: “Taatù Noël, Taatù Noël . . .” Ki mémè kwamba . . . Mu kankwasa kèndè kakese aku, nudi bamanyè's, musòmbele paanyimà pàa kaaditempu kakese aku.

Mémè kwamba ne: “Udi ukèba Taatù Noël anyi?”

Yèyè ne: “S'm'papa wanyì's, Mukalenge.”

Mémè kwamba ne: “Ùbeneshiibwè, Munanga wanyì. Wèwè nyawu udikù ne lungènyì.”

Mpindyewu, lwà lukolè menemene ndwólò elu, balundà bàànyì. Ne mu eci . . . Pashiishe nèngiimanyikè. Kaa, cidi—cidi m'Mufundù mwimpè be, kadi ndwà kapanda—mutù bwa muntu yònsò udi ne mmwènekèlu awu. Ne lùkaadi lumpandè mémè mutù munda mwa bidimu ne bidimu; kadi anu ku ngàsà wa Nzambi . . . Nenku mukajàànyì wa mushinga mukolè, udi musòmbe mpindyewu paanyimà pàapa wàwa, pùmvùye ne ndi mupetè lukonko alu mu mapingaja emu, kwambayè ne: “Bill, newàdamunè lwine alu bìshi?” Yèyè ne: “Nkàadi mudyèlèele lukonko alu mémè mwine ewu.” Yèyè ne: “Kacya ncìvwakù mwa kucyùm vwa to.” Ki yèyè ne . . .

Mémè kwamba ne: “Lwàku dilòòlò edi, Munanga wànyì. Nèngènzè ne mwànyì mwònsò ku dikwàcisha dya Nzambi.”

100. Mwanèètù Branham, bu wèwè mwa kuswà umvwijàku Ebèlù 6.4 too ne ku 6.

¹⁶¹ Awu mmusangu kampànda wùvwàci menemene . . . Nwamònu's, mpindyewu nebikengelè bwa nwènù kutàngilakù kaaba aka pa diitabuuja dyetu, ngàsà, dikùbiibwa dya beena kwitabuuja, disùminyina dya bansantu, disùminyina's wè, eyowa, dya bansantu. Ebèlù nshapità mwi6, 4 too ne ku 6.

Mpindyewu, pàdici anu ne...njikija eci, dîbà adi ndi ntèkemena ne Nzambi neànkwaçishèku bwa mémè kunùtòòkeshilaci bikolè. Mfwilaayikù luse, ndi—ndi ne Diiyiisha dyànyì bwa dilòòlò edi; pàmwäpa nënyiishè cintu cimwecimwe aci mu dinda ku—ku disangisha adi. Pashiishe nënkwatè njila nye.

¹⁶² Mpindyewu, elu ndwà kapanda-mutù menemene. Nwamònu anyi? Mpindyewu, bikèngela nùtangilàayi bîmpè. Mpindyewu nùvulukàayi ne, twètù ku ekeleeziya eku tutu twitabuuja ne tulongesha, kî nne bônso bàdi bàlwa ne bèèla mbilà, bônso bàdi bàkulà mu myakulu, bônso bàdi bàlabulanganà ku cyanza ne muyiishi, ne bàdi ne Mwoyi wà Cyendeleele to. Kadi tudi twitabuuja ne wèwè ne Mwoyi wà Cyendeleele, Nzambi Yèyè mukupèeshe Mwoyi wà Cyendeleele, udi naaWù mbwà kashidi. Nwamònu anyi? Bwalu tàngilàayi. Byòbì kabiyi nanku to, Yesu ùdi ùmwèneshiibwa mulongeshi wa mashimi. Mu Yone Munsantu 5.24, Yèyè mmwambe ne: “Ewu udi umvwa Mèyi Àanyi ne wìtabuuja Ewu udi muNtùme ùdi ne Mwoyi wà Kashidi, ne yèyè kàakupicila ku cilumbulwidi to, kadi mmumùke ku lufù muyè ku Mwoyi.” Mpindyewu, kòkanganàaku Nendè’s. “Bônso bàdi Taatù muMpèeshe. . . Muntu nansha umwe kèna mwa kulwa kùNdi pàdi Taatù kàyi mumukòke nansha. (Mémè ndi ntèèla Mufùndu’s.) Bônso bàdi bàlwa. . .Muntu nansha umwe kèna mwa kulwa kùNdi pàdi Taatù Wanyì kàyi mumukòke dyàmbedi nansha. Ne bônso bàdi Taatù Wanyì muMpèeshe nebàlwe kùNdi. (Nwamònu anyi?) Ne yònsò udi ulwa kùNdi, Mémè nèmmpupèeshè Mwoyi wà Kashidi (Yone Munsantu 6), ne nèmмуjuulè ku lufù ku matùkù a ndekeelu.” Ki Méyi Èndè ngòwò awu.

¹⁶³ Mpindyewu tàngilàayi. Mémè muswe kwalukila mu Efèsò nshapità wa kumpàla, Pòlò ùyiisha. . .Mpindyewu, beena Kolintò, muntu ne muntu ùvwa ne mwakulu ne musambu. Nudi numòna ne ekeleeziya mikwabo kayìvwa ne lutàtu alu to. Kàakambakù cintu nansha cimwe pa bwalu abu to. Yèyè wàkatèlakù dyakula dya mu myakulu kaaba nansha kàmwè mu ekeleeziya wa beena Efèsò, mu ekeleeziya wa beena Loomò anyi? To! Bòbò’s bàvwa ne myakulu ne bikwabo byònsò anu mùvwà beena Kolintò naabi amu, kadi bàvwa naabi bitèèka mu bulongàme. Beena Kolintò kabàvwakù bòbò mwa kubitèèka mu bulongàme to. Nwamònu anyi? Kadi Pòlò wàkayakù ne wàkatèèka ekeleeziya awu mu bulongàme.

Mpindyewu, yèyè. . .Ndi ngiitabuuja, mùdi Oral Roberts wàmba ne: “Nzambi ùdi Nzambi mwímpè” amu. Nwènù kanwèna nwitabuuja nanku anyi?

¹⁶⁴ Kadi wèwè udi wamba ne: “Ee, kadi bìshi dîbà adi bwa beena Mpenta bàdi ne myakulu aba, Mwanèètù Branham?” Ndi ngeela meeji ne bàdi ne Nyuma Mwímpè. Bushuwa’s. Eyo, bwa cinyi? Tàngilàayi. Nudi nwitabuuja ne Yèyè ùdi Nzambi mwímpè anyi?

Musangu kampànda Toomààsè wàkamba ne: “Nudi bamanyè’s, Mukalenge. . .”

Bakwabo abu bàvwa baMwitàbùùje. Bààkamba ne: “Kaa, twètù tudi bamanyè ne Yèyè ngwa cya bushuwa!”

“Kaa,” mwàkambà Toomààsè, “to, to, mèmè ncyèna ncìitabuujakù to. Mushindu wumwepele wûngaàcìitabuuja mèmè, bikèngela mpetèku cileeeji kampànda. Bikèngela ngèlè minu mu lubadi Lwèndè ne mu mpùtà ya misonso mu byanza Byèndè.”

Yèyè ùdi Nzambi mwîmpè. KwambaYè ne: “Lwâku, Toomààsè. S’ki yôyi eyi.”

“Kaa,” mwàkambà Toomààsè, “bwa mpindyewu kaayi ngîtàbùùji.”

¹⁶⁵ KwambaYè ne: “Eyowa, Toomààsè, paanyimà pàà wèwè muMmòne, ne muMbaabàte, ne mwelè cyanza Cyànyi. . . byanza byebe mu lubadi Lwànyi, udi witabuuja. Kadi difutu ditàmbe bunene ndya aba bàtù kabàyikù banji kumòna kadi bìitabuuja.” Yèyè ùdi Nzambi mwîmpè. Ùdi ùkupèèsha dijinga dya mwoyi webe, mu bushuwa bwa bwalu. TùMwitàbùùjaayi anu cyanààna. Aci’s—aci’s—aci’s ndikofi dya lufù dituuta Sàtaanà. Pàdi muntu ùkwàcila Nzambi pa Dìyi Dyèndè, mwanèètù, aci’s necishebeyè Sàtaanà musangu wònsò. Aci’s ncisúsù cya citàmbe bukolè cìdì Sàtaanà ùpeta, mpàdì muntu ùkwàcila Nzambi pa Dìyi Dyèndè. Eyowa’s, mukalenge. Múmvwà mwambe ne: “Muntu kààkwikala ne mwoyi anu nkàayèndè to (Yesu’s, dilòlò adi), kadi ku Dìyi dyònsò didì dìpàtukà. . .”

¹⁶⁶ Mpindyewu, mònaayi eci. Mpindyewu nèmbangilè ku mvensà wa kumpàla:

Ki bwa cinyi tushiya maalu a cibangidilu a dilongesha dya Kilisto, tütungunukàayi too ne ku bupwàngàne; . . . (Mpindyewu, cintu cya kumpàla cìndì muswe bwa nùmanyè ncyòci eci: bàdì Pòlò wàmbila kaaba aka mbanganyi? Beena Ebèlù. Bàdi bàmba ne: “Ebèlù,” kuulu aku, Mukàndà wà Ebèlù. Mmwómò anyi? Beena Yudà bàvwà babènge Yesu abu. . . Nudi mwa—mwa kucyùmvwa mpindyewu anyi? Ùdi wàmbila beena Yudà, ùbàleeja mundidimbi wà mikenji mùvwàyi cifwànyikijilu cya Kilisto. Bintu byònsò bya kale abi bìvwa ncifwànyikijilu cya bipyabìpyà. Mpindyewu tàngilàayi.)

. . . tushiya maalu a cibangidilu a dilongesha dya Kilisto, tütungunukàayi too ne ku bupwàngàne; . . .

¹⁶⁷ Mpindyewu, mmufùme ku dyakula naabò pa malongesha. Tùbwelàayi mu diyikila pa bintu bipwàngàne. Mpindyewu, nudi bavwijìbwe bapwàngàne mu Nzambi panùdi batwìbwe citampì kùdì Nyuma Mwîmpè too ne ku ditùkù dya bupikudi bwenu.

“Ewu udi mulediibwe kùdi Nzambi (Yone wa Kumpàla) kàtu wènza mpekaatu to; bwalu yéyè kèna mwa kwenza mpekaatu to, bwalu Dimiinu dya Nzambi didi dîshààla munda mwèndè.”

¹⁶⁸ Muntu udi muujiibwe tètè ne Nyuma Mwïmpè, kî ngudi udyàmbidila ne mmujiibwe tètè to, kadi ewu udi mulediibwe kùdi Nyuma wa Nzambi kàtu wènza mpekaatu to, bwalu Dimiinu dya Nzambi didi munda mwèndè, ne yéyè kèna mwa kwenza mpekaatu to. Nwamònu anyi? Aci ncidi Bible wàmba anyi? Pa nanku's ki cyôci aci. Wèwè udi. . . Kî ncyûdi wèwè wenza to, cidi, ne ki cidi bwalu to, kî ncidi bàà pa buloba bèèla meeji bwebe wèwè to, ncidi Nzambi wèla meeji bwebe wèwè. Nwamònu's, nwamònu anyi? Kwèna mwa. . . Mmunyi mûndiku mwa kwikala ne dîyi ditûma difûnda kùdi mfumu wa cimenga ne, ndi mwa kunyeemesha màshinyi kilòmèètà makumi asambombo ne yinaayi ku dîbà dîmwè mu cimenga cijimà emu, kadi mpùlushi kanà yònsò ewu pèndè ùnkwàta? Ncyèna mwa kwitabakù to. Mmunyi mûndiku mwa kwenza mpekaatu pàdiku mulàmbù wà mashi dîbà dyònsò kumpàlâ kwa Nzambi, mùdiYe kàyikù nansha mwa kummòna; pàdiku cikàndiki pa—pa. . . kumpàlâ kwányi ne Nzambi, ngabu wa Mashi? Bwalu twètù tudi bafwè, ne mwoyi wètù mmusokoka mu Kilisto kupicila ku Nzambi, batwibwe citampì kùdi Nyuma Mwïmpè. Nansha twamba mwine mmunyi mùdiku mwa kwenza cintu cibì ku mèsù kwa Nzambi? “Twètù twenza mpekaatu ku bukolè (Ebèlù 10) paanyimà pàà bamanè kupeta dimanya dya Bulelèlâ, kakùcyèna kabidi mulàmbù bwa mpekaatu to.” Mwómò emu kabyènakù mwa kwenzeka (nwamònu anyi?) bwa kwenza mpekaatu ku bukolè to.

¹⁶⁹ Mpindyewu, tütungunukàayi ne kubala. Eyo.

. . . bupwàngàne; katùcyi kabidi tutèèka bishìmikidi bya—bya kanyinganyinga kàà ku midimu mifwè, ne . . . dîtatabuuja kùdi Nzambi,

Bya dilongesha dya mabàtiiza, . . . ditentekelangana dya byanza, ne bya dibìshìibwa dya bafwè, ne . . . cilumbulwidi cya cyendelele to.

Kadi cyôci eci. . . nciwènza, bu Nzambi mwa kwanyisha.

(Mpindyewu mwaba ewu ngùvwàbo baswè kubangila, kuumukila ku mvnsà mwi4.) *Bwalu kabyèna mwa kwenzekakù to bwa aba. . . musangu kampànda bakenkeshila, ne bamanè kulabula dipà dya ku dyulu, ne bavwijìibwe baabanyanganyi bàà Nyuma Mwïmpè,*

Ne balabùle dîyi dîmpè dya Nzambi, ne makolè a buloba bùcìlwalwà,

Bòbò badishinde, bwa kubààlujulula—kubààlujulula cyàkàbìdi ku kanyinganyinga; bu mudibi ne bàdi

bàpoopela cyàkàbìdì bwàbò bôbò biine Mwânà wa Nzambi pa nkùrusè, ne biikàle bàmuzànjika ku bundù bwa patòòke.

¹⁷⁰ Mpindyewu, mpindyewu, bìdi bimwènèka bu ne, ku mushindu wûdi ucibala mwaba awu, muntu mmufwànyine kupeta Nyuma Mwîmpè, ne pashiishe kutwà cimpingà ne kujìmina. Kadi kabyèna mwa kwenzekakù to bwa kucyènzayè. Nwamònu anyi? Kèna mwa kucyènzakù to. Yèyè mucyènzè, Kilisto mmushimè. Nwamònu anyi? Kabyèna mwa kwenzekakù to bwa aba bàkaadi bakenkèshiiibwe. Mpindyewu, tângilàayi kaaaba aka. Ùdi wàmabila banganyi? Ùdi wàmabila beena Yudà bàà ku mikàlu abu. Kàvwakù wàmba muntu udi mùle tètè ne Nyuma Mwîmpè to; mmwambe ne: “Yèyè mulabùle Dìyi dya Nzambi.”

¹⁷¹ Mpindyewu, ngǎnji ncìfilèbi mu lusùmwinu, bwa nùmonè ne kacìnùpici to bwa mpindyewu. Mpindyewu, ùdi ùfùndila beena Yudà aba. Bàmwè bàà kùdìbo mbeena kwitabuuja bàà ku mikàlu. Nwamònu anyi? Mmwambe ne: “Mpindyewu, netùshiyè midimu eyi bwa tütungunukè bwa kwakula pa bupwàngàne.” Yèyè ne: “Mpindyewu, tudi twakula pa mabàtiiza, ne dibìshiiibwa dya bafwè, ne ditentekelangana dya byanza, ne bikwabo byònsò; kadi tùyaayi kumpàla mpindyewu bwa kwakula pa bupwàngàne. Mpindyewu, netwikalè mwa kwakula pa dībà dinùdi nubwela mu Nyuma Mwîmpè. Mpindyewu, nukàadi balondèlònde masangisha ntàntà mule . . .”

¹⁷² Ne nukàadi bamònèmòne biine bantu abu. Bôbò nebàshalè anu mwaba awu; kí mbaswè ní nkubwela ní nkupàtuka to. Bàdi bàànyisha Nyuma Mwîmpè. Nebàseemenè pabwîpi. Ne pàmwàpa Nyuma Mwîmpè wènzà cintu kampànda, balùmyànà wa yààya, nebàjuukè kuulu bèèla mbilà, ne bàtùpika bàya muulu bàalukila panshi bwa bwalu abu, kadi kabàyikù bàswa kuMupeta bôbò biine to. To, to! Nwamònu anyi? Kadi nebàmbè ne: “Kaa, eyowa’s, abi’s mbîmpè. Kaa, mèmè ncyèna mumanyè aci mpindyewu to.” Nwamònu’s, nwamònu’s, nwamònu anyi? Beena kwitabuuja bàà ku mikàlu. Batàmbe kuseemena mu mushindu wà biikàle mwa kuMulabula, kadi kabàyi anu bàMupeta to. Nwamònu anyi? Mpindyewu, bàdi bàlonda masangisha mushindu awu too ne paanyimà pàà cikondo ne mùdìbo bàdyèla bàya biyiidi. Mèmè’s ndi mwa kutèèla mènà a bààbùngi bàvwà mu tabernacle emu, benzè cintu cimwecimwe aci. Badishinde cyàkàbìdì, bwa kudyàlujulula cyàkàbìdì ku kanyinganyinga, kakwèna kanyinganyina bwàbò bôbò to. Bôbò mbabungàmìje ne basàke Nyuma muyè kule naabo. Bàkaavwa baseemène bikolè mu mushindu wà ne . . .

¹⁷³ Mònaayi, bu nwènù mwa kubuululakù pàmwè naanyi (kanwèna ne dībà to, ndi mumanyè, mpindyewu) kadi bu nwènù mwa kubuululakù mu Dutèlònòmà nshapità wa kumpàla bwa kumubala, nenùpetè cintu cimwecimwe aci. Mufùndaayaaku

mpindyewu, Dutèlònòmà nshapità wa kumpàla. Mpindyewu, nenku tubangilàayi ku mvensà wa 19 bwa kubala too ne ku wa 26. Dutèlònòmà . . . Nenùjandulè . . . Tàngilàayi mpindyewu. Izaleela mujimà . . . Cidì bôbò bantu abu bènza aci, bàdi bálwa ku Kaadèsà-baanèà. Kaa, mémè ndi mmòna cintu kampànda! Tabernacle ewu, beena Mpenta aba bàkaadi ku Kaadèsà-baanèà patùdì twakulangana apa. Aci's ncyà bushuwa menemene, Mwanèètù Neville. Tudi ku Kaadèsà-baanèà, nkwasà wa cilumbulwidi wa buloba (s'ki civwà nkwasà wa cilumbulwidi).

¹⁷⁴ Nenku batentekedi bààkaya. Yoshùwa kwambayè kaaba aka ne: “Mpindyewu, ndi mutùme batentekedi,” anyì, Mòsà's wè. “Ndi mutùme batentekedi, dikumi ne babidi, umwe, muntu umwe mu cyònsò cya ku bisàmbà byenu. Ndi mubàtùme bwa kutentekelabò buloba abu ne kulwabò ne mulubù.” Mmwòmò anyì?

Kadi pààkaalukilàbo, kùvwa citeema pa dikumi ne babidi abu bààkambà ne: “Kaa, mbuloba bwìmpè, kadi kaa, luse wè, katwènakù mwa kubùkwàta to. Kaa, ekelekele! Beena Amòlà bàdi muntwamu, ne twètù tudi tumwèka anu bu tupasù ku luseke lwàbò. Mbantu bambùle bya mvità. Ngumbu yabo mminene. Kaa, mbitàmbe kwikala . . . mòna's, bwànyì mémè bìvwa bipìcìibwe ne twètù bafwile mu Èjjiipìtù mwàmwa pamutù pàà wèwè kulwa neetu kaaba aka.”

¹⁷⁵ Kadi, bakùlumpè abu Kaalèbà ne Yoshùwà kajuukilabò kuulu mwaba awu ne kubàtuuyishabò; kwambabò ne: “Twètù tudi batàmbe ne bacimunyi bwa kubùkwàta.” Eyowa's, mukalenge! Ki muntu nyéyè awu. Tàngilàayaaku mpindyewu. Ncinyì cyàkenzekà? Kaalèbà ne Yoshùwà bàvwa bamanyè ne Nzambi nguva mufile mulayi awu: “Nansha bwikàle bunene bìshi, nansha bipùmbishi biikàle búngi kaayi, bantu abu nansha biikàle baleepa bàà bìshi, nansha biikàle banene bàà bìshi, aci kaciyèna citàngila bwalu bùdì panshi ebu to. Nzambi ngudi mwambè nanku, ne twètù tudi mwa kubùkwàta.” Kadi nudikù bamanyè ne bàvwa anu bôbò babidi abu, pa bantu miliyò yibidi ne citùpà ayi, bààkasabukà kubwela mu buloba abu anyì? Bwalu bôbò bààkalama diitabuuya dyabo mu civwà Nzambi mwambe ne m'Bulelèlà aci. Amen!

¹⁷⁶ Tabernacle ewu, patùdì twakulangana apa, ki kwimanayè ku Kaadèsà-baanèà eku. Tàngilàayi, bantu abu bàkaavwa baseemène pabwipi mu mushindu wà ne bààkalabula mene ne tumuma twà mvinyò twà mu buloba abu. Bààkadyà tumuma twà mvinyò atu. Pààkayà Kaalèbà ne bantu abu muntwamu ne kwalukilabò ne bisùmbusumbu bya tumuma twà mvinyò, bantu abu's bààkatùulakù ndambu e kutùdyabò. “Kaa, ntwìmpè, kadi twètù katwèna mwa kaciyènza to.” “Aba bàdi balabùle cyenzi cìmpè cya Nzambi, balabùle Nyuma Mwìmpè, bamòne bwìmpè Bwèndè, baMulabùle, balabùle Diyì dya Nzambi . . .” Nudi numòna aci anyì? Muntu nansha umwe wa ku bantu

abu, nansha umwe wa kùdibo kààkapetakù dyanyisha dya kusabuka kubwelamù to. Bààkabütuka mu buloba bwàbò sungansunga, dyàmùnu mu cipèèlà. Kabààkasabukakù to, kadi pààbò's bààkafika pabwìpì menemene bwa kuMulabula, kadi kabàyi ne ngàsà ne diitabuuja búngi bukùmbàne bwa kuMupeta to. Ki mùdi bwalu nanku.

¹⁷⁷ Mpindyewu. Mpindyewu tèèlejààyaakù munanga udi mufunde mukàndà ewu ewu. Tùbalààyi anu mvensà udi ulonda awu. Tàngilààyi anu bwa katanci kakese cyanààna. Tàngilààyi Pòlò. Mpindyewu tùbalààyi mvensà wa 7:

Bwalu buloba . . .bùtù bìnwa mvùla utu ulòkapù misangu yàbúngi abu, ne bùtòlwesha bisèkiseki byàkudyà bwa aba bàdìbo babwàkàjile, bùdi búpeta mabènesha a kùdi Nzambi,

Kadi ebu bùdi bùtòlwesha mèbà ne mingòngà mbubèngùbwe, ne bùdi pabwìpì ne kwediibwa mulawu, bwòbù bùdi ndekeelu ne cya kwoshiibwa.

¹⁷⁸ Mpindyewu, nudi numòna cidiye wàmba aci anyi? Tàngilààyi mpindyewu. Kùvwa lukonko elu; mpindyewu, ne pashiishe netùjikijè. . . Cintu eci civwa cyambè kunshebeya munda mwa bidimu.

¹⁷⁹ Ngàkaya mu disangisha kampànda mùngà musangu mùvwà bantu bààkula mu myakulu mu Mishawaka, mu Indiana. Mpindyewu, ndi kumpàlà kwa musùmbà wanyi mèmè mwine. Nukàadi bumvùmve bantu abu . . . bangumvwè ndonda bwalu-bulonda bwà nsòmbelu wanyi, ne bwa muntu wa bafiike wákamba ne: “S’nyèyè ewu. S’nyèyè ewu” awu. Mpindyewu, ngàkalonda bwalu abu.

¹⁸⁰ Kadi citùpà cikwabo cya bwalu abu: Ngàkamòna bantu balùme babidi. Bàvwa . . . Umwe ùvwa ùfila mukenji, mukwabo ùwàndamuna. Mukwabo ùfila mukenji, ne mukwabo ùwàndamuna. Kadi mwanèètù, yìvwa mu yòyi’s. Anu eci. . . Mèmè kudyàmbidila ne: “Nzambi wanyi! Kacya ncitukù mwanji kumòna cintu cya nàka to.” Mèmè ne: “Mèmè’s ndi munkaci mwa banjelo.” Mèmè kudyàmbidila ne, ncìvwakù mwanji kumòna cintu . . . Umwe ùvwa wàkula, ne mukwabo . . .

¹⁸¹ Kadi mèmè mvwa musòmbe lwà paanyimà apu, bu muyiishi mukese wa kale, nudi. . . [Katùpà kàà mukàbà wà mèyi munda mutupù—Muf.] . . . bantu bònsò babidi abu musangu kampànda mèmè kubàlabula ku cyanza. Ncìvwakù mwanji kumòna bantu bàà mushindu wàwa kacya bándela to. Bàvwa mwa kwamba mukenji, ne mukwabo uwàndamuna. Kadi ekelekele, ekelekele! Bìvwa bilenga bya kacya! Umwe, ùvwa wàkula ne mukwabo wàndamuna. Bònsò babidi. . . Ne bàvwa anu bándamuka bàlwa batòoke zee bu lupèmbà pàvwàbo bèèla byanza muulu apu. Mèmè kudyàmbidila ne: “Kaa ekelekele, ekelekele! Mvwa penyì’s

kacya bàndela? Cintu's ki cyôci eci!" Mémè ne: "Ekelekele, beena Mpenta's mbàdì mu bulelèlà." Ncya bushuwa menemene.

182 Kacya ncìvwakù mwanjì kumòna bwà ndolò to pa kuumusha bìvwà byènzekà mu nyùngulukilu emu abi, mùvwà. . . Pàmwàpa bakàjì ndambù biikàle ne kaacitanda mwaba kampànda. Kadi bàvwà bàkòkangana; ne ewu wàmba mukwèndè ne, "mucì wà diikilabò kùdì tubangu-nyuunyi," ne, nudi bamanyè's, anu mushindu awu, bènza bu bàdì bàkòkangana ewu ne ewu. Mpindyewu kî nkudyombola kwa bakàjì abu anyì nî ncinyì to, kadi anu. . . Bìvwà—bìvwà bya ciipanshì be. Muntu wa kunùdì. . . Vùlukà, wèwè Mwanèètù Graham. Ucìvwà anu mwànà wa balùmè mutekète mwine musangu awu. Nenku ewu, ki mushindu wùvwàbi.

Kadi mémè kutèèleja aci, e kudyàmbidila ne: "Kaa, ekelekele, mémè's ndi mutwilàngàne ne banjelo."

183 Dìngà ditùku ngenda ndwila ku ditumba dya nzùbu, lwà pa ditùkù diibìdì, mémè kutwilangana ne umwe wa ku bantu abu. Mémè kwamba ne: "Wetwàwu, Mukalenge!"

Yèyè ne: "Wetwàwu!" Yèyè ne: "Udi. . . Dyèbè nganyi?"

Mémè kwamba ne: "Branham."

Yèyè ne: "Udi wa penyì? Wa mùneemu anyì?"

Ki mémè ne: "To, Ndi wa mu Jeffersonville."

Yèyè ne: "Ee, mbìmpè. Udi mwena Mpenta anyì?"

Mémè ne: "To, mukalenge." Mémè ne: "Cìdibi ncyèna anu ngiitaba mushindu wà beena Mpenta wa dipeta Nyuma Mwìmpè awu to," mémè ne, "kadi nansha nanku," mémè ne, "ndi mwab'ewu bwa kuyiilakù."

184 Yèyè ne: "Ee, abi mbìmpè be." Nenku pàmvwà nyiikila nendè apu, munkaci mwa kubàkula nyuma wendè (mùvwà mukàjì wa ku ciinà cya màyi awu), yèyè ùvwa mwena Kilisto mulelèlà. Mwanèètù, ndi nswa kwamba ne yèyè ùvwa ùmvwika bìmpè be. Ùvwa mwìmpè. Mpindyewu, nwènù bònsò. . . Mbanganyi bàkaadìku babwelè mu masangisha àànyì ne bamòne bintu abi byènzeka? Nudi numòna anyì? Kadi muntu awu ùvwa mulelèlà menemene. Ki dìbà adi, mémè—mémè kudyàmbidila ne: "Mwaba awu! Ekelekele, bilenga bilayà!"

185 Lwà ku diine dilòlò adi, mèbà a mu mapingaja, mémè kutwilangana ne mukwabo awu. Mémè kwamba ne: "Wetwàwu, mukalenge!"

Yèyè ne: "Wetwàwu! Dyèbè nganyi?" Ki mémè kumwambila. Ki yèyè ne: "Ukààdi. . . Udi—udi mwena Mpenta anyì?"

Mémè ne: "To, mukalenge, ncyèna anu menemene mwena Mpenta to, mùndi ngeela meeji." Mémè ne: "Ndi mwab'ewu anu bwa kuyiilakù."

Yèyè ne, mêmè ne, yèyè ne: “Kacya ukààdikù mupetè Nyuma Mwîmpè anyi?”

Mêmè ne: “Ncyêna—ncyêna mumanyè to.” Mêmè ne: “Bilondèshile cinùdì nwênù bônso bapetè, ngeela meeji ncyêna mucipetè to.”

Ki yèyè ne: “Kacya ukààdikù mwakùle mu myakulu anyi?”

Mêmè ne: “To, mukalenge!”

Yèyè ne: “Nanku kwêna muMupetè to.”

¹⁸⁶ Ki mêmè ne: “Ee, ngeela—ngeela meeji ne aci ncyà bushuwa.” Mêmè ne: “Ncyêna mumanyè to. Ndi anu nyiisha kùkaadi bidimu bibidi, anyi bishààdile ku abi,” ki mêmè ne, “ncyêna mutàmbe kuCimanya to.” Mêmè ne: “Pàmwäpa ncyêna mumanyè to.” Mêmè ne: “Ncyêna mwa kuumvwa . . .” Bwalu, mvwa nteeta bwa kumulamina mwaba awu (nwamònu anyi?), bwa kucibàkula. Nênkù pângààkacibàkulà, ní nkààdikù mutwilàngàne ne mwena lubombo, ki umwe wa ku bôbò ùvwa nyèyè awu. Mukàjèndè ùvwa ne nsukì mifiike; ne yèyè ùvwa musòmbe ne mukàjì wa nsukì ya mitòòkòlòke, mulelè nendè bânà babidi; kadi mwikälè wàkula mu myakulu, ùyàdamuna ne bupwàngàne bwônso. Ki mêmè ne: “Mpindyewu, Mukalenge, ndi mukabwelè penyì?” Kuumuka ku banjelo, ncìvwa mumanyè ne mùmvwà mukabwelè mmu binganyì to. Mêmè ne: “Mêmè—mêmè—mêmè’s ntu mwitabi wa maalù anu mùdìwu mafùnda; bikèngela cìikalè Bible. Bikèngela cìikalè cijaalàme. Kùdì cintu cipampàlàmuke mwaba kampànda, Mukalenge. Mbifwànyine kwikala nanku awu munyì?”

¹⁸⁷ Mêmè kuya mu disangisha dilòlò adi, ne Nyuma awu ùpweka; nenku mwanèètù, wèwè’s uvwa mufwànyine kuMuomvwa ne, Ùvwa n’Nyuma Mwîmpè. Eyowa’s, mukalenge! Pìikalàbi ne kàvwa n’Yèyè to, s’nyawu Ùvwa ùfila bujaadiki pàmwè ne nyuma wanyì ne Ùvwa n’Nyuma Mwîmpè. Kadi ncìcìvwa anu muyiishi wa kânàkànà, ncìyi mumanyè mùvwàbi, menemene pa nyuma wa dijingulula to. Kadi mvwa musòmbe mwaba awu. Ne ndi mumanyè ne Nzambi mene utu munsungile awu, aci cìvwa njyà yìmwèyìmwè ayi. . . Mvwa ndyùm vwa anu bu udi upìcila mu musàkà wà nzùbu awu, yìvwa nnjyà milenga ya kacya mu citanda aci. Mêmè kudyàmbidila. . .

¹⁸⁸ Mùvwa bantu batwè ku cinunu ne nkàmà yitaanu. Mêmè kudyàmbidila ne: “Ekelekele, kaa ekelekele!” Misùmbà yabo yibidi anyì yisatu nyìvwa midìsangìshe ayi. Ki mêmè kudyàmbidila ne: “Ambààyaaku mwaba awu, ekelekele! Bidi mwa kwenzeka munyì? Mpindyewu, Nyuma munene awu mu citanda eci ùpweka mushindu ewu; ne kaaba aka, tàngilàayi eci mùdìci cibànda kwàka, balùmyànà abu bààkula mu myakulu, bàdamuna, bàfila mikenji anu mu yòyi menemene— kadi umwe wa kùdìbo mwikälè mwena lubombo ne mukwabo muntu mulelèlè wa Nzambi.” Ki mêmè kudyàmbidila ne: “Mpindyewu,

mémè's ndi mu cibwejàkàjì cya menemene. Ncyèna mumanye cya dyenza to.”

¹⁸⁹ Ee, dyàkàmwè paanyimà pàà cyôci aci, mulundà wanyì mwímpè, Mwanèètù Davis (nudi bamanyè's), wàkabanga kwamba mûndi muntu wa bènzeja maalu. Aci nciipôpí cya bânà, nudi bamanyè's. Nenku ewu, mvwa mujikè, ne pa nanku mvwa. . . Kubangayè wènza naanyi bikàsa, ne pashiishe ùtùngunuka, mwenzè bu udi ungeelesha bilèlè's.

¹⁹⁰ Nenku tuvwa twenza ndambu wa. . . Ne mamwèbè ne twètù bônso tuvwa twenza tuumasangisha tukese mu myaba mishilèshilàngàne. Tabernacle kàvwa—kàvwa mwanjì kubanga mwine musangu awu to, kadi tuvwa twenza tuumasangisha tukese mu myaba mishilèshilàngàne. Ki ndekeelu wa byònsò dîngà ditùkù, paanyimà pàà tabernacle mumanè kwibakiibwa, paanyimà pàà bidimu byàbûngì, mémè kuya ku Green's Mill ku nyòngòlò wanyì bwa kusambila, bwalu Mwanèètù Davis ùvwa mwambe bintu bikwabo bibi be bwànyì mémè mu—mu—mu cibèjibeji cyèndè. Mémè mvwa mumunangè. Ncìvwa muswe bwa cintu kampànda kwenzekacì to, nenku mémè—mémè kuya kuntwaku bwa kamusambidila. Ki mémè kuya kuntwaku, ne mémè kubwela mu nyòngòlò amu. Ki mémè kushààlamù matùkù matwè ku àbidì. Ki mémè kwamba ne: “Mukalenge, mufwilèku luse. Kènà—kèna ne meeji—meeji a kwamba nanku to.” Ki mémè kudyàmbidila ne: “Udi mumanyè. . .” Ki kumvwilabi bwa kwela meeji ku Mufundù kampànda.

¹⁹¹ Ki mémè kupàtuka. Kùvwa citùpà cya mucì (citùpà cya mucì aci cìcidi anu mwab'awu, mvwa musòmbepù anu àbidì àdì panshì aa) civwà cidishinde ku mukùnà ne cilààle cicyàmakàne mu kajila kakese kàdì kàfùmina ku kasùlu aku. Ki mémè kushààla musòmbe pa citùpà cya mucì aci cibelu eku cibelu eku, ntàngila dyàmwàmwà dya mikùnà paanyimà—paanyimà menemene pààpa, ne mémè kutèeka Bible wanyì mushindu ewu. Mémè kudyàmbidila ne: “Udi mumanyè's. . .” Mvwa ngeela meeji ku Mufundù kampànda ne: “Nsenda wa byamù awu, mmungenzèle maalu mabi be, ne mwambè bintu.” Nudi bamanyè's. . . Mémè kudyàmbidila ne: “Ngeela meeji ne nêmbalè anu cyôci aci.” Mémè kubuulula Bible, ne mémè kwamba ne: “Ee. . .” Mémè kudikùpùla kwìsù, kadi lupeepèlè kutuuta, ne kumubuululalù mu Ebèlù 6. “Ee,” mûngàakambà, “kì ng'amu mùdìci to.” Ki mémè kuMùtèèkulula mushindu ewu. Ki lupeepèlè kutuutalù cyàkàbìdì ne kuMwalujalù cyàkàbìdì. Ki mémè ne: “Mpindyewu, abu's mbwalu bwa dikèma, lupeepèlè lùmubuulula cyàkàbìdì mushindu awu.” Ki mémè kudyàmbidila ne: “Ee, ngeela meeji ne nêncìbalè.” Nenku civwa cyàmba ne:

*Bwalu kabyèna mwa kwenzekakù to bwa
aba bàkaavwà musangu kampànda bamana
kukenkeshila, . . . bavwijùbwe baabanyanganyi bàà*

Nyuma Mwîmpè, ne balabùle... Dîyì dya Nzambi, ne cintu cya buloba búcilwalwà.

Mémè kudyámbidila ne: “Ee, ncyèna mmòna cintu pa bwalu abu to.” Mémè kucibala too ne kwinshì, cikwabo citùpà cya nshapità aci. Kamùyì cintu nansha címwè to. Mémè kwamba ne: “Ee, aci’s—aci’s ncikòse bwalu abu’s.” Ki mémè—mémè kucimòna mushindu ewu, ne kwalukilaci cyàkàbìdì. Ki mémè kuWambula, ne kudyámbidila ne: “Ee, ncinyi aci?” Mémè kutùngunuka ne kucibala, ne kucibala, ne kucibala, mémè kwamba ne: “Ee, ncyèna anu mwa kuumvwa to.” Pashiishe mémè kutùngunuka... Ki mémè kubala too ne kwinshì ne:

...kabyèna mwa kwenzekakù to bwa aba bàkaavwà musangu kampànda bamana kukenkeshila,...

Kufikaci kwinshì eku mu mwab’ewu wùdici cyambè ne:

Ne buloba... bùdì búnwa mvùla udi ulòkapù misangu yábùngi, bwa kutòlwesha bisèkiseki byàkudyà bwa aba bàdìbo bàwàkajila, bùdì búpeta mabènesha a kùdì Nzambi,

Kadi ebu bùdì bùtòlwesha mèbà ne mingònga mbubèngiibwe, ne...pabwipi ne kwediibwa mulawu, dilumbulwisha dyàbù nkwohiibwa.

¹⁹² Mémè kwamba ne: “Ndi ndìkonka cidici cìswa kwamba’s?” Ndi anu...Mpindyewu, ncìvwapù ne meeji a cintu nansha címwè to. Mvwa ngeela ànukù meeji cyanààna. Kadi anu dîbà adi pàmvwà musòmbè mwaba awu apu, mémè kudyámbidila ne Mukalenge úvwa mwa kumpèèsha cikèènà-kumòna bwa Mwanèètù Davis ne bakwabo abu kuntu aku. Nenku mvwa musòmbè mwaba awu; mémè kutàngila, ne kumòna cintu cinyunguluka dyámwámwà dya cibandabanda civwà kumpalà kwànyì aku. Kadi cìvwa mbuloba bùvwà bùnyunguluka. Ki mémè kubùmòna busekuna bwònsò, kumwèkabì anu bu ne bùvwà budima bwònsò. Ki Muntu kuseemenaYè ne—ne—ne cintu cinène menemene kumpalà Kwèndè cyùle tètè ne mamiinu, ne Yèyè úvwa wènda ùkùpa mamiinu pa buloba bwònsò pàvwàYe wènda úya apu. Ki kuyaYè mu lwà ku mfùdiilu wa buloba, ne kunjìminaYè ku mèsù. Nenku Yèyè mmwenzè anu ùnjìmina ku mèsù, ki muntu wa mmwènekeli wa maalu a mwinshimwinshì menemene ulwàlwa ewu, muvwàle bilàmbà bifìike, wènda ùnyunguluka mushindu ewu, wènza ne, *hwi, hwi*, ùkùpa mamiinu mabì ne, *hwi, hwi*. Ki mémè kucitàngila, ne pàvwà buloba butùngùnùke ne kunyùnguluka apu... .

¹⁹³ Paanyimà pàà mutanci ki blé kutòlokayè. Ne pààkatòlokà blé, mwómò amu kutòlokamù mingònga, ne nyinyaacisòngà, ne mèbà, ne bisoosà bibì bya mupùùyà mubì abi, ne bintu byònsò bitòloka, bisoosà bibì bya diikala dya mabèèle, ne bintu byònsò bitòloka munkaci mwa blé amu. Ne byònsò abi bìvwà bìkolela pàmwè. Ki kulwakù mushipu, mubì wà menemene, ne kaablé

kakese aku kwinyikakù mutù mushindu ewu, ne kaamungònga, ne kaanyinyaacisòngà, ne mēbà, bìvwa ne mitù yàbì miinyika. Cisoosà cibì cyònsò ànu, *he, he, he, he*, cyèyela mushindu awu. Uvwa anu mwa kubyùm vwa bìmpè. Ne bìvwa bibiikila mvùla, mvùla.

¹⁹⁴ Ne paanyimà pàà mutanci, kulwakù divuba dinene menemene, ki màyì kwicikilawù bikolè. Nenku pàakamatàwu, blé awu kutùpikayè kuulu ne kubangayè kwela mbilà ne: “Butùmbi’s wè! Aleluuyah! Mukalenge àtumbishiibwè!” Kaacisoosà kabi aku kàtùpika kèèla mbilà ne: “Butùmbi’s wè! Mukalenge àtumbishiibwè! Aleluuyah!” Mēbà ne byònsò abi, bìjàngana ne maja myaba yònsò mu budimi amu byèla mbilà ne: “Butùmbi’s wè! Aleluuyah! Mukalenge àtumbishiibwè!”

Ee, mēmè kwamba ne: “Ncyèna mwa kuumvwa aci to.”

¹⁹⁵ Cìkèènà-kumòna aci kunguumukaci; pashiishe mēmè kumatapù cyàkàbìdì ne: “Mingònga yìdì pabwìpì ne kubèngiibwa ayi.” Dìbà adi mēmè kucyùm vwa. Yesu wàkamba ne: “Mvùla ùdì ùlòkela baakàne ne babi.” Muntu ùdì mwa kusòmba mu disangisha, kwakula mu myakulu, ùdì mwa kwela mbilà ne kwenza maalu anu mùdì bakwabo bònsò ne Nyuma Mwímpè wa cya bushuwa kadi kàyi anu mu Bukalenge bwa Nzambi to. Ncyà bushuwa menemene. Yesu kàakambakù ne: “Bààbùngì nebiìmanè mu ditùkù adi ne nebàmbè ne: ‘Mukalenge, mēmè ewu ncitukù mwipàte baadémons mu Dìnà Dyèbè anyi? Ncitukù mwambe bipròfeta (muyiishè) mu Dìnà Dyèbè anyi? Ncitukù mwenzè byenzedi byàbùngì bya bukolè mu Dìnà Dyèbè anyi?’” Yesu wàkamba ne: “Nguumùkilaayi apa, nwènù beena mudimu bàà bubì, kacya Ncitukù mene munùmanyè to.” Nudi nwamba bishi bwa aci?

¹⁹⁶ Ki cyòcì eci menemene cidìci cyùm vwiya’s. Nwamònu anyi? Bàvwa balabùle mvùla mwímpè wa ku Dyulu. Kadi anu kwine kwònsò aku, bòbò bàvwa babi. Anu kwine kwònsò aku twipàcìlà twàbò katùvwa tujaalàme to; tubingìlà twàbò katùvwa tujaalàme to. Aci, kwèna mwa kumanyakù to. Kadi... Nudi bamanyè’s, ku dinowa yèyè wàkamba ne: “Nye nkabijoomòne byònsò anyi?”

¹⁹⁷ KwambaYè ne: “Bilekèlè bikolelè pàm wè, kadi mu ditùkù adi mēbà aa ne nyinyaacisòngà awu nebyòshiibwe pàm wè, nenku blé neàye mu diyeebà.” Mpindyewu, neumanyè bishi ne eci ki dyèbà, anyi ne eci ki nyinyaacisòngà, anyi ne eci ki blé? “Ku mamuma àbò ki kunwàbàmanyìnà.” Udi umòna’s, mwanèètù wa balùme, mwanèètù wa bakàji, mucì mwímpè kawèna mwa kukwama mamuma mabi to. Nansha bishi, mwaba kampànda mu njila amu, necìkupetè. Pa nanku, wèwè mu dikèbà dya Nyuma Mwímpè... Ndi ne disànka nansha byòbì ne udi mufùnde ewu ní nganyi. Nwamònu anyi?

198 Mpindyewu, beena kwitabuuya bàà ku mikàlu abu, bàvwa anu pàmwè naabò. Bàvwa batengüdiibwe ne ditengudiibwa dyabo adi. Bààkaya buludì ku buloba bùvwà Nzambi mulayè abu, anu ku mwelelu kwàbù aku. Misangu yàbùngì muntu ùdi wëndela ku mwelelu aku. Yèyè neàye buludì too ne ku dibàtiiza dya Nyuma Mwîmpè kadi kudibènga. Kî mmuswè kudilekela to. Neàye buludì too ne ku dibàtiiza dya mu Mifùndù mu Dîna dya Yesu Kilisto, kadi kwalukila cyànyimà, kadi kudibènga bwa ne kacimònu to.

199 Kakwèna Mufùndù nansha wùmwèpelè mu Bible mujimà mùdiku muntu nansha umwe mubàtìjìibwe mu dîna dya Taatù, Mwànà, Nyuma Mwîmpè to, Mufùndù nansha wumwe. Ekeleeziya wa Katolike ngwàkacibanga, kupàtukacì e kulwa mu Luther, kulwacì mu Wesley, ne nцитүngүнүке too ne patùkaadi apa. Ncya bushuwa menemene. Kadi diyì ditùma dya mu Mifùndù didi n’Dîna dya Mukalenge Yesu Kilisto. Ki dibàtiiza dya bapostolo ndyòdì adi. Kwèna mwa kwenza cyòcì aci kadi kushààla mu dingumba to. Ncya bushuwa.

200 Mpindyewu, nudi numòna bintu abi anyi? Dibàtiiza dya Nyuma Mwîmpè, mapà a Nyuma, bintu bidì Nzambi ùtwàla. . . Mamuma a Nyuma àdi dinanga, disàka, mwoyi mule (kaa, wèwè udi wamba ne: “Kadi Mwanèètù Branham, Nzambi àbeneshiibwè, mèmè ndi ne mwoyi mule.” Mbimwènèke nanku. Mvwa muye mu Ohio anu àbidì àdi panshi aa, muntu kampànda kunkonkayè, mmufùnde mukàndà mwab’ewu ùnkonka ní ntu mbàtiiza bantu mu Dîna dya Yesu Kilisto. Ncyàkambakù diyì to. Nansha nanku bààkacijandula, ne bambi dikumi ne basambombo bàkaavwà badisangè mu mudimu awu bàakuumuka. S’ki mwoyi mule ngwòwò awu’s kî mmwòmò anyi?)—mwoyi mule, bwîmpè, bupòle, musàngeelu, lutùùlù, ne Nyuma Mwîmpè. Nwamònu anyi?

201 Kaa, mwanèètù wa balùme, mwanèètù wa bakàjì, tudì—tudi ku Kaadèsà-baanèà. Nudi munkacì mwa kulabula patùdì twakulangana apa. Makèlèlèlè dilòòlò awu Nyuma Mwîmpè mmutùpwekèle, mubwelè munda mwetu, bu cipeepèlè cya civuma. Úvwa musòmbe pa mitù ya bààbùngì bàà kunùdì. Leelu bambi mbakasàmbe mèkù apa ne pààpa, bàtentekelangana byanza ne bàsambidila aba bàvwà bàkèba Nyuma Mwîmpè. Kanwàngacikù mupinganyi to. Kanwàngacikù mutooyi wà mushindu kampànda to. Kanwàngacikù disaluka dya mushindu kampànda to. Wìndilè mwaba awu too ne pààkufwimbà Nzambi ne pààkuvwijàYe cifükìibwà cipyacìpyà, mukuvwijè muntu mupyamùpyà. Nudi munkacì mwa kuMulabula mpindyewu, anu kuMulabula cyanàànà, kadi Nkuci ànùlombòle too ne ku mèèsà, one—ne Mwànà wa mukooko ne Nkuci bisòmbe pàmwè, ne byènzè fète kashidi pa Dìyì dya Nzambi. Bwalu Dyòdì ndyàshààlè pìikalàku kakùciyi dyulu anyi buloba; Dìyì dya Nzambi ndyàshààlè. Aci ncilelèlè.

²⁰² Bu nwênù mwa kuswà kanwèdikù meeji ne ndi muumishi wa maalu to. Byòbì ne ki cîndì, kí nku bukòlè to. Mémè . . . ndi ntèkemena ne ngǎndàmùnù ku nkonko eyi; ngǎyǎndàmùnù, ku dyànyì pàànyì dimanya.

²⁰³ Nenku ki bwa cinyì, mu Ebèlù 6, nwênù mwa kumòna, Pòlò ùdi wàmabila beena Yudà bàvwà bambe ne: “Ee, netùtwe ku cyebe too ne pa mwaba kampànda.” Nebàlwe. Nudi numòna anyì? Kwambabò ne: “Mpindyewu, wèwè udi . . .” Biine bààkaseemenà ne balabùle abu’s.

²⁰⁴ Mbyenzèke ne ntapè dísù mu citanda emu. Bwa kunùleeja cileeji cya Nzambi udi ne Mwoyi. Ndi ntèkemena ne ncyèna mvwiya muntu ewu wa ùkòka ntema to. Ndi mulwe mufùmìne ku disangisha kampànda anu àbidi àdì pànshì aa, mulwè kaaba aka, ne munùmanyishe ne mulundà kampànda mwïmpè, mulundà wanyì wa katàpùlà-katèèka, mwena dyànyì wa mu bulembi, muntu uvwa naanyì bìmpè, muntu ukààvwakù mulwè mu ekeleeziya wanyì, ne ukààvwakù mwanèètù; mvwa mémè mmubiikila ne Busty. Dìna dyèndè ng’Everett Rodgers; ùvwa musòmbèle mu Milltown. Mbanganyì bàdiku bavùlùke pàmvwà mulwè kucimanyisha kaaba aka? Ùvwa mulàadika mùneemu emu mu lùpitaadi; bangàngàbukà bàvwa bamupandè, bamukàngùle munda, kadi mùle tètè ne kànsèrè mu mushindu wà ne bààkamutelulula anu cyanààna. Kwambabò ne: “Yèyè neàfyetelelè bikolè; munda mwa mbingu mikese emu yèyè neàtuulè nkinda; ki cyònsò cìikalàku. Bwèndè nebùtuukè, kwajiki.”

²⁰⁵ Nudi bavùlùke mungààkiimanà pa cibùmbà cya ku cyambilu apa, kumusambidila anyì? Mémè kuya kuntwaku ne kubwela mu cibambalu abu, cintu kampànda munkaci mwa kundyà mu mwoyi. Mémè kubwela mu cibambalu awu, ne ndi mwenzè anu mpàtula bantu bònsò bwa ngaamòna mwa . . . Mwanèètù Everett ùvwa mulàadika mwaba awu. Nenku nenùvulukè cyòci eci. Mémè kubwelamù; mémè kwamba ne: “Mwanèètù—Mwanèètù Busty,” (Mvwa mémè mmubiikila ne Busty.)

²⁰⁶ Kùkaadi ntántà mule patùvwà twenza masangisha a mu tuumitàndà twà myonji milambè kuntu kwàka, ba-Méthodistes bònsò abu pa kakùnà pààpa (Gertie, umwe wa kùdìbo), badìfindile eku ne eku, bàpngwela mu tuumitàndà twà myonji ya mvnyò amu bwa kumòna cìmvwà mwa kwamba, ne mushindu awu, bàcìina ne nkwèpì kwàvwà ekeleeziya wa ba-Méthodistes kubiipata. Ki pashiishe, mémè kuya ne kupeta cikèèna-kumòna mwaba awu, ne mémè kumòna minyìinyi mipàya yònsò mu dikopo, mémè kukwàta mushikì wà mishipa ne kuyààsa ku mbààla eyi, kuyèèla—kuyèèla ku nshinga, ne kuswikakaja nshinga ayi. Kadi pàngàakatàngilà . . . Nenku byònsò bìvwà mmu cikèèna-kumòna; mvwa mushiye—mushiye musùmbà wà bantu biimàne mu tuumitàndà twà myonji milambè ayi dilòlò adi ne mubànde ku lusongo lwà kakùnà kwa Mwanèètù Wright.

Nenku kabàvwakù nansha mwa kumpeta pàakacyàbu mu dinda to. Mémè kwamba ne: “Nansha umwe wa kunùdi kiiikadi. . .”

²⁰⁷ Pàncivwà mwimàne mwaba awu nyiisha apu, ki Bukènkè ebu pwà; Dikunji dya Kapyà adi dilembèléle anu kumpàlà kwànyì eku mene ne kwambaDi ne: “Umùka mwab’ewu ùye mu diitu; Mémè nêngààkulè neebè.” Dìvwa nditùkù dimwedimwe adi, ditùkù dyàkalondà dyàkampetelàbo pa kakùna apu. Nenku mvwa nsanganyiibwapù; mvwa musokòke kàshinyi kàànyì mu bisosà, ne mubànde ku mukùnà nsambila bufùku bujimà ne ditùkù dyàkalondà adi dijimà. Bàmwè bàà kudìbo kubàndabò kuntwaku, kusanganabò kàshinyi aku ne kubàndabò kuntwaku. . . Ditùkù adi ki dìvwa Mwanèètù Graham Snelling, ewu nùnkù, mupetè Nyuma Mwîmpè ne dibìikidiibwa dya ku mudimu wà bwambi.

²⁰⁸ Kuulu ku luseke lwà kakùnà kùmvwà nsanganyiibwa aku, ki Yèyè—Yèyè kungambila bintu bishìilèshìilàngàne bya dyenza ne civwà diyukilangana ditùvwà benzè bònsò pàmwè. KufilaYè cikèèna-kumòna cya kumònà kwa mishipa yìvwà myasa ku mbààla eyi, wàmba ne: “Ki ekeleeziya webè wa Milltown nyèyè ewu.”

Ki mishipa yinaayi anyì yitaanu kutùùkayi; ki mémè kwamba ne: “Mbanganyì abu?”

Yèyè ne: “Umwe wa kùdìbo n’Guy Spencer ne mukàjèndè. Mukwabo mmukwabo Spencer awu, ne bàà mu dìkù dyèndè.” Ki Yèyè kutèèla bashìilèshìilàngàne, bàvwà mwa kutùùka.

²⁰⁹ Mvwa mubàmbile; mvwa mwambè ne: “Nansha umwe wenù kàdikù to.” Mémè ne mukàjàànyì katùvwà. . . Kùvwa nkumpàlà kwa twètù kusèlangana; ki yèyè kwalukila kumbèlu bwa kushààla bufùkù bujimà ne Mwanèètù wa bakàjì Spencer, mukàjì mwîmpè wa kacya. Muntu mulùme mwîmpè wa kacya, Guy Spencer ùtu muntu wa maalu malenga anu mùdì muntu wetù yònsò ewu. Ki yèyè—ki yèyè kuya kuntwaku, ki Opal kwambayè ne: “Mpindyewu, tàngila. . .” Wàmbila Meda’s, yèyè kwamba ne: “Mpindyewu, Meda, ntu ngiitabuuja Mwanèètù Bill.” Yèyè ne: “Kadi pàdi Opal nzala yìmusùma, bìkèngela àdye munyìinyi wà ku cibelu cya ngulube mwela mayi.” Ki kuyayè kuntwaku, kukàlangayè munyìinyi wà ku cibelu cya ngulube mwela mayi, kusòmbelayè panshi bwa kubìdya, ne kubangayè ne àsambilè bwa kubìnènesha, kadi kushààlayè mweyèmène ku mèèsà, ùdila mwadi, kàciyi mwa kubilengakù to. Pashìishe kulwabò bènda bàkèbangana naanyì.

²¹⁰ Kadi kuulu kwa mukùnà aku ditùkù adi, Yèyè ùkaavwa mungambile anu menemene civwà mwa kwenzeka. Úvwa mwambè ne: “Aba nebùùmukè, ne aba nebùùmukè.” Kadi Yèyè ùvwa ne mushiki munene wa munyìinyi wà mu dikopo. KwambaYè ne: “Lamà eci bwa kukwàta naaci mudimu pashìishe bwa bantu bàà mu Milltown.” Nenku dilòòlò adi pàngààkumvwà

Mwanèètù Creech... Ûwva musòmbe kaaba aka makèèlèlè dilòòlò awu. Ncyèna... Mwanèètù Creech, udi kaaba aka dilòòlò edi anyi? Pàakalwà Mwanèètù Creech kùndi, kumbiikilayè, ne Mwanèètù wa bakàjì Creech, ùdila mwadi; tatwèndè wa mwanèètù wa bakàjì mulàadika pàapa. Kwambayè ne: “Mwanèètù Bill, kumwambidiku to. Ng’wa lufù.” Yèyè ne: “Mmudyà kùdì kànsèrè; bangàngàbukà mbamukàngùle difù, kadi mmùle ne kànsèrè mupangè ne mwa kuula.” Ki Will Hall (ne nwènù bônso nudi bamuvùlùke), ngàngàbukà umwèumwè awu pàakamakàngulayè difu ne yèyè mùle tètè ne kànsèrè... Mvwa mwase lwendu lwà kuya kalemba nshindì mu dinda adi, ki mèmè kumòna bimuma bya pommes abi bilembèlèlè mu cibambalu amu. (Nudi bavùlùke bwalu abu anyi?) Kadi’s ki muntu awu nyèyè wàwa ne mwoyi leelu ewu. Kùkaadi bidimu. Yèyè ne Mwanèètù Busty bàvwa balundà.

²¹¹ Ki mèmè kuya ku lùpitàadi, lùpitàadi lupyalùpyà alu (ngápù mwoyi mùdìbo bàlùbiikila, mu New Albany mwàmwa) lùpitàadi lupyalùpyà alu. Nenku mèmè kuyakù bwa kumòna Busty; ne pàngàakabwelà mu cibambalu amu, mèmè kwamba ne: “Mwanèètù Busty.”

Yèyè ne: “Mwanèètù Bill.” Kushàalayè munkwàte ku cyanza ne dindabula dikolè dya ku cyanza adi; nkòlomù wa Mvità ya Kumpàlà ya Buloba bujimà àyi, ncìyi ncyàmbe ne bwalu yèyè ùdipù to, kadi ng’anu bu mwoyi mulenga wùkaadiku mutuutè mwinshi mwa mutèèlù wà bleu. Kushàalayè kacya wànkwàta ku cyanza. Nkàadikù mufikè mu nzùbù mwèndè; mudyè mu nzùbù mwèndè; mulàale mu nzùbù mwèndè, byenzè anu bu ne mvwa mwanàabò. Bàna bèndè ne bakwabo, tudi anu—anu bu bàna bàà muntu bàà mashi àmwè. Muntu wa maalu malenga.

²¹² Nenku yèyè... Kadi kacya kàvwakù mwanjì kuya mu ndòndò ne Mukalenge to. Yèyè... Ntu mumubàtìize mu Dìna dya Yesu Kilisto. Kadi ditùkù adi pàakambà muiishi wa ba-Méthodistes awu ne: “Ewu yònsò udi mubàtìijìbwe mu Dìna dya Yesu Kilisto, àpatukè mu ntentà wanyì ewu.” Kabùvwa bwalu to. George Wright ne bakwabo abu kupàtukabò. Mu mapingaja amu mèmè kuyakù bwa kubàtìiza mu Dìna dya Yesu Kilisto ku Totten Ford. Disangisha dyèndè dijimà kubweladi mu màyi ne kubàtìijìbwadi mu Dìna dya Yesu Kilisto. Ki mèmè kutungunuka. Bivwa anu bimpè. Nzambi Yèyè mutwè ku cyebe, nganyì wèla dyàpà muulu? Ncyèna nansha mumanyè ne muntu awu wàkaya penyì, cyàkamwenzekelà ncinyi to.

²¹³ Kadi, mèmè kubwela mu lùpitàadi amu. Ki Busty uvwa mulàadika pàapà wàwa mùle tètè ne kànsèrè, bangàngàbukà kabàyikù bafwànyine, kabàyikù ne cìvwàbo benzè to anu kumutelulula difù adi cyanàana. Busty kungambilayè; kwambayè ne: “Mwanèètù Bill, eci mmu kiipàcilà kampànda. Cintu kampànda ncyenzèke’s.”

Mémè ne: “Eyowa, Busty.” Mémè kubanga kuumvwa Nyuma awu byenzè bu cipeepèlè cya civuma cîmvwà ngamba aci, nudi bamanyè's, cyènda cìbwela.

Kwambayè. . . Pângààbwedi mwab'ewu, kùvwa mwanzankòngòlò mu ditumba adi, mwimàne mu ditumba amu. Mwanzankòngòlò ncipungidi; cipungidi cya Nzambi. Nzambi wàkenza naanyì cipungidi pa mukùnà apu diine ditùkù adi. Mémè kutentekela Mwanèètù Busty byanza ne kumusambidila.

Bangàngàbukà bàvwa bambè ne: “Yèyè neàfyetelelè bikolè. Nebyèndè anu bìiipa. Kakwèna cintu nansha cimwè cya dyenza to. . . Yèyè neàtuulè nkinda anu mu matùkù makese aa.” Ki Busty Rodgers. . . Aci kùkaadi mbingu ne mbingu ne mbingu, kadi's ki Busty Rodgers nyèyè ewu, musòmbe mu ekeleeziya emu dilòlò edi, ne mubidi tumatuma ne mukici ànu mûnkààdikù mumumòne kacya bàndela. Juukilàbi kuulu tûng, Mwanèètù Busty. S'ki yèyè awu. Tùpeeshàayi Nzambi butùmbi, twètù bònsò.

Bàvwa basangile mu cibambalu cya kuulu,
Bònsò munkaci mwa kusambila mu Dîna
Dyèndè.

Babàtìjìbwe ne Nyuma Mwîmpè,

Ki bukolè bwa mudimu kulwabù.

Mpindyewu, cyàkabènzelaYe ditùkù adi aci

Yèyè neàkwenzèlè bya mwomùmwè.

Ndi ne disànkà be mûndi mwa kwamba ne ndi
umwe wabò.

Ndi umwe wabò, umwe wabò,

Ndi ne disànkà be mûndi mwa kwamba ne ndi
umwe wabò; (Aleluuyah!)

Umwe wabò, ndi umwe wabò,

Ndi ne disànkà be mûndi mwa kwamba ne ndi
umwe wabò.

Nansha mùdi bantu aba kabàyi mwa kulàka
mukana bwa cidìbo,

Anyi kuditàmbisha bwa luumu lwà pa buloba,

Mbapetè bònsò Mpenta wabò,

Babàtìjìbwe mu Dîna dya Yesu;

Ne bàdi bàmbilangana mpindyewu ku nseke ne
ku nseke ne,

Bukolè Bwèndè bùcidi anu bùmwèbùmwè abu.

Ndi ne disànkà be mûndi mwa kwamba ne ndi
umwe wabò.

Ndi umwe wabò, ndi umwe wabò,

Ndi ne disànkà be mûndi mwa kwamba ne ndi
umwe wabò. (Aleluuyah!)

Umwe wabò, ndi umwe wabò,
Ndi ne disànkà be mûndi mwa kwamba ne ndi
umwe wabò.

Mpindyewu, lwâku, wêwè mwanèètù, kèba
dibènesha edi

Dyàkezulà mwoyi wèbè ku mpekaatu,
Dyàbangà kudidisha tungonga twà disànkà,
Ne dyàlamà musùukà wèbè wùlàkuka kapyà.
Kaa, ki kulàkukadi kapyà mu mwoyi wànyì
eku,

Kaa, butùmbi kùdì Dîna Dyèndè,
Ndi ne disànkà be mûndi mwa kwamba ne ndi
umwe wabò.

Tùwímbàayi!

Kaa, umwe wabò, umwe wabò,
Ndi ne disànkà be mûndi mwa kwamba ne ndi
umwe wabò. (Aleluuyah!)

Umwe wabò, umwe wabò,
Ndi ne disànkà be mûndi mwa kwamba ne ndi
umwe wabò.

Nganyì udikù umwe wa wabò? Elàayi byanza muulu. Kaa,
ekelekele! Kaa, disànkà kaayi dîndì naadi dya kwikala umwe
wabò's wè!

Umwe wabò, umwe wabò,
Ndi ne disànkà be mûndi mwa kwamba ne ndi
umwe wabò. (Aleluuyah!)

Umwe wabò, umwe wabò,
Ndi ne disànkà be mûndi mwa kwamba ne ndi
umwe wabò.

Bàvwa basangìle mu cibambalu cya kuulu,
Bònsò munkaci mwa kusambila mu Dîna
Dyèndè,

Bààkabàtijiibwa ne Nyuma Mwîmpè,
Dîbà adi bukolè bwa mudimu kulwabù;
Mpindyewu, cyàkabènzèlèYe ditùkù adi aci
Yèyè neàkwenzèlè bya mwomùmwè,
Ndi ne disànkà be mûndi mwa kwamba ne ndi
umwe wabò.

Kaa, umwe wabò, umwe wabò,
Ndi ne disànkà be mûndi mwa kwamba ne ndi
umwe wabò. (Aleluuyah!)

Umwe wabò, umwe wabò,
Ndi ne disànkà be mûndi mwa kwamba ne ndi
umwe wabò.

Mpindyewu, patùdì twimbulula cipungulujidi aci apa, ndi
muswè bwa yònsò wa kunùdì àkudimukè, àlabulè muntu

kampànda ku cyanza udi ku luseke lwèndè awu, àmbè ne: “Udi umwe wabò anyi?” Nwamònu anyi? Eyo.

Kaa, umwe wabò (Ndi mumanye ne ki cyûdi,
Mwanèètù Neville. Ndi mumanye ne ki cyûdi,
Mwanèètù Capps. Ndi mumanye ne ki cyûdi.
Ndi mumanye ne ki cyûdi . . . ? . . .)
. . . ndi umwe wabò;
Kaa, umwe wabò, umwe wabò,
Ndi ne disànkà be mûndì mwa kwamba ne ndi
umwe wabò.

²¹⁴ Kaa, kwènàku ne disànkà dya kwikala umwe wabò anyi? Mbanganyi bàdi baswè kwikala umwe wabò? Elà cyanza muulu. Eyo. Mpindyewu, nènnwìmbilè eci nùnkù:

Enku lwàku wèwè mwanèètù, kèba dibènesha
edi
Dyàkezulà mwoyi wèbè ku mpekaatu,
Dyàbangà kudidisha tungonga twà disànka,
Ne dyàlamà musùùkà wèbè wùlàkuka kapyà.
Kaa, ki kulàkukadì kapyà mu mwoyi wànyi
eku,
Kaa, butùmbi kùdì Dìnà Dyèndè,
Ndi ne disànkà be mûndì mwa kwamba ne ndi
umwe wabò.
Kaa, umwe wabò, umwe wabò,
Ndi ne disànkà be mûndì mwa kwamba ne ndi
umwe wabò. (Aleluuyah!)
Umwe wabò, ndi umwe wabò,
Ndi ne disànkà be mûndì mwa kwamba ne ndi
umwe wabò.

²¹⁵ Nwavùlukaayi ciwra mwànà wa bakàjì mutekète awu mwambile Peetèlò aci ne: “Wèwè ewu kwèna umwe wabò anyi?” Mèmè ndi ne disànka be, kàdi nwènù? Nudi bamanyè’s, Peetèlò wàkamba mu ditùkù dya Mpenta ne: “Eci ki Cyôci aci!” Mpindyewu, mèmè misangu yònsò nkàadi mwambàmbe ne: “Piikalà *Eci* kaciyi *Cyôci* aci to, ndi ne disànka dya kwikala ne *Eci*, mwindile bwa *Cyôci* aci kulwaci.” Ncyà bushuwa. Ndi ne disànkà bwa *Eci*.

Bwalu ndi umwe wabò, ndi umwe wabò
Ndi ne disànkà be mûndì mwa kwamba ne ndi
umwe wabò;
Kaa, umwe wabò, umwe wabò,
Ndi ne disànkà be mûndì mwa kwamba ne ndi
umwe wabò.

²¹⁶ Kaa, kî mbilenga bilayà anyi, basòmbe pàmwè mu myaba ya mu Dyulu mu Kilisto Yesu, tuyiikilangana ne Nyuma, tuyiikidilangana pa Dìyì, twakula pa bintu bìmpè bicilwalwà. Mbìmpè be. Ndi ne disànka be bwa kumanya nanku, kàdi

nwènu? Kwènàku wèwè ne disànkà bwa paùdi mwena Kilisto anyi? Kwènàku wèwè ne disànkà bwa mùdi mpekaatu yebe mwinshì mwa Mashì anyi? Yèyè neàlwe òmòwè dya ku matùkù aa, ne twètù netùye Nendè. Dìbà adi elàbi meeji, bukùlákàjì bwònsò nebùtùmùkè; mabèèdi ònsò, tunyinganyinga twònsò, mwoyi wà cifwàkà wònsò newùshintulukè. Kaa, ekelekele! Ndi anu mwa kwela meeji bwa bânà beetu bananga bàà kale bàvwàku biimàne mwab'ewu. Ndi mvùluka. . . Mbanganyi bàdi bàvùlukà Laabi Lawson? Ekelekele, pàmwè ne nwènu bònsò. Ndi mwa kumumòna ùkùdika dikombo dya kale adi anu apa nùnkù. Ne mèmè mvwa musòmbè paanyimà pààpa. Ùvwa wimba kaamusambu kakese aka. . . (Indilà kakese, Teddy, mwanèètù.) Mèmè nènてete, mmonèbi ní ndi mufwànyine kupeta cyonà cyàkù. Ncyèna mumanyè.

Nkungindile mààlabà wa disànkà
Mùdi biibi bya masàngà byùnzuluka bishiyà
mishiku ya mbèlu myalàbàle
Ne pàngàakòsololà cibàndabanda eci cya
tuninganyinga,
Néngùikishilè ku Luseke lukwabo.

Dìngà ditùkù dyàmwàmwà dya cyumvwilu cya
cifwàkà,
Dìngà ditùkù, anu Nzambi nkàayendè ngudi
mumanyè ne mpenyi anyi ne ndìbà kaayi,
Nkàtà ya mwoyi wà cifwàkà neyiimanè yònsò,
Dìbà adi nènye kasòmbela pa kakùnà kàà
Sionà. (Eyowa.)

²¹⁷ Tukàtà tukese tùdi tùnyùngulukà munda mwetu etu—
lumònò, lulabulu, lulengu, lununku, ne luumvu, tuubyumvwilu
tukese ne tukàtà tùdi tùnyùngulukà mu mwoyi wà cifwàkà
ewu etu, dìngà ditùkù netwimanè. Pashìishe mèmè, mèmè
mwine, ne wèwè, netùye kasòmbela pa kakùnà kàà Sionà.
Kaa, ndi munangè aci, kàdi wèwè? Ndi mumanyè ne tudi ne
ditwìshibwa dibènesha adi. Eyo. Mbanganyi bàdi bamanyè
musambu wètù wà kale wà dibàtiizangana naawù awu?
Mpindyewu, netùshintululè aci. Twàngatàayi musambu wètù wà
ditangalajangana naawù awu:

Angàtà Dìnà dya Yesu wèndè naadi,
Wèwè mwànà wa tuninganyinga ne dikènga;
Nedìkupè disànka ne busàmbi,
Ndà naaDi kwònsò kúyaayà.

²¹⁸ Angàtà Dìnà dya Yesu wèndè naadi. Enzà anu aci cyanààna,
pawùyaayà apu. Eyo, bònsò pàmwè mpindyewu. Kanùpu mwoyi
to, pa dìbà mwandamukùlù jaajaaja wa dinda twarta twà
disambila netwàbanyibwè bwa disangisha adi. Disangisha
nedìbangè pa dìbà citeema ne tusunsa makumi asatu. Nènyiishè

pa díbà dikumi. Mudimu wà disambidila babèèdi newùbangè lwà pa díbà dikumi ne òmùwè.

²¹⁹ Maaàlabà mu mapingaja, maaàlabà mu dilòòlò nekwikalè diyiiisha dya butangadiki mu tabernacle. Nenku maaàlabà mu dilòòlò, nwènu bònsò bàdi banyingalàle ku mpekaatu yenu kàdi kacya kanùyikù banji kubàtiijibwa abu, nekwikalè. . . ciinà cya màyi neciikalè bwàshi; netwikalè mwa kubàtiiza bantu mu Dìna dya Mukalenge Yesu Kilisto.

²²⁰ Bantu bònsò pàmwè mpindyewu, patùdi twimba banàngùle mēyi apa. Mwanèètù Busty, kanwèna bamanyè mündi ne disànka ne kusàkidila kùdi Nzambi to. Nudi bamanyè's, yèyè wàkaya kùdi ngàngàbukà. Nenku mbandondèle ne ngàngàbukà wàkamutàngila, ne kààkamanya cya dyela meeji to. Kààkiitabuuja ne ùwva mmuntu umwèumwè awu to. Kaa, kî mmùnsokòntù to pa cidi Nzambi mwa kwenza. Kî ncyà bushuwa anyi? Eyo.

Angàtà Dìna . . .

Wimbàayi banàngùle mēyi!

. . . wèndè naadi,

Wèwè mwànà wa tunyinganyinga ne dikènga;

Nedikupè disànka ne busàmbi,

Mpindyewu, ndà naadi kwònsò kùyaaya.

Dìna dya musinga mukolè (Dìna dya musinga mukolè!) Éyi dya bupòle be!

Ditèkemenà dya buloba ne disànka dya Dyulu;

Dìna dya musinga mukolè (Dìna dya musinga mukolè!) Éyi dya bupòle be!

Ditèkemenà dya buloba ne disànka dya Dyulu.

²²¹ Eyo. Ndi mpindyewu ngaalujila mpaasàtà bulombodi bwa disangisha. Yèyè neikalè ne ndambu wa mēyi, anyi neàmbe bwa muntu kampànda àtùtangalàjè, cyònsò cidiye naaci mu meeji aci.



NKONKO NÈ MANDAMUNA PA NYUMÀ MWÌMPÈ LUA59-1219
(Questions and Answers on the Holy Ghost)

DILONDANGANA DYÀ BULOMBODI, BULONGÀME NÈ DILONGESHA BYÀ ÈKÈLEEZIYÀ

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu diisambombo dilòlò, mu matùkù 19 a ngondo wa dikumi ne mwibìdi, cidimu cya 1959, mu Branham Tabernacle mu Jeffersonville, Indiana, U.S.A. Ndyumusha pa mukaba wa mēyì ne dituuta ku cyamu mu kaabujima kààdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2023 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org